

萬 有 文 庫

第 二 集 七 百 種

王 雲 五 主 編

漁 洋 山 人 精 華 錄

(上)

王 士 禛 撰

商 務 印 書 館 發 行

漁洋山人精華錄

(上)

王士禛撰

國學基本叢書

萬曆庚戌之歲。偕余舉南宮者。關西文太青。新成王季木。竟陵鍾伯敬。皆雄駿君子。掉鞅詞壇。太青博而與季木贍而肆。踔厲風發。大放厥詞。太青贈季木曰。元美吾兼愛。空同爾獨師。蓋其宗法如此。而伯敬以幽閒隱秀之致。標致詩歸。竄易時人之耳目。迄於今。輟材諷說。簞弄研削。莫不援引鍾譚。與王李徐袁分茅設範。而關西新城之集。孤行秦齊間。江表之士。莫有過而問者。三子之才力。伯仲之間耳。而身後之名。飛沈迴絕。殆亦有幸不幸焉。千秋萬歲。古人所以深歎於寂寞也。季木歿三十餘年。從孫貽上。復以詩名。鵲起閩人林古度。論次其集。推季木爲先河。謂家學門風。淵源有自。新城之壇壝。大振於聲銷灰燼之餘。而竟陵之光燄。燿矣。余蓋爲之撫卷太息。知文苑之乘除。有劫運參錯其間。殆亦可以觀天咫也。嗟乎。詩道淪胥。浮僞並作。其大端有二。學古而贗者。影掠滄溟。弁山之贗語。尺寸比擬。此屈步之蟲。尋條失枝者也。師心而妄者。懲創品彙。詩歸之流弊。眩運掉舉。此牛羊之眼。但見方隅者也。之二人者。其持論區以別矣。不知古學之繇來。而勇於自是。輕於侮昔。則亦同歸於狂易而已。貽上之詩。文繁理富。銜華佩實。感時之作。惻愴於杜陵。緣情之什。纏綿於義山。其談藝四言曰。典曰遠。曰諧曰則。沿波討源。平原之遺則也。截斷衆流。杼山之微言也。別裁僞體。轉益多師。草堂之金丹大藥也。平心易氣。耽思旁訊。深知古學之繇來。而於前二人者之爲。皆能洮汰其癥結。祓除其嘈囂。思深哉。小雅之復作也。微斯人。其誰與歸。貽上以余爲孤竹之老馬。過而問道于余。余遂趣舉其實言以爲敍。往余嘗與太青季木論文東闕下。勸其追溯古學。毋沿洄於今學。而不知返。太青喟然謂季木曰。虞山之言是也。顧我老不能用耳。今二子慕木已拱。聲塵蔑如。余八十昏忘。值貽上代興之日。向之鏃礪。知己用古學勸勉者。今得於身親見之。豈不有厚幸哉。

書之以慶余之遭也。虞山蒙叟錢謙益序。

古詩一首贈王貽上士廉

謙益

風輪持大地。擊颺爲風謠。吹萬肇遠古。賡歌暢唐姚。朱絃汜漢魏。麗藻沿六朝。有唐盛詞賦。貞符彙元包。百靈聽驅使。萬象窮鍛雕。千燈成一光。異曲皆同調。彼哉譏議者。穿穴紛科條。初盛別中晚。畫地成狴牢。妙悟掠影響。指注闕釐毫。墮天醯雞覆。井月癡猿號。化爲劣詩魔。飛精入府焦。窮老蔽葑屋。不得瞻沆寥。正始日以遠。詞苑雜莠苗。獻吉才雄驚。學杜舖醜糟。仲默俊逸人。放言訾謝陶。考辭竟嘈噴。懷響歸浮漂。江河久雍決。厯潘亦騰蹕。么絃取偏張。苦調搜啁噍。烏空而鼠卽。厥咎爲詩詬。喪亂亦云懸。詩病不可瘳。譬彼膏盲疾。傳染非一朝。嗚呼杜與韓。萬古垂斗杓。北征南山詩。泰華爭岵峩。流傳到於今。不得免傲嘲。况乃唐後人。啞點誰能跳。窮子抵尺璧。凍人裂復陶。熠燿點須彌。可爲渠略標。昌黎笑羣兒。少陵訶汝曹。嗟我老無力。掩耳任叫呶。王君起東海。七葉光漢貂。騏驥奮蹴踏。萬馬暗不驕。識字函雅故。審樂辨簫韶。落紙爲歌詩。絳雲卷青霄。自願骨骼馬。削殘臥東郊。敢云老識路。昏忘慙招邀。河源出星海。東流日滔滔。誰蹠巨靈掌。一手墮崩濤。古學喪根幹。流俗沸螭蝸。僞體不別裁。何以親風騷。珠林旣深深。玉河復迢迢。方當剪榛楛。未可榮蘭若。瓦釜正雷鳴。君其信所操。勿以獨角麟。媿彼萬牛毛。伊余久歸佛。繙經守僧寮。棖觸爲此詩。狂言放調刁。無乃禪病發。放筆自抑搔。起挑常明燈。懺除坐寒宵。

漁洋山人精華錄總目

卷一

古體詩

卷二

古體詩

卷三

古體詩

卷四

古體詩

卷五

今體詩

卷六

今體詩

卷七

今體詩

卷八

今體詩

卷九

今體詩

卷十

今體詩

漁洋山人精華錄卷一

清 侯官林 佶編

古體詩

對酒

對酒歌慷慨。自我屬有生。共得睹太平。皇帝陛下惟樂康。宮府治。丞相無私人。諸諫官彈射姦慝。咸有直聲。自中丞刺史良二千石。各各有廉名。日南交趾皆我郡。縣蠻夷君長以時稽首殿庭。屬國具爲令。文簡生翠來。王京幸太學。三老而五更。遂賜民爵一級。存問長老。遣都吏循行。大酺十日。除宮刑。美人曼壽。百室充盈。

慕容垂歌 三解

慕容初入鄴。已有虎狼志。前驅丁零部。後面鮮卑騎。燕燕尾涎涎。飛飛啄塘蒲。三原隔五嶼。緩急當奈何。慕容在何許。已度涼馬臺。饑鷹掣鞵繼。一逝不復歸。

白紵詞三首

江南煙水多白鼻。羣飛啞啞烟際呼。美人窈窕爲君娛。蜀羅吳縠曳華裾。修眉星的妍且都。明鏡遙映丹

脣朱清歌錯落大小珠。折腰流盼意態殊。乍進欲退心躊躇。芙蓉灼灼迴雙趺。仙珮丁丁鳴六銖。燭殘月暗漏滴壺。宛轉爲君開繡襦。

青春遙夜開華堂。綺羅絃管東西廂。阿誰公子淮南王。美人家本邯鄲倡。合蟬墮馬耀明粧。起舞爲君陳樂方。翠曾參差烟際翔。鸞驚龍婉相頡頏。西城北里各擅場。羅襖文巾紛御香。明眸善睐含流光。舞罷雲中孤月涼。

若耶溪水勝瀟湘。越川佚女春浣香。織成白紵冰雪光。上爲舞衣下舞裳。大秦珍珠明月瑤。崑山玉撥映金梁。齊琴趙瑟聲鏘鏘。七聲妙舞紛相當。須臾璧月沉西方。汝南鳴雞啼曉霜。今我不樂去日長。裴回念此摧中腸。翡翠幄幄陳高堂。請君安坐樂未央。

擬美女篇

洛濱風日好。美女出相望。瑤象飾香轂。玉軼鳴鏘鏘。采春蘭阪上。弭蓋蘅臯傍。龍輔節纖步。鸞珠結明璫。借問女誰氏。少小生平陽。大姊入後宮。次姊瑯琊王。小妹雖不貴。夫婿直東箱。出入冠駸駸。天子侍中郎。檻衣萬錦費。腰褭千金裝。容華誠自惜。貴盛寧易詳。洛水正微波。明瀾一何長。川路西南永。扁舟不可方。寄語盛年子。顧義慎自防。

擬白馬篇

駿馬生代北。少年出幽并。結束各光采。指顧風雲生。朝遊屬玉觀。夕宿衛承明。身逐孤兒隊。名隸羽林兵。行行南山獵。意氣何縱橫。蒼隼決雲來。飛矢逆風鳴。大澤鸚鵡逾。深雪狐兔驚。迴瞻鶴雀門。突兀與雲平。

鞍馬條來歸勢若浮烟輕。昨夜羽書至。貳師出邊庭。上馬別妻子。鳴鏑追前旌。舊隨冠軍伍。復此河源行。大漠少行人。深谷多颺颺。朝飲沙上泉。夕戍雲間城。左顧疏勒服。右盼伊吾清。無令都護將。關外獨聲名。

白石橋尋黛溪遂至摩訶峯下

日落山氣涼。清流自迴轉。窮源不知勞。漸忘溪路遠。幽石各奔峭。修樹亦婉孌。遙睇徑難測。迴闕途屢變。寂歷衆山響。蕭條晚風善。微徑暮樵出。懸崖歸鳥見。須臾夕霏收。殘陽四山徧。新月忽清揚。餘霞自舒卷。稍覺葛衣輕。幸藉孤筇健。平生丘壑人。茲言庶能踐。

由柳菴踰西山最高頂至醴泉寺拜范祠

清境難久留。申旦戒徒御。引領睇前峯。抗策辭東路。數武卽嶠嶽。危蹊少安步。顧盼見百里。雲日媚烟樹。憑高俯澄湖。風帆競孤鷺。晴旭移峯巔。明晦變已屢。褰衣入空翠。溪流渺南注。穆竦曠遊眺。蒼茫失昏曙。東山清風來。西澗涼雨度。澄潭益蕭瑟。游鱗紛散聚。前賢跡已遠。山川緬猶故。夙昔思古人。三歎讀書處。

醴泉謁誌公像觀唐碑

碑開元三年乙卯立

早讀神僧傳。緬希誌公迹。劍水蹤已遙。鍾山事成昔。豈知常白峯。留此千年石。鳥爪帶銅綠。鏡面瑩薜碧。磨滅開元碑。蟲鳥紛難譯。披蘿究遺文。剝苔理殘畫。斷闕發聞見。樵牧增歎惜。陸銘圯寒冢。王碑委荒僻。廬陵傲珠犀。東武比博奕。淪棄多名珍。何憚窮鉤索。一勺醴泉冰。供此風雨夕。神僧傳。誌公面瑩如鏡。手足皆鳥爪。碑有云。陸無製銘于冢內。王筠勒碑于寺門。皆與傳合。

醴泉寺高閣瞻眺有懷范文正公

風雨湖上來。蕭條灑飛閣。殷雷起眉際。極目窮寥廓。遙天壓煙水。空濛氣磅礴。大澤盤蛟龍。斜風偃鷗鷁。卻眺鴻濛中。日光遠迴錯。草木暗四山。急淙鳴萬壑。悵然思古人。大雅何時作。

書堂

絕澗已千仞。磴道仍九盤。直上若懸溜。纏屬勢難安。右顧踐鹿跡。左顧憑鳥翰。日落空山中。蕭然風氣寒。精舍壁間出。洞門天際看。奇石壓巖戶。孤立何巒岏。突兀拔澗底。窈窕凌雲端。入門度飛梁。傍夕聞驚湍。幽軒宛初構。几榻皆峯巒。頗意雷雨時。雲氣生戶間。諸天發鐘磬。星斗方闌干。惆悵此靈境。翠然懷懶殘。

復雨

花枝濛濛日將暮。颯颯涼颺起庭樹。雨腳射地晝陰晦。急溜鳴簷不知數。連年左輔嗟大無。有蜚多麋仍屢書。良民重累背鄉縣。奸民攻剽成萑苻。天南干戈未寧息。男罷農耕女廢織。長沙江中多戰船。祝融峯頭尙兵革。羽書日下山東。稭秬轉輸動千億。苦竹黃楓猿晝啼。母子征人少顏色。掘冢鑄幣既不能。展轉呼天猶力穡。今年稍稍宜雨陽。黍稷撲撲稻葉長。長官鞭朴那敢避。努力公家輸酒漿。

和窟室畫松歌

黃門園中有窟室。背枕亞祿山。名臨滄溟。石壁磊砢一千丈。入眼髣髴生精靈。橫壁老松誰所作。海風怒攫山欲傾。盛陰五月凜霜雪。怒姿萬變盤雷霆。疑是溟渤含日氣。不然天上來星精。我來盛夏變冬序。白晝慘淡生晦冥。顛毛亂指舌上橋。寒肌起粟心骨驚。上下蒼茫有神鬼。左右騰跳飛颺庭。江南吳生昔爲此。一一下筆皆龍形。昔者吳道子畫壁。天宮寺將軍劍舞何蔚歧。興酣筆落氣磅礴。萬夫動色嗟神異。吳

生畫松已百載，鐵榦霜皮終不改。南榮曝背亦吾儔，偃蹇龍鱗好相待。

蠡勺亭觀海

登高丘而望遠海，坐見萬里之波濤。長天寥廓雲景異，春陰偃蹇魚龍高。怒潮乘風立千丈，虎蛟水兕紛騰逃。羣靈潛結萬蜃氣，一痕未沒三山椒。須臾勢盡潮亦止，波淡天清靜如綺。菱苔沉綠紛塘坳，螺蚌搖光散沙汨。參差島嶼羅殊域，紛如星宿秋天裏。擊我劍聽君歌，有酒不飲當奈何。日主祠前水蕭瑟，仙人臺上雲嵯峨。羨門高誓不可見，秦皇漢武空經過。祇今指顧傷懷抱，黃腫噉餅盡荒草。人生快意無幾時，明鏡朱顏豈長好。吾將避世女姑山，不然垂釣蜉蝣島。

周文矩莊子說劍圖

後有董宗伯書說劍篇

古今人物畫手誰第一，晉有衛協吳曹興。南唐周生更奇雋，行筆瘦掣姿峻嶒。此圖在世踰千載，墨光黯淡生光晶。君王隱逸各有態，蠶絲烟篆文迴縈。目瞋鬢突五劍客，短後之衣曼胡纓。二人旁立目左顧，劍如星日光縱橫。昂首右顧者三士，二人按鐔神欲生。一人拔劍作虎步，怒如截兕吞長鯨。使筆如劍劍氣出，此公無乃能鐵兵。莊生說劍固豪快，十步千里無留行。千年奇論佐奇筆，揮毫潑墨皆飛鳴。雲間墨妙更逾絕，鍾王腕底紛鬪爭。自云昔見吳興書說劍，恨不作圖雙妙并。今逢此卷信神物，又恨作書非趙卿。徘徊三歎出金石，煥然妙蹟如神明。我聞周生妙得後，主作字法秋胡謝女風格清。秦淮花月汴京土，感此傷人今古情。

宣和御藏文矩，有秋胡故實，謝女寫真等圖。

冬日偶然作四首

太史下蠶室。坎壤誰見知。發憤傳貨殖。千古同悲噫。郭縱出鑄冶。翁伯起販脂。灑削既鼎食。胃肺亦連騎。志士守蓬蘿。不如交馬醫。索帶披敝裘。不如規魚陂。

我愛灌仲孺。意氣薄雲天。長嘯入吳軍。指顧堅壁穿。長戟鬱龍蟠。怒騎如風旋。聲名冠諸侯。皆曰夫夫賢。魏其勢既落。田氏寵益專。朝請考工地。夕奪城南田。丞相故賓客。顧盼忽屢遷。笑罵顧四筵。殊不直一錢。當時膝席子。岌岌皆危冠。

鄭季有孽子。少小爲人奴。騎從平陽主。給事建章居。朝拜大將軍。封侯詫鉗徒。遂復還尙主。賜第耀通衢。隴西老飛將。猿臂雄萬夫。白首不得侯。心折幕府書。誰能對刀筆。臨風自捐軀。天道有如此。千古同欷歔。吾家有方平。雅志託林壑。拂衣早歸耕。貂裘行採藥。卜築沃川墅。垂釣上虞郭。遯矣孔阮儔。遐哉箕穎樂。瑯琊多龍鸞。羨此雲中鶴。

春不雨

西亭石竹新作芽。遊絲已罨櫻桃花。鳴鳩乳燕春欲晚。杖藜時復經田家。田家父老向我說。穀雨久過三月節。春田龜坼苗不滋。猶賴立春三日雪。我聞此語重嘆息。瘠土年年事耕織。暮聞窮巷叱牛歸。曉見公家催賦入。去年陽雨幸無愆。稍稍三農獲晏食。春來穀賤復傷農。不見饑鳥啄遺粒。卽今土亢不可耕。布穀飛飛朝暮鳴。春葦作飯菜作羹。吁嗟荆益方用兵。

蠶租行 十解

丁酉夏有民家養蠶質衣鉏耨桑而催租急遂縊死其夫歸見之亦縊王子感焉作是詩也

陽春三月時。蠶子何蠕蠕。三日出奩中。五日徧遽蔭。一解
東鄰有少婦。養蠶方一塢。夜夜伴蠶眠。桑葉恐不周。二解
朝出南陌頭。猗猗望桑柔。亦不見桑柔。椹子醉鴈鳩。三解
歸來見蠶饑。徘徊當奈何。脫我耳邊釵。鬻我嫁時襦。四解
阿夫持襦去。里正持符來。漢中索軍租。不得還顧私。五解
里正且上坐。睨勉具晨炊。但緩一月餘。蠶成賣新絲。六解
新絲亦難賣。新穀亦難收。不見馬上郎。雉尾紅錦裘。七解
再拜謝里正。丈人且旋歸。鬻我嫁時襦。脫我耳邊釵。八解
蠶應黑瘦盡。軍租持底當。痛哭視孤兒。畢命朱絲繩。九解
阿夫還入門。不復見故妻。生既爲同衾。死當攜手歸。十解

懷古詩三篇

魯仲連陂

七雄旣龍鬪。陳寶歸嬴秦。師出函谷關。六國咸逡巡。邯鄲日夜急。咄嗟誰解紛。蕩陰師旣頓。新衍謀豈倫。先生畫奇策。長揖平原君。僕妾愧萬乘。大義明君臣。縱橫數千言。顧卻虎狼軍。功臣不受賞。飄然歸海垠。蹈海旣高義。肆志寧辱身。至今齊趙士。僮儻希清塵。我來古陂上。遺祠蔓荒榛。甃道竄蒼鼠。天風吹白蘋。緬懷田巴語。景行跂千春。

顏闕墓

末世寡尚志。薄俗希乘軒。豈不貴纁帛。形役神不全。吾高顏夫子。抗節藐齊宣。鐘簴寧足論。殿上呼王前。晚食與安步。詎以榮利遷。監門良自賤。趨士理亦賢。俯仰二千載。弔古悲荒阡。墟墓絕樵採。清風激顏頰。古道邈難作。悲哉東逝川。

轅固里

漢初尙黃老。儒術闕不章。齊魯誕諸儒。五經如載陽。遐哉清河傳。卓爲羣倫倡。抵掌論湯武。大義非荒唐。曲學誠孫弘。微言詒后蒼。訓詞列學官。星日同琅琅。我生睽千載。桑梓寧異鄉。寤寐思哲人。流風一何長。生慚齊魯學。私淑附師匡。

苦寒行

遠遊漁陽城。飲馬滹沱湄。河朔恆苦寒。日夕風鳴悲。悲風起廣塗。霜霰凋人衣。欲渡川無梁。層冰何壘壘。鷗梟鳴枯楊。豺虎交路衢。深谷多猿獠。得食歡相追。我行歲旣晏。十步八九迷。他鄉少親故。相逢知是誰。憂愁鑠肌骨。自顧顏鬢衰。俛眎飛蓬根。隨風時轉移。我獨久伊鬱。歲暮空徘徊。寄語後來人。遠遊不如歸。

梁曰緝爲言輞川雪中之游

少志愛山水。夢想懷藍田。終南西峯下。水石餘清妍。憶昔維摩詰。于此曾挂冠。揮手謝時輩。草堂常晏眠。輞水遶舍下。湖光明雲端。繩牀間藥鑿。清齋日蕭然。春鷗漸矯翼。夏木紛綿芊。時尋名僧會。自泛湖中船。嘆息古人沒。風物隨變遷。仙令妙文筆。慨然追昔賢。積雪曜巖阪。秀色曖林巒。數里入谷口。石流已濺濺。

水鳥相哀鳴。雙垞渺人烟。却登華子岡。輞水猶淪漣。花竹散已久。亭館供諸天。王裴杳千載。丘壑亦凋殘。來者復爲誰。斯言良足歎。

慈仁寺雙松歌贈許天玉

我昔登泰山。舉手攀秦松。東南雲海幾千里。夜懸日氣開鴻濛。山人出山已三載。復見金元雙樹在。攢髯石骨青銅姿。古貌荒唐閱人代。長夏蒼蒼秋氣深。風來絕壑蛟龍吟。仙人五粒不可見。但有玄鶴來往飛。陰森螭螻詰屈宛相向。千曲盤拏氣初放。一任支離拔地生。那須天矯排雲上。我來高枕石壇邊。耳畔往往聞驚泉。白日沉沉不到地。颯然雷雨生空天。煙色欲暝鐘復起。雄談岸幘波濤駛。千秋萬歲知者誰。閩海奇人許夫子。

洗象行

水關蒼蒼柳陰碧。寶馬流蘇紛絡繹。日中傳呼洗象來。玉河波射珊瑚赤。須臾鉦鼓干雲霄。萬夫聲寂如秋宵。虎毛蠻奴踞象頂。丘山不動何岌岌。岸邊突兀二十四。直下波濤若崩墜。縱橫欲蹴龜鼉宅。騰踏還成鵝鸛隊。乍如昆明習鬪戰。萬乘旌旗眼中見。又如列陣昆陽城。雷雨行天神鬼驚。奴子胡旋氣逾壯。忽沒中流狎巨浪。撇波一躍萬人呼。幡然卻出層霄上。今年丞相收夜郎。扶南盤况求王章。遠隨方物貢天闕。屹然立仗金階旁。聖朝自不貴異物。致此亦足威遐荒。黃門鼓吹暮復動。海立山移浩呼淘。大秦師子多威神。山林豈是皇家珍。

題趙澄仿王右丞翠峯飛雪圖

寒色冥冥下巖壑。千峯萬峯雪初落。瀑布無聲溪澗凍。紅樹微茫敞孤閣。閣中有客方縵袍。當盃氣與蒼山高。遙看飛鳥落何處。如聞落木鳴東臯。崖橫路斷少人跡。稍見老樵下巖隙。高低遠近一溪通。晦明合沓千重隔。右丞昔日居藍田。山水落筆窮自然。雪岡漁市盡高妙。樂瀨欵湖紛眼前。此圖曾入宣和譜。董巨荆關焉足數。兵火相尋六百年。玉躡金題幾更主。雪江老筆妙入神。臨摹古本幾亂真。卽教唐宋多能手。未必常逢如此人。

傅侯天馬歌

傅侯天馬身八尺。風鬃卓立雙瞳方。赤毛朱翼信龍種。神姿磊落形昂藏。來從流沙涉西極。玉山之禾偶棲息。意氣生能輕虎兕。驍騰未屑循羈勒。四蹄鳥爪如鋼鈎。經過千里風颼颼。虎身壯士控不得。仰眎闔闔浮雲愁。昔日湖南始征戰。軍中驕駟號百萬。此馬振鬣始一鳴。歛如天上驚雷電。一從罷戰歸中原。三年不復從夔韃。漁陽落日下百草。壯心更欲窮河源。安得此馬飛上天。不須萬里遮窮邊。卽看郊祀陳天馬。何減登歌太乙年。

抱琴歌爲鄭露作

嶧陽之桐何泮泮。緯以五絃發清商。一彈再鼓儀鳳皇。鳳凰不來兮我心悲。抱琴而死兮當告誰。吁嗟琴兮當知之。

宣和御墨枇杷圖歌

盧橘蒼蒼黃幹起。故印依稀識天水。風枝雨葉不關愁。慘淡如披靖康史。宣和文物劇風流。繡褫錦罽窮

千秋畫學歲收五嶽觀。圖書盡識太清樓。盛衰轉瞬如飛電。車駝岡上紛刀箭。紫筠花木摧爲薪。西風落日青城殿。此本流離出禁庭。過江千載歎飄零。昔日興亡如在眼。還同麥飯哭冬青。

夜經古城作

我行牛山下。寒墟帶平楚。不見齊王宮。空城半禾黍。疎星耿不明。白楊夜深語。

南園二首

曉起思園林。昨夜西堂雨。負杖眺前山。初陽散平楚。淥池萍始合。芳樹禽交語。庭戶寂無人。慨然念終古。夜雨雜花落。衡門綠苔生。誰能捉坐席。共作林下行。圖荷舒午景。茂林含夕清。歸禽赴斜照。稅駕此山楹。

雨夜與禮吉叔子

高館多梧桐。微雨飛向夕。清談不能寐。入夜轉蕭索。餘香歇幽幌。暗蟲響堦石。夢破忽沉吟。悵然越鄉客。與周量過訪。茗文夜雨共宿。

故人千里別。春草萋已綠。相思南雲端。目盡東海曲。復作帝城遊。乘暇慰幽獨。入門涼蟬鳴。中庭多嘉木。石徑生積陰。蒼苔宛山谷。坐久微風來。雨聲雜深竹。共有滄浪興。復縱青山目。良會誰能常。今宵得同宿。

贈勞山隱者

何許藏名地。秦山海上深。半夜白日出。風雨蒼龍吟。靜侶行道處。不聞樵採音。清冷魚山梵。寂莫成連琴。曉就諸天食。暝棲舊菊林。因知安居法。一契無生心。我亦山中客。悠悠悔陸沉。

夜登燕子磯

渡江訪名山。層巔到曠黑。大江森欲動。浩浩千里色。把炬石燕飛。燃犀潛蛟匿。北望靈巖塔。知是專諸邑。悲慨下沾襟。此意誰當識。

宿弘濟寺曉登觀音巖眺望

擊楫凌滄洲。投宿招提境。入門優曇香。聞鐘夜方永。高枕聽濤聲。層軒抱江影。曉來微雨過。紅葉滿高嶺。憑闌見萬里。雲物殊清迥。長山去蜿蜒。上流壓江郢。海門控金焦。蒼烟翳朝景。信美睇山川。霸圖遞烟冷。何如學無生。抗跡雲峯頂。

寄彭十羨門

蕭寺鐘殘時。燕山霜落夜。對牀語清夕。流連不知罷。落葉一紛飛。離鴻遂南下。激浦近青山。依稀見君舍。半山愛予塞江落潮之句。爲作圖。愚山題詩其上。和答一首。

我昨訪奇登燕磯。潑墨深更遍巖壁。捫蘿附葛不知險。夜踏空江欲崩石。掀髯作畫鹿裘翁。長歎題詩宛陵客。何當結屋圖中居。臥看江天落潮白。

吳季子祠下作

我行延陵城。懷古心苑結。讓德邈已遠。流風緬曩哲。州來季當立。高懷寧詎屑。躬耕表邁志。亮哉子臧節。慕義永無窮。穹碑字難滅。所悲於潛役。國亂相更迭。伍胥進勇士。專諸踐王血。遜位固高義。復命忍臣列。春秋不名賢。書札理當晰。嗚呼三代後。斯風久淪絕。廉節起頑儒。尙論義常竊。縞紵思古人。空祠颯寒雪。

毘陵歸舟

泊船西蠡河。解纜東城路。涼月淡孤舟。遙村隱紅樹。杳杳暮歸人。悠悠渡江去。

招隱寺

筍輿越黃鶴。連岡帶平楚。歷歷南朝松。風吹落寒雨。石楠紅始垂。沙泉碧方吐。遂造戴公山。風氣何清古。山門映殘照。雙泉咽寒嶼。玉蕊不復見。空亭閉荒塢。戴公昔通隱。風流照巖戶。漱泉彈名琴。東巡動人主。清風一銷歇。初地留空宇。金碧漸凋殘。林壑自清舉。蕭條黃葉落。寂歷幽禽語。迴澗起涼吹。經堂罷齋鼓。緬想剡中人。蒼茫久延佇。

自招隱登夾山入竹林寺

籃輿俯高嶺。石磴轉幽谷。諸峯亂空翠。澄江疊輕縠。迴望戴公宅。秋氣益蒼肅。紺壁隱奇杉。危亭蔽荒竹。孤僧遠獨歸。山鳥暮相逐。樹杪見古寺。松栝散林麓。絕壁尙千尋。紆逕非一曲。初蠟阮公屐。逝將訪金粟。暝坐竹林深。山山靜寒綠。

竹林寺

迢迢夾山道。幽幽竹林寺。林公關山處。泉澗饒古意。鐘磬聞諸天。花藥覆平地。森梢萬竿竹。烟景滿空翠。慈鳥識禪心。清猿起愁思。平生江海情。蕭然但高寄。回首禮白雲。何時謝塵累。

林臯和尚塔院觀林公泉

祖堂白雲裏。岌嶷俯林樾。昔人不可見。巖桂花猶發。惟有林公泉。涓涓漾明月。

海門歌

眠峨東下江水長。遠從井絡來吳鄉。奔濤萬里始一曲。古之天塹維朱方。北界中原壯南紀。魚龍日月相
週翔。中流一島號浮玉。登高眺遠何茫茫。長空飛鳥去不盡。江海一氣同青蒼。山外兩峯遠奇絕。雙闕屹
立天中央。左江右海辨雲氣。如爲八裔分紀疆。江流到此一縛束。早潮晚汐無披猖。燭龍曉日出雲海。山
光照耀連扶桑。年來海戍未停罷。峩舸大艦來汪洋。胡豆洲前起烽火。徒兒浦上披襦襠。古聞京口兵可
用。寄奴一去天蒼涼。我願此山障江海。七閩百粵爲隄防。作歌大醉臥巖石。起看江月流清光。

上方寺訪東坡先生石刻詩次韻

昔出蜀岡道。黃葉鳴秋蟬。今來上方寺。綠萼破春烟。坦步寶帶側。延眺隋城巔。古刹龍象寂。殘碣蛛絲懸。
緬思峨嵋人。文采真神仙。贈詩日南使。賓佐皆豪賢。邈然竟終古。漱墨留春泉。老筆欲飛動。妙態殊便娟。
空堂響人語。怖鴿飛聯翩。後遊慨今昔。憑弔當同然。寺有泉名第一

京江夜雪

揚子津邊揚片席。暮角聲傳京口驛。北風一夜江上寒。鴻鶴山頭雪幾尺。去年曾上春秋樓。蘆花楓葉當
清秋。何嘗踏雪三山頂。第一江山萬里流。甘露寺有宋吳琚題榜曰天下第一江山

丹徒行弔宋武帝

曲阿之北京口東。寄奴王者真英雄。新洲伐荻殺龍子。大業遂建丹徒宮。桓家小兒亂天紀。投袂勤王夜
中起。擣蒲百萬皆人豪。龍行虎步非凡理。從茲大運屬彭城。中原趙魏歸經營。硤口千軍五龍涸。籃田一
戰二嶂平。南北推移幾千載。太息雄圖竟何在。宿麥寒原少昔人。神鴉社鼓成空塞。王氣銷殘帝宅荒。悠

悠江水不勝長忠臣徒歎袁開府天命還歸蕭建康。

五人墓

流連虎阜遊宛轉山塘路。石門映迴波。英靈此中聚。滿壇松桂陰。落日青楓樹。生傍伍胥潮。死近要離墓。千秋忠介墳。鬼雄誓相赴。酌酒拂蒼碑。寒鴉自來去。

自光福里入太湖口往聖恩寺

扁舟下西崦。森森入湖口。逶迤鄧尉山。蒼茫具區藪。南來仙靈窟。袁墓號稱首。銅井連青芝。雲錦張左右。七十有二峯。遙矚皆培塿。貝闕敞魚龍。金庭開戶牖。仙壇毛公蛻。古笈靈威守。名境祕聞見。勝遊信非偶。巖罅時合沓。龍氣殊蚴蟉。擊楫泝空明。濯纓遠塵垢。將來萬峰寺。半偈待茗帚。

還元閣聽雨懷太湖

冥冥遙峯雨。黯黯重湖雲。萬壑急懸溜。颯沓聽難分。山中梅信發。香色方氤氳。已蠟阮生屐。將墊林宗巾。身臥百尺樓。心憶五湖濱。笠澤渺千里。漁邨雜鷗羣。園綺緬匪遙。逝當返吾真。

雨中尋米堆山

僧樓鳴鐘罷。徘徊向山路。遠眺米堆山。蒼蒼積烟霧。溪澗窅然深。岡巒緬非故。千重修竹林。一徑江梅樹。花香上寒衲。石流溼芒屨。山靄接湖雲。日夕自來去。迢迢五雲洞。欲問誅茅處。

自米堆山下行至上陽村饒家壩望湖中漁洋法華諸山

杖策信忘疲。行行畫圖裏。崎嶇下雲壑。蒼茫望烟水。石徑何盤紆。疎籬照梅蕊。寥落重湖濱。柴門數家市。

居人太古風。但解數雞豕。語我種植法。敦樸有奇理。雖非角里儔。頗謂桃源比。透迤到湖滬。浩渺歎觀止。震澤控三江。波瀾此方始。法華表東陲。漁洋正相似。烟雨春空濛。峰巒暮俶詭。昨朝梵天閣。遠眺如隱几。豈知方丈山。忽落芒屨底。欲乞五湖長。垂釣將已矣。

晚坐雨花橋看梅

寒湖望已遠。迢迢暮歸寺。修竹隱山門。金碧眩空翠。清溪枕飛梁。花氣增明媚。綠萼紛競發。翠羽時一至。拈花悟禪心。作賦識仙意。高低垂籜條。明滅見湖次。縹緲吹笙人。消搖布金地。微微蓮華漏。蕭然遠塵思。登光福塔望穹窿。靈巖諸山懷古。

昨登擅勝閣。遙遙見湖濱。聚沙矚高妙。珠露高由旬。山趾理歸棹。中流望嶙峋。鈴鐸天際語。獅象雲中蹲。攬衣造峯頂。大千俯微塵。悟彼解脫義。得此清淨身。名山繚四隅。出沒媚烟晨。眺遠跡方遐。懷古情彌辛。采香已荒徑。菱歌尙含顰。館娃一片石。千載爲沾巾。迴身望胥口。落日悲孤臣。

第二泉和涪翁韻

春山細雨三人俱。藤笈親攜桑苧書。縛亭甃石幾年事。至今浣沼噴明珠。山人形穠味道腴。九隴不老將焉如。軍持銅鉢此生畢。買田卽傍芙蓉湖。

木末亭作

曉登木末亭。南望新林浦。烟嵐紛四圍。三山渺何許。旭日麗飛甍。雲物媚晴澗。風景在江山。離宮半禾黍。顧瞻金川門。悲來不能語。惟餘博士祠。正氣留終古。

守風燕子磯

刁騷夜雨打吳榜。三日南風燕子磯。安得滄波如匹練。便乘輕舸去翻飛。長江巨石想飛動。漁燈戍鼓相因依。栖霞咫尺不能到。白下古城春又歸。

憶虎丘鶴澗

清遠道士養鶴處。人去亭空鶴不飛。千古清冷一勺水。至今猶浸白蓮磯。昔遊曾記仙靈語。奇絕白雲翁欲歸。白雲翁欲歸青松忽消半清遠道士詩也

和吳淵穎題錢舜舉張麗華侍女汲井圖

景陽樓上鐘聲止。結綺閣中美人起。百花溼露啼宮鴉。鹿盧曉汲銀河水。黃奴慵起倚隱囊。瓊枝壁月交輝光。貴人夾坐詩先就。狎客擘牋歡未央。玉樹歌闌方競媚。桃葉山前陳鐵騎。青龍飛出建陽門。羣鳥空呼奈何帝。可憐拂檻曉粧時。入井倉皇那得知。千載畫圖猶省識。石欄紅淚黝胭脂。

和吳淵穎題袁子仁巴船出峽圖

桃花夜汎三川水。蜀中估船日千里。錦官城外指東吳。萬里行當自茲始。金牛玉壘向天開。朝雲突兀瞿唐堆。飛流一瞬下萬仞。長年屏息顏如灰。峽中無人但煙霧。杜宇聲悲客行處。巴巫迎神歌竹枝。忽見雲安郭邊樹。上峽懸槿下安流。東風吹送江陵舟。卻從一幅鵝溪上。髣髴三刀夢益州。

葉訥菴自吳中寄予長歌兼示金山見憶之作奉答

昔者我登浮玉山。大江駭浪流潺湲。岷峨萬里在眼底。荆門郢樹浮盃間。彭城蘭陵一朝盡。令我慨歎愁

心顏。此時側望天北極。漁陽莽蕩連雄關。玉堂美人侍帝側。兩年不見飛鴻翼。海內憑誰論素心。夢裏思君見顏色。蒼梧慘淡雲氣深。九疑綿邈瀟湘陰。重瞳南巡忽寂莫。園花陵草俱沾襟。聞道高陵變深谷。卽看碧海飛黃塵。雲霄侍從幾人在。飛蓬落葉愁春心。夫子盛年何婉孌。日夕含香玉皇殿。衆中獻賦欲凌雲。御前騎馬如飛電。卽今蕉萃百不如。落拓江湖復相見。吁嗟哉。人生遇合亦偶然。雄飛雌伏皆可憐。不見東方曼倩號大隱。金門據地歌向天。又不見開元天子盛文藻。隴西王孫稱謫仙。調羹未罷夜郎謫。至今青山采石垂千年。君家况近崑山麓。二陸臺邊結茅屋。放鶴朝從西鹿歸。采蓴夜向南湖宿。感遇終懷國士恩。憂時莫效長沙哭。三山圖畫一江分。何日題詩共夕曛。妙高臺上江如練。南望姑蘇是白雲。

秋日題閔園水亭

南人習烟水。結屋如舫居。眞州水水多。城市通樵漁。一溪納三江。潮汐相盈虛。茆亭碧溪上。浦溼臨前除。曉風斷蒲響。夜露幽花舒。孤雲散天末。好鳥鳴午餘。緬懷華林歎。持此謝簪裾。

同楊西印副使蔡齡若秀才夜登觀音山眺曲阿後湖

我昨南渡登金焦。鯨魚跋浪生風濤。更上君山俯震澤。長江萬里窮秋毫。五日探奇興不盡。曲阿城畔來登高。觀音山高高百丈。星辰羅列捫層霄。懸崖絕磴挂猿臂。崇巒疊嶂森松毛。山巔作亭瞰飛鳥。湖光山色相週遭。練湖一萬六千頃。勢與江海爭迢遙。淵注渟著古所歎。滄桑磨滅非前朝。風景不異謝郎死。我來憑眺凌寒宵。長嘯空山答山鬼。驚飛鷗鷺求其曹。滄波混茫接元氣。有如孟水浮堂坳。冰夷擊鼓百靈集。金支翠羽光飄搖。是時月黑風怒號。萬弩突射錢塘潮。蛟龍夙最時隱現。靈胥慘澹天吳驕。高麗長山

互鈎帶六州。一氣迴斗杓。楊公蘄黃昔。開府坐清江。漢真人豪蔡。生白哲。美無度。頗能飲酒歌。離騷東吳。菰蘆有君輩。力鞭巨石驅神鼉。練塘一勺好。栖托結隣未。卜心空勞。酒闌歌罷意惆悵。烟江明日橫輕舸。

九日與方爾止黃心甫鄒訐士盛珍示集平山堂送方黃二子赴青州謁周侍郎

西風蕭蕭天雨霜。秋高木落當重陽。鷓鴣先鳴蕙芳歇。雁門鴻雁來何方。今我不樂出行邁。西城近對平山堂。歐公風流已黃土。舊遊寂莫風烟蒼。喬木修竹無復在。荒蕪斷隴棲牛羊。劉原父蘇到日已陳跡。况復清淺論滄桑。京江南望流湯湯。北固山高枕鐵甕。蕭公旌旆何飛揚。雲龍直北雲茫茫。彭城戲馬啓高宴。至今邊朔傳名章。孤蓬驚沙振叢薄。哀螢蔓草纏雷塘。從來王霸已如此。牛山何必霑衣裳。與君並坐但鼓瑟。醉倒聊復呼葛彊。樽前聚散况難必。羽聲變徵何激昂。明朝送汝望諸澤。欲趁桓公作急裝。

登文游臺

玻璃江上謫仙人。東來萬里辨峨岷。熙寧元豐不得意。翩然戲弄淮南春。龍圖學士孫莘老。忤權要。祥符宰

相餘王孫。王定國。黃樓一賦軼屈宋。無雙國士推髯秦。少游。四公相逢向淮海。酒酣耳熱氣益振。珠湖三十

六陂澤。高臺下瞰何嶙峋。錦繡詩篇照天地。與臺光景長鮮新。雲烟過眼一飛鳥。黃河曲注江東奔。人民城郭半遷改。此臺屹立當湖泓。惠州儋耳垂萬死。後生望古傷吟魂。何人請籍元祐黨。至今泚額慚安民。豈如此臺好名字。永絕狐鼠芟荆榛。我來遊眺歲幾度。溪毛明信古所敦。遠帆如鳥樹如薺。湖光雲霧相摩吞。嚴冬沆瀣但一氣。大雪片片鋪龍鱗。酌公一語公莫噴。作詩一笑君應聞。末即跋公題太白像語

過汜光湖懷古

嗚呼正德中。嬖豎隳皇綱。華容既遐謫。劉謝咸高翔。談笑誅刑餘。臺閣資文襄。逆濠睨神器。弄兵下鄱陽。勢異北平順。跡同吳淖狂。桓桓文成公。將帥皆龍驤。義旗出章貢。狡童旋已亡。如何萬乘尊。南巡來建康。羅綺照江水。姝麗傾淮揚。誰贖白雲謠。載詠黃竹章。茲湖兩駐蹕。名因翠華長。龍舸與鳳艚。樂哉方未央。膠舟古所戒。遺恨憐昭王。事往二百年。寒波但菰蔣。月暗津鼓急。楓落漁燈涼。緬懷豫且歎。弔古重悲傷。至今泰陵樹。松柏無斧斨。

夜遇陳伯璣卽別

聞君返西江。崎嶇歲將暮。不知秋浦歸。復此吳陵遇。煙暝失漁邨。雪消數江樹。惆悵聞荒雞。別君立前渡。

蘇門行寄劉公猷兼呈孫鐘元先生

劉生俠氣老不除。腰間玉具纓。曼胡目送飛鴻臥西省。晝夢秋水思菰蒲。掉頭一竿清潁尾。琉璃萬頃堆

西湖。憶昨聽爾御風操。山泉挾溜松風呼。黃鵠山頭一握手。戴公往蹟今有無。山中舊約息壤在。相看一

笑言非疎。舊在京師聽公嚴彈御風操。贈詩有與君更作他年約。黃鵠山頭訪戴行之句。壬寅。果相遇黃鵠山下。此事甚奇。濤頭如山五馬渡。酒酣夜別黃公墟。平山堂

上望汝潁。恨無好句追歐蘇。昔與汪琬程可則共槃礴。看君寫作蘇門圖。怪石槎枒樹蕭瑟。醉墨絕似雲

林迂。嘯臺鸞鳳儼在耳。安知嵇阮非吾徒。聞君近散萬金盡。便衣掃塔辭妻孥。山中有鄰德不孤。蘇門先

生今大儒。夏峯邨邊看秋瀑。雲中髣髴開精廬。尋源采藥去不返。空留鳥跡巖間書。廣陵西望連孟諸。倘

逢樵叟一相訊。山中服食今何如。

甓湖舟夜讀渭南集偶題長句

少陵不作昌黎死。大峨仙人落儋耳。渭南老子來堂堂。鬱律蛟龍蟠筆底。半世功名梁益間。拓弦橫稍劍門關。白頭鏡水江湖夢。夜夜山南射虎還。

陸放翁心太平菴硯歌爲畢通州賦

斌媚散花峽。艱危道士磯。放翁過此留清辭。何年片石墮瀟沅。龍堂荒忽蟠蛟螭。先生當年西入蜀。迎風十丈搴黃旗。下牢夔門波浪惡。白鹽赤甲天下奇。轉入興元瞰河渭。山南射虎黃雲垂。大散關頭見烽火。賦詩草檄如星馳。此硯爾時伴戎幕。賢於十萬熊羆師。鶯花海中九年住。春江醉捲千玻瓈。錦官城裏蘋風閣。百觴萬首爭淋漓。此硯爾時廁高譙。飽霜千兔相追飛。先生老矣東下鏡湖支。枕看風濤。但餘此硯共幽獨。猶能起賦從軍詩。紹興淳熙一片石。流傳異代誰使之。曾窮梁益掠吳楚。放翁金崖硯銘中語吾曹想像空嗟咨。畢侯家近覺堂側。草生書帶紛葳蕤。劍南一卷不離手。興來春日吟茅茨。攜渠歸去坐懷古。定有雲霞生墨池。

卞忠貞公墓下作

松柏何蕭蕭。云是卞公墓。背踞冶城顛。前臨大桁路。緬昔永嘉時。流人競南渡。舉國扇清言。作達相矜慕。惟公執鄙吝。嚙蠖畏峰距。一朝荒倉來。旌飛歷陽樹。取節慚王公。種薤笑諸庾。堂堂卞將軍。授命青溪渡。父子忠孝俱。大節光國步。快意溫平南。屢及雷池戍。一戰翦長鯨。鐘簷仍如故。握爪識忠貞。死綬表風素。英爽載雲旗。陟降神靈雨。咫尺袁司徒。異代同金鑄。

宿長干寺

支公邀我宿。清夜開南軒。龕燈照維摩。跣趺寂無言。下簾啓北牖。山夕烟景昏。中夜微風作。涼雨灑林園。宿鳥稍驚起。時聞嘉樹喧。枕簟生夕涼。鑪香歇微溫。勞生疲津梁。聊息應對煩。

六朝松石歌贈鄧簡討

壽陽太史好奇古。邀我來觀六朝之松石。不辭重墊一角巾。此生當著幾兩屐。入門大叫走欲顛。袍笏淋漓狂太劇。蟠根近連瓦官寺。吹香正鄰虎頭宅。蒼皮黛色磨青銅。老幹樛枝拓金戟。蕭梢上摩白日暗。輪困下瞰蒼烟積。千年爲鑿誰得見。已有脂香化靈珀。石勢嶙峋不相讓。元氣盤盤絕繩尺。蒼苔剝盡南宋字。劫火不受陳宮厄。陳叔寶三品石終南太華若在眼。咫尺壺中苦崩迫。誰遣史書宋星隕。將無神受秦鞭斥。晦冥豈非鬼物庭。風雨當防巨靈擘。王謝衣冠失江左。齊梁人代成今昔。建康宮殿幾青燐。此石此松閱朝夕。一物亦荷皇天慈。懷古茫茫百憂集。擊琴欲罷且高吟。謾謾寒風灑巾幘。

金陵曉發

月落驪騎航。潮生鎮西宅。濛濛遠林樹。烟景紛如積。煙際下漁舟。樹杪帶行客。何處金陵思。秋江葦花白。陳生行戲送其年歸陽羨

陳生陳生爾旣不能入淵斬長蛟。又不能登山射猛虎。復不能亡賴作橫苦鄉里。十載哦詩守環堵。徒抱輪困一片心。藜藿鮒鮒相枝拄。昨日渡江來。今復渡江歸。連租船上苦憔悴。風高浪湧橫江磯。朝來寄我新詞句。明月無情蟬鬢去。五湖歸去伴漁竿。楓岸蘆汀不知處。季鷹鱸膾思江東。我亦年年嘆轉蓬。期汝扁舟同射鴨。銅官山下竹枝弓。

江上讀韋詩

彈琴向空江。夜靜見江月。水波正遙裔。河漢坐超忽。五絃泛波濤。餘音散林樾。沙邊鶴唳遠。烟中人語歇。何處楚山青。孤帆遠將沒。獨有韋公詩。托依伴清絕。

蕭尺木楚詞圖畫歌

大江秋老歌離騷。江波瑟瑟風刁刁。怪石巖崕壓崩濤。猩猩歎雨悲猿猱。楚纍一去二千載。使我後死心勞切。鬻桑敗盟西帝驕。商於六百橫相要。武關一入不復返。章華臺殿生蓬蒿。江潭憔悴子蘭怒。蛾眉謠詠羌安逃。長楸龍門望不見。木蘭桂樹棲鷓鴣。騏驎不御愁踟跳。菘菘薺糝申椒。呵壁荒唐罷天問。沅湘西遊魂難招。蕭梁王孫筆僂僂。攀挈顧陸提僧繇。丹黠粉黠寫此本。墨花怒捲湘江潮。湘君夫人降荒忽。國殤山鬼來蕭颺。青楓斑竹染啼血。靈風神雨紛飄飆。酒闌有罷老蛟泣。星辰迹落江天高。

宿弘濟寺

名藍敞積翠。遙夜開禪關。山半聞清鐘。夢覺心亦閑。飛雨灑江介。流雲滿空山。五載復投止。塵勞慚昔顏。黃子久王叔明合作山水圖

有客示我七尺練。云是黃王之合作。粉墨駿蝕神淋漓。巖谷高深氣盤礴。長林巨壑來畏佳。飛鳥流雲去寥廓。空堂白晝生風霆。飛瀑千尋競噴薄。老松撐突夜叉臂。怪石縱橫鵝鶴啄。石稜松鬣若無路。忽向青冥得樓閣。峭壁無梯猿臂絕。天外孤茅誰所縛。滿堂動色神悄然。題字依稀辨黃鶴。吳興清遠鷗波亭。家法賢甥宛如昨。意匠慘澹經營成。范緩倪迂大張拓。富春老人年九十。煙雲供養窮三樂。扁舟訪舊雪川

來。偶從縑素論丘壑。爲添樵徑螺髻旋。遠峯一角空中落。遠人無目樹無枝。妙解通靈失糟粕。吳興富春
幾百年。此意天然殊斧鑿。山人癖如阮宣子。蠟屐猶堪代芒屨。惜無劉尹買山錢。苦向圖畫耽寂寞。此中
三日容坐臥。便擬拂衣永棲託。明年借汝春晝閑。梅老無花竹生籜。

漁洋山人精華錄卷二

古體詩

鑾江大雪歌寄家兄西樵

夜聞鶩發曉濺濺。衝寒四顧江天朗。雲氣欲壓揚子津。濤頭直突仙人掌。平生愛雪勝瓊貝。况復橫江發奇賞。朔風獵獵犯貂裘。急霰霏霏灑烏榜。大澤蛇龍避寒蟄。高天鷗鶻盤空響。江南羣山張畫屏。玉笏嶙峋袤百丈。隔江心馳茅山洞。咫尺波濤絕來往。遙憶茅家好兄弟。驂鸞騎鶴三峯上。學仙不能且學劍。耳後風生致慨慷。西郊大道接符離。霹靂鳴弓穿宿莽。玉腕神騶氣清峻。金毛胡鷹颯蕭爽。雄狐狡兔那得避。雨血風毛灑原壤。橫吹聲中歌竟病。據鞍盤礴真吾黨。歸來一笑臥煙蓬。浙浙江風吹五兩。

南將軍廟行

在泗州南公
霧雲乞師處

范陽戰鼓如轟雷。東都已破潼關開。山東大半爲賊守。常山平原安在哉。睢陽獨遏江淮勢。義激諸軍動天地。時危戰苦陣雲深。裂眚不見官軍至。誰與健者南將軍。包胥一哭通風雲。抽矢誓讐已慷慨。拔劍墮指何嶙峋。賀蘭未滅將軍死。嗚呼南八真男子。中丞侍郎同日亡。碧血爛斑照青史。淮山峨峨淮水深。廟門遙對青楓林。行人下馬拜秋色。一曲淋鈴萬古心。

家兄信宿焦山有寄

聞君游松寥。託宿招提境。佇待江湖生。茶香酒初醒。松風流夕梵。蘿月散清影。暝坐歸鳥稀。晚飯鐘魚靜。昔遊不可忘。夢向焦仙嶺。

焦山古鼎詩同西樵賦

曉入枯木堂。怪禽驚翩翻。清露滴松杪。下見古鼎躡。寶光耀昆吾。中有飛廉魂。上文爲雷回。下文爲雲紆。獐狀饕餮伏。兵氣蚩尤昏。辛壬與丁甲。世次迷夏殷。初疑周虎彝。復惑虞雖敦。尊從不可辨。牛豕誰能論。瑰怪壓繚鼎。譎詭旅紀獻。蛟龍雜蝌蚪。五指不敢捫。在昨想履屨。識字驚蜒蜿。月黑鬼神泣。峽東波濤奔。籀書失趑趄。斯篆摧窺輒。史游久已歿。皇象不復存。不遇博雅流。孰爲洗煩冤。諒比岐陽狩。或同泗水淪。山僧與道古。感激聲還吞。分宜昔枋國。氣勢傾崑崙。斯鼎出京口。上燭光細縑。役使萬指衆。負戴千蹄蹏。大哉宗廟器。詎屑豪貴門。威力鎮禪窟。寂寞歸祇垣。午夜鳴鐘魚。清晝啼林猿。閱人恒沙劫。如彼蝨在禪。我昔訪焦先。望氣矜不言。五年隔揚子。無翻思騰騫。吾兄癖好古。八書探河源。三日松寥游。坐臥忘蹄喧。扁列析螺書。卷尾搜蠹文。作爲奇偉辭。大海溥鵬鯤。春江壯風霆。響激雲濤渾。三嘆繼高唱。海門上朝暉。

送家兄同無言遊吳越二首

挂帆指吳會。雲水空濛間。上已美風景。登臨散襟顏。湘湖葦正滑。應上蕭然山。共訪金庭宅。淹留殊未還。吾家王吏部。江左有高名。五字論詩品。陰何欲比清。偶思鏡湖好。忽作剡中行。輸爾天都子。逍遙訪赤城。上已辟疆招同邵潛夫陳其年修禊水繪園八首

前年曾到湘中閣。閣外天寒水方落。西風颯颯猿猴啾。惜別懷君芳杜若。今來三月青春深。浯溪窈窕桃花林。爲君一曲答欸乃。寫作雲山韶濩音。

碧琉璃上雙玉壺。蘭橈宛轉沿春蕪。未傳洛下羊酪法。且醉淮南櫻筍廚。射雉城中煙景暮。流鶯喚人且須住。回頭笑謝襄陽兒。詎可搖鞭背花去。

平山堂下五清明。甲辰紅橋賦。治春句也。草長鶯飛無限情。不怪老顛裂風景。名園上日相逢迎。銀箏初彈阮初擘。

此夕留髭應十石。春衣明歲杜陵遊。憶汝狂歌拓金戟。

西豪里中訪老友。况復陳生與我厚。辟疆園敞羅羣賢。大兒小兒唱銅斗。烟際鷓鴣一隻飛。吳歌水調欲沾衣。風光如此不成醉。帽影鞭絲何處歸。

陳公家近罨畫溪。溪邊花草令人迷。離墨山中一宵雨。竹雞白鷗相應啼。先生大隱隱城市。萬壑千巖窗戶裏。花朝已過上巳來。日坐蜻蛉釣沙尾。

迴溪綠淨不可唾。碧蘿陰中棹船過。落花游絲春晝閑。獨許先生此高臥。劇憐風物共披襟。蕭然絲竹皆清音。永和三日今千載。坐使清風滿竹林。時出文衡山閣。亭卷同觀。

暮春三月爲水鑿。棠梨葉大山禽啼。田家社酒壓缸面。雪白橙香玉練槌。夜聽醅頭滴春雨。曉報提壺如潑乳。醉鄉大戶百分空。起喚花奴自搗鼓。

銜舄一徑略約紅。地肺疑與朱陵通。沅湘春水蒲桃綠。江籬蘭杜愁烟空。主人少年登嶽麓。祝融蜂頭幾迴宿。七十二峯羅戶庭。日汲湘潭然湘竹。

再泛水繪園看月作二首

林塘自幽映。况復清夜月。輕舟漾浦溆。習習涼颿發。竹深禽響亂。徑僻人踪滅。島嶼已千尋。川涂更百折。月影散水木。光景紛奇絕。孤篷泊煙霜。澄懷抱冰雪。我有素心友。掩關事禪悅。噉粥日消散。觀道離言說。示我秋水篇。邈然寄寥次。遠寺傳鐘魚。空山鳴蜻蛚。流連印渚游。惆悵林中別。修林帶高館。巖壑相因依。水波澹瀟照。雲霞收夕霏。遙遙暝來色。肅肅沙鳥飛。永懷謝希逸。望古歎知希。斯人不可作。朶月扣舷歸。

雨夜懷其年園居

久客春向暮。歡游罷不適。孤館歇清漏。臥聞春雨滴。暗蛩吟幽草。寒燈耿虛壁。念我同心人。咫尺何由覲。雨聲湖上來。蕭條散蘆荻。此時掩關臥。應聽林間笛。

雨登湘中閣眺望

曠望臨清湘。楚天夜來雨。合沓連江湖。空濛散洲渚。野鳧溼不飛。墟落遠堪數。漁榜沿迴谿。停橈飯孤嶼。不見烟中人。但聞烟中語。

詠史小樂府二十四首

望望北邙坂。黃蒿長似人。夜來螢火暗。失路小平津。欲得卿曹拜。何妨破產求。蒲桃原不惡。一斛博涼州。長揖橫刀出。將軍一代雄。頭顱行萬里。失計殺田豐。

祝劔復祝劔。君聽殺。謳歌瓜廬方一畝。漢臘此中多。
生女不如男。所論非英雄。不見龐娥親。殺人都亭中。
太息王髦劍。前年殺孔融。曾言赦雍齒。地下愧袁公。
一作崩城操三軍。且莫哀丹楊。使君婦。衰經報讎來。
可憐卿慚長。陳德何涼薄。不及朗陵公。猶有荀文若。
子義來江左。青州名士稀。大夫死知己。枉用寄當歸。
將相江東美。英風壓上流。魯公最忠烈。慷慨借荊州。
猗兒健如虎。高步跨江東。孝廉殊斌媚。人說紫髯公。
腹痛思前事。分香惑後人。二喬得佳婿。不是洛川神。
赤壁戰堂堂。綸巾繡襦。元戎在何許。顧曲有周郎。
濡須高會日。諸將在轅門。醉袒貂裘看。斑斑刀箭痕。
龍鳳全歸漢。三分指掌中。惜哉雒城戰。失此半英雄。
魯國真男子。關西社稷臣。阿瞞渾自可。滿寵爾何人。
大義辨國賊。吾欽趙順平。寧須法孝直。方可制東征。
足堪加帝股。故態笑狂奴。何如朱盪寇。直捋大王鬚。
邴管持風節。高名合作龍。何人工賣國。老竊博平封。

費公能辦賊。嚴駕且圍棋。賭墅東山者。風流自汝師。
生乞步兵廚。死埋陶家側。一時兩酒人。亦足張南北。
石馬來張掖。公然大討曹。可知北部尉。典午啓塗高。
今年賜劍履。明年假黃鉞。可憐青頭雞。躊躇不得發。
吳漢分龍虎。終憐石子岡。何如綿竹戰。父子死堂堂。

登天闕望金陵懷古

我登牛首山。天闕何屢屨。上造青雲端。下瞰無端倪。
壯哉六朝都。佳麗誠在茲。龍虎氣盤鬱。將相羅雄姿。
緬思赤烏年。爰逮太元時。五馬浮渡江。一馬獨權奇。
桓桓始興公。幕府陳軍麾。懿此帝王宅。雙闕衛京師。
青山似洛陽。大江環四垂。智力邈千載。興廢如奕棋。
江山看不殊。俯仰自生悲。北眺元武湖。蔣山虧蔽之。
博望峙西南。列戍多旌旗。時清異偏安。憑弔將奚爲。
落照橫江流。萬里天風吹。壯心不可已。淚下如綆縻。

龍潭登舟棲霞僧相送

昨朝山中雨。惆悵中峯別。回望上方人。雲嵐但明滅。
龍潭復相送。江晚潮如雪。瀏瀏巖際風。皎皎波間月。
世外本忘情。幽懷無斷絕。終卜僧紹鄰。長茲味禪悅。

淮北晚行寄廣陵故人

南風吹五兩。浙浙乘潮便。綠波蓮浦漲。白露蘅皋遠。
稍看烟景夕。篙師拖樓飯。不見廣陵人。含凄詠江練。

寄宗定九

東原讀書處。夏木紛成結。江湖門外落。烟岫窗中列。誰言謝公埭。復作零陵別。懷中團扇詩。晻此清秋節。分賦得館娃宮送子吉編修歸吳。

館娃宮中花。蘂紅美人白。紵嬌春風館。娃宮中烟草綠。蝴蝶雙飛井欄宿。回首穠華能幾時。羨君一舸逐鷗。夸五湖森森烟波濶。何處黃金鑄范蠡。

又賦得甬里村

笠澤濛濛水烟夕。細雨丹楓浪頭白。先生去後幾千年。角里之名今尙傳。玉堂晝臥夢烟水。卻挂扁舟尋甬里。我亦江湖舊散人。蓴鱸思逐秋風起。

昭陽顧符稹畫棧道圖歌

顧生畫學李思訓。尤工棧道兼騾綱。丹青金碧妙銖黍。近形遠勢窮毫芒。窺斜山色一千里。子規啼處烟蒼蒼。女郎祠邊人跡絕。但見哀猿連臂叫。嘯青崖傍江水如油下。南鄭關道似髮通。陳倉紅氍裏背笠。覆首人物結束疑。唐裝車馬班班入雲際。如蟻緣垤相扶將。秦川渭水望不到。蠶叢直上天茫茫。仰家扇子冰雪色。一莖斑竹磨瀟湘。如何方寸懷褻裏。宛然置我蜀道青天長。揚一益二古天險。譙周嚮國謀非臧。阿瞞四紀作天子。青騾西幸何倉皇。三十年來蜀道塞。况從古史論興亡。因君妙蹟發遙慨。如聽鈴聲替戾岡。

送陶季之潞州

先生昔日登武夷。鐵船峯頭看奕棋。中冠離支三百顆。酒酣自劈輕紅肌。峯頭爛睡忘甲子。坐笑曾孫生

白鬣張帆伐鼓下黃鶴。欲濫三湘窮九疑。披襟蘭臺發高唱。快哉不辨風雄雌。平生名岳屐齒遍。風塵京
雒嗟衣緇。投我奇文浩千頃。蛟龍大澤纏躑躅。謂我四海一知己。譬若莊休從惠施。高齋茗飲坐清晝。風
爐活火分槍旗。我時無事似犀首。酒鱗浮動銀留犁。豐臺紅藥花照眼。驪駒忽告將西馳。壯心猶作驥伏
櫪。適志無如泥曳龜。我聞上黨天下脊。當年潛邱傳臨淄。飛龍荒宮沒烟莽。斷碣髣髴開元詞。紛紛梁晉
夾河戰。鴟兒萬騎陳軍麾。錦囊負矢盛意氣。歌聲慷慨留三垂。時平不用弓箭手。空老昭義千熊熊。戰場
下馬問亭長。鬼燐颯颯寒颼吹。君家草堂臨射陂。門前五柳藏東籬。何時單舸徑歸去。北窗高枕談黃羲。

送朱秋厓歸安宜兼訊陳冰壑

北平太守老不封。身經百戰關強弓。平陵岸頭爾何物。李蔡爲人居下中。昔者應侯未入秦。折脅摺齒難
爲容。一朝西行取相印。故人馬食何匆匆。丈夫不遇且蓬累。古來雄俊將無同。愛汝朱干草堂好。甃社湖
北如吳淞。釣船春入鰕菜市。柴門晝掩菰蒲葦。據梧時復同惠子。上冢聊爾隨龐公。當年我作淮南客。落
帆屢及桃花紅。兒童習見鵝鴨熟。濁醪爲我來牆東。此邦佳士復有幾。稍從湖海知元龍。唱于唱喁樂復
樂。大湖漠漠來天風。自別淮南老鞍馬。筆墨蕭颯如秋蓬。眼明乍喜故交至。劇談往往連晨鐘。聞君此行
意恟恟。五湖春水磨青銅。夢隨白鷗沒浩蕩。覺來目送南飛鴻。歸逢陳鉦相問訊。余方袴褶騎黃驄。

送周量同梁芝五游西山

西山香山妙無比。一道飛泉萬松裏。馬曹自矜能拄笏。不知落汝芒屨底。猢猻藤子青銅堅。爲汝一日窮
緣攀。遙想空山下風露。嗒然坐對開禪關。

膠東張雉畫葛洪移家圖歌

下簾臥清晝。遠夢生羅浮。覺來北堂上。素練橫滄洲。依稀三萬六千丈。風吹絕壑紅泉流。何人攜持雜負戴。全家避地來山幽。先生身騎烏犢牛。丹雞白犬隨行輶。鮑家小女兩丫髻。手把芙蓉居上頭。惠懷之際那可道。萬乘不洗金塘羞。王家寧馨失三窟。華亭鶴唳悲清秋。回首銅駝洛陽陌。名士對泣新亭囚。伏波將軍不受賞。丹砂欲就來交州。大鵬詎可伍鶴鷄。跛鼈坐笑追驪騮。張生妙筆擅黔陬。令我逸興生丹丘。夙昔讀書慕仙意。望而不見中心愁。十年婚宦願粗畢。青鞵快作逍遙遊。刀圭爲我留井竈。此生未作坳堂舟。

送同年袁秋水僉事覲事畢歸甘州

白馬黃金柑。蹀躞思邊疆。河西四郡天。萬里中分弱水臨河湟。漢家天子重邊冊。大開張掖連燉煌。陽關以西盡亭障。屬國一氣通諸羌。遠求汗血歷絕域。玉門使者遙相望。輪臺之悔復何補。弛刑十萬空雄張。首宿離宮待天馬。蒲桃大郡酬伊涼。至今祁連古邊塞。控弦士馬多精強。銜帳雲屯雜回鶻。部落星散延燒當。當年武皇用兵處。傳烽高竝天山長。祭酒布衣諸生耳。虎頭食肉何昂藏。紅鹽池邊開幕府。羌女如花羅酒漿。安西都護受成事。戊己校尉停秋防。使君能令金作粟。使君能使馬如羊。使君今且爲急裝。還報天子開明堂。特賜安車圖未央。五星歲歲臨東方。

傳經堂歌送卓永瞻歸浙西因寄火傳

中原喪亂連天崇。鑿蹄驕馬嘶江東。昭陵玉匣出隧道。鴻都祕策飛秋蓬。小作膳囊大帷蓋。石經三體皆

磨礪卓家世德不可紀。侍郎謀國真公忠。巢傾卵破悔不早。曲突徙薪誰謂功。革除事往三百載。至今花碧干長虹。聞孫抱經隱茗雪。千秋人識梁丘宗。清廟明堂列球貝。深山大澤藏蛇龍。我慕蕊淵生苦晚。晚及孫子相追從。雄才能慮五石瓠。大力欲挽千鈞弓。桓榮稽古累數世。郎君人地將無同。昭氏鼓琴有妙理。誰云竟以文綸終。至尊通經過漢代。會開東觀臨三雍。白虎諸儒考同異。如懸大簾鑿洪鐘。郎君攝衣作都講。雅歌殿上何雍容。野夫窮經不得力。坐使尹季傷瘡聾。他年登堂問章句。五湖帆影隨樵風。侍郎名敬遜國名臣。

述舊贈劉公猷吏部

昔在順治中。天府羅文昌。至尊右儒術。海寓盛詞章。夫子起汝南。高步翰墨場。僕從稷下來。意氣猶蹶張。雲龍歛然合。相逐共翺翔。論文無嘖嘖。結交多老蒼。四海得汪君文程周量。驥首同周行。一臺稱二妙。籍籍董玉虬與梁曰糾。璋射必有邸。玉卮豈無當。窮秋八九月。艸木萎以黃。憑弔望諸君。驅馬金臺旁。風雲慘營平。邊朔多嚴霜。和歌猛虎行。天地爲低昂。時序一以變。良會誰能常。君思潁西湖。歸尋兩歐陽。諸子亦星散。各各之四方。僕觀廣陵濤。時上平山堂。側聞清潁水。嫩綠如瓜瓢。小艇擬舴舺。往往破湖光。別業寄蕪門。水竹紛陂塘。百里見黃華。神工肆皴皴。飛瀑下千尋。灑落層冰涼。熊岳所居處。瑰異不可詳。破衲山水紋。蕭然居士裝。眞江五馬渡。暮雪天滄浪。是時一握手。泥飲傾千觴。豈知十載別。會合仍帝鄉。羣公更翕集。列宿森光芒。翰林蔣虎臣與李湖北。跌宕排天閭。亦有陳子端與吳玉隨。鳳凰鳴鏘鏘。雅歌出金石。高論窮羲皇。夫子正始音。卓爲羣倫倡。僕忝龐公交。時登元龍牀。小春風氣佳。晚菊有餘芳。賓從會西

園絃管羅東廂。援毫申此詞。勗哉毋相忘。

世祖章皇帝御畫渡水牛戲。以指上螺紋成之。賜中官某。臣從黃州通判。臣宋榮得觀。恭賦一章。

章皇握乾符。武功燁旁魄。孚齋

世祖宮中。息之地。

春晝長。游藝瞻圖籍。泉壑窮窈窕。烟雲羅幽蹟。寶繪賜近臣。

往往等球壁。常從青箱堂。

禮部尚書王公第。

奎藻觀赫奕。營丘及河陽。到眼堪一擲。想見憂勤暇。勝情寄山澤。戲

作渡水牛。生態妙盤辟。肉怒垂星圓。筋突陰虹直。脰似滿黃鐘。角堪扣白石。彈指九牛毛。森疏如刻畫。水

波稍演迤。浮鼻未沒脊。髣髴綠楊風。掩映春蕪碧。神武十八載。文教洽重譯。干戈與弓矢。包用黃牛革。小

雅廣宣王。爾牛何濕濕。旆旗牧人夢。考牧周官職。應知翰墨餘。與世登衽席。龍髯去已遠。謳思徧荒僻。雲

漢爛天章。典謨布方策。聖主念紹庭。率由正無射。小臣沐皇風。流涕記飛白。

爲宋牧仲題林良宮娥望幸圖

杏華春水圍宮纈。宛宛鵝羣白于雪。林良好手二百年。犀軸飄零見奇絕。太平內則徧閨禱。宮漏迢迢響

夜籤。何處離宮三十六。金羊空望竹枝鹽。

送楊鄂州職方奉詔安南

于闐玉帶橫腰身。猩紅袍蹙金麒麟。使者青霄下千仞。旌節遙臨日南郡。日南郡縣古交州。唐家都護天

南頭。大長叩關奉朝請。比于佩印爲通侯。咫尺高平亦王土。誰使穴中鬪羣鼠。要令萬里靖烽烟。先見兩

階列干羽。楊郎意氣不可當。談兵畫省神揚揚。雄才常擬略印笮。壯心更欲規河湟。此去烏蠻過銅柱。曾

是伏波用兵處。卽看金馬獻彤庭。不用飛鳶愁毒霧。朝來祖帳城東門。羣公冠蓋如雲屯。虎頭食肉志亦

得新婦帷車安足論。

送米紫來令建昌

南風吹船健如鶻。一月飛渡西江灣。名流正得山水窟。雲中五老玉孱顏。畫禪書聖兩無敵。官閑潑墨東林間。風流海岳菴中客。直取廬山作硯山。

晨起爲錢宮聲題長橋烟雨圖

松枝麈尾壁角懸。桃笙火出晝不眠。長安五月旱太甚。自郊徂宮空告虔。昨宵新涼生枕簟。五更簷溜聲奔泉。大江萬里瀉春漲。濤頭泛泛何瀟瀟。豁如毛摯去酷吏。身傅兩鬮思騰騫。坐憶江南此時節。流水決決鳴稻田。錢郎打門送急遞。鼠鬚煤尾交雲烟。青松短壑妙結構。高厓巨瀑紛鈎連。長橋烟雨更奇絕。空濛似欲無山川。溼篷折疊絳掠水。高泥曲岸相蝨緣。江南舊遊入夢寐。彷彿五湖春水船。錢郎自號五湖長。此圖日在衡門邊。胡爲款段來長安。披裘帶索履後穿。我欲與君同扣舷。青囊篋笠隨長年。詩成閣筆一笑粲。簷前急雨衝澗漩。

愁霖行

涓灘之歲陰氣凝。愁霖不絕如貫絙。江星動搖陽景匿。蝦虹閉藏潦霧增。玄駒戴粒蟻封穴。白躡涉波豕出。繒帙台變節百草死。縱有執扇須何曾。立秋八日又七夕。不見河鼓低玉繩。肅時雨若哲燠若。此事無乃非休徵。今年災異亦太劇。延慶旱魃嗟頻仍。太白失舍晝不入。白晝夜見生芒稜。左輔銅龍翻地軸。川竭水涌騫高陵。我讀劉向五行說。天意人事如相乘。溟梁之會書地震。龍鬪于鄭梁山崩。吁嗟盛世詎有

此胡爲變易違其恆。何時扶桑日東升。重霾一掃天宇澄。野人爛睡曲兩肱。晨炊不復愁薪蒸。

送吳天章歸中條山

月始在房羣陰終。凍禽塌翅啼酸風。呂生置酒邀我飲。清歌笑倚商玲瓏。朝來宿醒臥未析。吳郎告我歸河東。北風雨雪滿天地。層冰千里高穹窿。行人鞍瘵手指墮。狐裘嗟汝胡蒙茸。長安甲第高入天。馬蹄動地聲隆隆。漿酒蠶肉不足道。金玉磊砢堆堂中。汝詩千首文百軸。滂塗未拔誰相通。汝家王官谷中條。青濛濛。藤蘿相糾水相激。至今猿鳥悲司空。汝歸讀書甘菽菹。致君堯舜會有日。飛伏詎辨誰雌雄。

雙劍行孫退谷侍郎席上作

其一魚腸其一有銘云吳季子之子永寶用劍凡九字

延陵季子不忘故。千金之寶帶丘墓。我聞此語餘千年。何來虎氣騰重泉。天精下觀閭兩伏。雷公擊囊蛟龍纏。古綠光射人。瓜皮出土爭新鮮。錯落黃金書列星。明滅蒼浪天五步。殺一人。易如削豚肩。又有古魚腸。形製殊蜿蜒。貫甲洞胸不濡縷。立戟交軼如浮烟。幽州十月風折綿。雪片墮地飛烏鳶。是時看劍夜置酒。快若渴驥奔長川。勾吳舊事足感激。悲來清淚忽潺湲。延陵已蹈子臧節。誰令窟室生戈鋌。太湖魚豕事亦逆。蘓臺鹿走今誰憐。縛諸要離匹夫耳。屬鏤之賜吾悲焉。孫公八十目如電。博古直擅歐劉前。爲公作歌驚四筵。烏尾畢逋河漢懸。燈明酒盡雪亦止。回看劍氣相騰旋。

雪中寄宗定九東原兼呈西樵先生

一冬不雪春融融。江海岸柳俱空濛。黃紬衾暖睡初足。起看窗紙何瞳矓。蠻奴失喜縛雙帚。走報玉戲勞天公。開門三寸沒階砌。拂空六出縈簾櫳。舟膠浦凍人跡絕。天色慘慘雲而風。銅餅筑響蟹眼沸。地爐火

燕獸炭紅。古人昔寄東原圖。漁灣窈窕橋梁通。駛雪固佳霽亦好。艸堂正與圖中同。蕭晨畫雪復好手。能以粉墨摹虛空。前年幽州大風雪。馬毛如蝟鳴雕弓。白檀山高鷹隼疾。狐兔殺伐無留蹤。故人再寄蕭郎畫。寒江釣雪推烟篷。展看忽憶東原客。醉吟禁體追穎翁。適客江淮意不樂。悵望百里無由逢。何當笞笞挂驢背。踏雪直過東原東。

題施愚山賣船詩後

國家急廉吏。將以風百寮。如何十年來。吏道紛吳敖。哀哉此下民。鞭朴分安逃。魯山與陽城。斯人竟難招。江西飽亂離。白骨填蓬蒿。石田廢不治。遺黎襟山魈。一二老寡妻。焚焚困征徭。昔者數守令。爲政嚴風飄。峻令盛誅求。細不遺齟齬。金玉競輦致。樂哉共宜驕。憲府前上壽。鞠臆一何勞。公堂侮下民。意氣一何豪。寡妻哭向天。血淚埋荒郊。亂後幾子遺。乃以資汝曹。是時宛陵公。持節吉臨交。爲政貴簡易。潔已先清脩。放衙苔蘚淨。飛鳥營其巢。賦詩彈子嶺。慷慨同石壕。白鹿與青牛。斯道誰鼓棹。公獨奮百世。阜比陳唐堯。廉恥存綱維。義利窮毫毛。蘭芷變荆棘。孔鸞革鷓鴣。汝曹卽不仁。寧終肆闕虓。七載一舸歸。無物充官艘。兩郡萬黔首。留公但號咷。讀公賣船詩。中心何怱怱。填膺抒此詞。庶以備風謠。他年韋丹碑。會見留江阜。翹首望宇中。烟火尙蕭條。安得百施公。爲得激頑澆。

吳歷修竹吾廬圖爲汪季用題

讀書茅簷下。樂於奉朝請。磻邊清淺流。屋後檀欒影。借問輞川人。何如斤竹嶺。

送愚山遊嵩山

夙昔山水懷。夢想嵩陽寺。先生江海人。蕭條自孤寄。寒潭漸收潦。華林起涼吹。落日下輾轅。青山帶行騎。褰衣涉清潁。羣峯亂蒼翠。二室秋崢嶸。三花未顛顛。卻尋盧鴻宅。巖扉饒古意。窈窕玉女窗。投壺或一至。煙中眺龍門。伊洛宛相次。古人去已遠。山川見標致。安得方外遊。從君共題字。

初春四日休沐同荔裳方山西樵往西山道中作

遙山雁齒列。遠水魚鱗波。朝朝國西門。馬上呈嵯峨。卻掃閉簾閣。幽夢紛陂陁。坐羨雲間禽。歸飛向巖阿。上春寡人事。勝侶事來過。望山馬注坂。投林鳥驚羅。行行近磊砢。清暉一何多。豈識絕塞山。娟靜如媼娥。禽夏如可期。遑復知其他。

香山寺月夜

明月出東嶺。諸峯方悄然。殘雪尙在地。掩映西齋前。竹色旣閑靜。松陰媚淪漣。清暉一相照。萬象皆澄鮮。此時憇寂者。宵分猶未眠。

觀祕魔嵯至龍潭作

山行逐壟若。徑轉無人迹。亭午踰高嶺。逍遙隨所適。古寺披荒榛。乍到如有獲。盧師晏坐處。猶存澗邊石。石上留孤松。終古不盈尺。地僻山鬼鄰。鳥下蒼苔積。孤閣臨寒溪。林壑莽蕭槭。灌木紛相糾。陰厓互崩坼。何當秋雨時。驚湍若潮汐。來此十日眠。濯足蛟龍宅。

晚望翠微寺

澗西翠微寺。迢迢翠微裏。蒼茫采樵路。似有微鐘起。山風冷炊烟。斜日亂溪水。紛紛飛鳥還。行人去何已。

登石景山浮圖絕頂眺望

浮圖茲山頂。峻嶒插孤標。千盤歷詰曲。直上凌風颿。寒空稍明淨。百里見纖毫。茫茫塞上山。浩洶連波濤。渾河盪山來。石壁如動搖。咫尺居庸關。鳥道迴青霄。上谷接雲中。設險非一朝。聖代享障空。丸泥罷函殺。關門開落日。士馬無矜驕。迴身望漁陽。城闕何寮寮。薊丘植汶篁。遺烈思燕昭。望諸與騎劫。智勇皆蓬蒿。朔吹揚驚沙。屯雲盤怒鵬。慷慨一傷懷。覽古心鬱陶。逝將御冷風。揮手辭塵蹻。

碧雲寺魏閣葬衣冠墓

恭顯坐中書。能死前將軍。赤伏盡鈎黨。禍始誅李雲。讀史長太息。閱彼漢運屯。我來西山遊。極目多丘墳。何人穿復土。雙闕高嶙峋。天祿與辟邪。夾道紛錯陳。大書復深刻。似欲驕千春。冢中玉蟾蜍。變化亦有神。豈知窮奇骨。不得安窆窆。牢石與五鹿。彈指隨颺塵。嗟哉陽司隸。毅魄爲青燐。狐貉同一丘。無事勞沾巾。松風催落日。泥飲當千巡。西望咸陽原。石馬嘶荆榛。

臥佛寺

清晨越南澗。畢景來東林。石徑入幽閭。稍聞鐘磬音。禪房鳴腳古。別院杪權陰。春夕月復佳。微雲滅遙岑。山氣自蒼鬱。天宇亦森沉。道人澹相對。松風灑衣襟。夙懷清淨退。因識妙明心。寂寥無可說。請君張玉琴。

晚入退谷卻寄孫北海先生

谷口遠烟暝。水石起寒色。西溪有歸人。東峯隱餘日。積雪封巉巖。微徑雪中出。殘冰流復斷。暗泉聽還失。不知荒寒中。前峯去安極。稍見殼棘牛。悵望歸飛翼。侍郎昔掛冠。於此散愁疾。畫壁滄洲圖。有故友陳路若畫壁結屋

雲林側溪南萬竿竹歲久漸衰密爲述淨名意更就支公室慙歎解巾非何年此棲息。

故明景帝陵懷古

金山南臨裂帛湖。荒陵十里鶴鷗呼。奪門事往二百載。行人過此猶歛歔。紅牆剝盡古瓦落。莓苔留雨生銅鋪。老松離立色枯槁。但穴蟲蟻餘根株。敢塗龍輻禮本殺。矧乃劫火經樵蘇。咫尺天壽雲氣接。坏土獨葬西山隅。洪宣老臣稍凋喪。國成一旦歸刑餘。勃鞞之問史所貶。詎有宦寺干征誅。黃沙慘澹鼓聲死。萬乘一擲成壘俘。國有君矣社稷重。孫申謀鄭無差殊。白登城南翠華返。錢塘司馬功難評。紛紛南渡議和戰。乃知計左非良圖。同寅之占信奇中。朝衣東市嗟何辜。劍南歸來西內閉。唐家父子輸廐奴。處人骨肉事非易。子臧季札今則無。功罪千秋有特筆。九鼎一髮須人扶。謚同泉鳩理太酷。紀年猶幸無革除。裁令流水良亦足。寧論玉匣還珠襦。欲落不落夕陽下。弔古且復留斯須。殘碑滅沒牛礪角。石甕橫臥蒼髯鬚。君臣一代盡宿草。雍門太息當何如。

玉泉

蕭晨金山下。濯纓玉泉水。十畝清瑤流。分明鏡相似。金膏時掩映。碧玉相傾委。水荇隨風翻。靡靡映清泚。垂楊夾碕岸。其下多芳芷。流爲裂帛湖。宛若昆明裏。湖上多漁村。網罟集沙尾。宣宗昔遊幸。龍舸茲山趾。當年功德寺。荒涼嘯山鬼。何況芙蓉殿。遺跡皆銷毀。碧水自東流。彌傷人代駛。儻逐五湖舟。去問鷓夷子。過金魚池懷愚山。因以寄答。

昔君振遙策。獨往嵩山中。還歸陵陽下。高詠北樓風。舊榭苑苔迹。清池銷蕙叢。聊憑一書札。緘意向飛鴻。

計甫草至得若文展成既庭書

芳序竟荏苒。別離年歲多。綠陰散林樾。首夏氣清和。懷人罷琴酌。思往屬流波。還欣松陵子。步履一來過。

雨中懷彭羨門因示葉訶菴

夏雨忽芊眠。流雲度高閣。簾幙數禽鳴。綠陰一花落。相思武原子。遠寄羊城作。文酒昔歡娛。別離今寂寞。年時易晼晚。壯歲風驚擲。何當一樽酒。共對成斟酌。

井陘關歌

迴星城邊落日黃。西來氣欲無太行。柏巖雙壁稍狡獪。目成已覺心清涼。天公一夜送寒雨。千疊萬疊雲錦張。丹崖翠壁竊萬狀。瑰奇娟妙難具詳。綠蘿蕭蕭罽巾角。石瀨颯颯漸去聲。衣裳峯迴徑絕不知數。豁硤倏見開中央。戍樓旌竿滿雲直。橫亘長城環巨防。冠山子城瞰窮漠。噴壑巨瀑聞雷硠。登樓顧盼豁胸臆。四山雲氣爭飛揚。蛟龍鬱律起眼底。散爲霖雨周八荒。關南石勢更奇怪。亦如突奧連堂皇。懸車束馬那可度。行人緣棧如秋秧。幽井澤潞此天險。飛鳥欲過愁翱翔。聖代卽今罷烽燧。空餘畫角吹嚴霜。乃知地利未足恃。此關幾閱諸侯王。

壽陽驛題韓文公詩後

天寶昔喪亂。率干及阿瑩。扇禍始漁陽。流毒被河朔。辛苦九門戰。堂堂李與郭。滋蔓逮三鎮。世守恣兇虐。軍中立留後。諸藩擅官爵。山東勁兵處。縣官實自弱。元和聖天子。咨相授方略。淮蔡泊淄青。次第就東縛。移兵壓山東。勢如掃秋籜。遺恨功未成。殺機生魏博。庭湊何么麼。跳梁敢弗恪。偉哉昌黎公。談笑狎巨鯨。

我行過壽陽遺詩猶昨。韓愈殊可惜。朝廷乃大錯。真卿與巢父。茲事詎堪數。誰與秉國成。蛾眉竟謠詠。杜牧有罪言。千秋實良藥。

介山

驅車綿上聚。懷古綿上田。授璧事已遠。遺跡今虛傳。晉國昔多難。公子實大賢。五蛇爲之輔。一蛇獨耆乾。身隱竟焉文。狐趙羞比肩。逃榮誼固高。報德理亦然。徘徊望忌坂。落日無寒煙。何人貪天功。嗟哉南內年。

首陽山

峨峨首陽山。迢迢屬雷首。遙揖巨靈掌。近對風陵口。蒼茫河上舟。搖落關門柳。一詠採薇歌。昔人復何有。

河上寄山史

前年君往蘭谿道。金華洞中拾瑤艸。傳來八詠似休文。愛翫新詩愁絕倒。華陰古道接弘農。一望秦山深萬重。遙看青壁孤雲起。知在西南第幾峯。

拜楊伯起墓道

悠悠關內路。驅馬桃林塞。歸鳥岳祠邊。長河遠天外。大鳥下潼亭。落羽今猶在。夕日薦蘋蘩。愁心逐征旆。

渭橋懷古

秦川夕澄霽。豐水明如練。西上中渭橋。颯然秋氣變。嬴政昔構造。作此象天漢。美人與鐘鼓。流連恣荒晏。徐市期不來。山鬼壁已獻。我昨驪山行。徘徊弔中羨。荆榛蔽銀海。樵牧羅金雁。麒麟折其股。冷落青梧觀。後代復何王。繡嶺明珠殿。唯有終南山。興亡幾回見。

望華山

關中八水匯。清渭獨朝宗。黃河西北來。交會船司空。河流挾底柱。岳勢分弘農。山河兩戒首。氣壓殺函東。金天正肅殺。屹然白帝宮。削成五千仞。真宰散鴻濛。及關見岌巖。元精羅心胸。倏忽雲氣生。西接終南峯。諸峯忽已失。俯首趨河潼。峨峨司寇冠。獨立青雲中。蒼茫望三輔。秋氣去安窮。荒唐秦皇臘。寂莫希夷蹤。何當駕白鹿。還共騁茅龍。

鳳嶺

南岐地何高。鳳嶺踞其右。路絕無鈎梯。直上若懸溜。日月互蔽虧。光明錯昏晝。雲霧四蕩瀟。雷車中雜糅。飛龍何衙衙。天矯出巖竇。俯瞰兩當水。奔流下騰湊。轉石類搏棧。畫沙成篆籀。初疑饑蛟蟠。更作外蛇鬪。聞昔周文王。盛德及靈囿。鳳鳥此來集。世遠事悠謬。末季重邊防。戎馬幾馳驟。秋風吹散關。一夕驚老瘦。

柴關嶺

早發陳倉道。馬蹄亂雲霧。行行到柴關。雲低雨傾注。裘徑中槎牙。幽篁四森布。大石立當關。勢如猛虎踞。世無飛將軍。磨牙爾何怒。蛟龍喜昵近。氣奪生憂懼。怪鳥時一啼。聞聲不知處。黑江遠瀕洞。萬瀑齊奔赴。頗聞紫柏山。仙靈所遊寓。石髓儻一逢。白日生毛羽。誰使野鶴姿。氈毼隨籠箴。真宰不可問。更向蒼茫去。

馬鞍嶺

南下畫媚關。遠色疊諸嶺。蚤緣百里間。斷齧蔽光景。蹇噓疲登降。織路亦修整。或厂如連軒。或植如負屏。或如歧陽鼓。或如宛胸鼎。如鳥或跂翼。如魚或骨鯁。殊狀紛角逐。詭類爭一逞。峭岸勢欲坼。捷足不遑騁。

二分垂在外。趾壓後人頂。飛瀑時界道。赴壑力逾猛。人與水鬪爭。心目各相警。天意限雍梁。設險有斯境。君子履忠信。小人懷僥倖。永念垂堂言。乘危更三省。

觀音碣

本名門王編買中丞改名壁上
有宋荔裳賦棧石平歌沈繹堂書

觀音碣險絕。連山列天仗。奔峭洶波濤。大石蹴龍象。造物鬱磊砢。及茲乃一放。急瀑何砰訇。盤石成巨防。渟爲千丈湫。潭潭不流宕。怪物中屈蟠。豈無鎖細壯。儻燃牛渚犀。窮此精靈狀。頗聞賈中丞。於此鑿疊嶂。故人推沈宋。詩筆各雄長。星宿森光芒。虬龍怒倔強。解鞍苔石滑。高歌一神王。更須巨靈手。運斤出天匠。鑿我郁閣銘。敵彼小海唱。

七盤嶺

七日行凌斜。目瞶耳亦聾。濁浪崩崖垠。征衣碎蒙茸。不知天地濶。詎測造化功。岌然土囊口。雞幘摩蒼穹。磴道上七盤。大翮排天風。絕頂忽開豁。白日當虛空。褒水出谷流。漢江繞其東。巴山跨秦蜀。蜿蜒連上庸。川原盡沃野。天府如關中。橘柚鬱成林。稻苗亦芄芄。襄陽大編來。千里帆檣通。當年號天漢。運歸隆準公。將相得人傑。驅策芟羣雄。一戰收三秦。遂都咸陽宮。智勇久淪沒。山川自巔崑。跋馬向褒國。日落烟濛濛。定軍山諸葛公墓下作

高密起南陽。文終從去聲。高祖暴繫本見疑。數岷亦非武。堂堂諸葛公。魚水託心膂。二表匹謨訓。一德追伊呂。視操但如鬼。畏蜀還如虎。嗟彼巾幗徒。與公豈儔伍。紫色復蛙聲。抵隙各爲主。火井方三炎。赤伏更平聲。典午志士恥。帝秦祭器猶存魯。陰平一失險。面縛忘奔莒。知公抱遺憾。龍臥成千古。峨峨定軍山。悠悠

悠沔陽潏鬱鬱冬青林。哀哀號杜宇。耕餘拾敗鏃。月黑聞軍鼓。譙侯寧足誅。激昂淚如雨。

五丁峽

南窮石牛道。崑崙下雲棧。三日招我魂。足蹕目猶眩。豈知東蒼州。耳目益奇變。始過金牛驛。樛嶸已凌亂。漾水從北來。劣足泛鳧雁。舉頭嶓冢山。峨冠倚天半。大哉神禹功。從此導江漢。漸入五丁峽。譎詭駭聞見。斗壁何獐狎。十萬磨大劍。攢羅列交戟。茫昧通一綫。亂水般峽中。蛟蜃喜瀾汗。仰眺絕圭景。俯聆覓雷抃。九鼎鑄神姦。到此百憂患。東方牧犢兒。竟使蠶叢判。我行忽萬里。風土異鄉縣。身落大荒西。終賴皇天眷。咄咄復何言。艱虞一身賤。

夜至黃壩驛短歌

氐道森沉十日雨。石林冥冥斷行旅。洪濤般地四山動。百折盤渦噤難語。前有蝮蛇後豺虎。紅鶴哀號奮毛羽。吾生胡爲狎此曹。命輕如毛爭一縷。妻孥飄泊寄京國。欲歸不歸在何所。鄉關迴首四千里。縱有苦辛誰告汝。

朝天峽

朝登嘉陵舟。日出羌水赤。履險倦鞍馬。卽次亦稱適。黝黝雙峽來。窅見巨靈跼。嶄巖無寸膚。青冥厲雙翮。陰崕積龍蛻。跳波畏鯨擲。往往壓人頂。駭此欲崩石。洞穴峽半開。兵氣尙狼籍。蛇豕據成都。置戍當險阨。至今三十年。白骨滿梓益。流民近稍歸。天意厭兵革。會見餐盧人。燒畬開确碯。慷慨一扣舷。浩歌感今昔。風便黎州城。茫茫波濤白。

龍門閣

衆山如連鼇。突兀上龍背。鱗鬣中怒張。風雨晝晦昧。出爪作之而。神奇始何代。亂水趨嘉陵。波濤勢交匯。萬壑爭一門。雷霆走其內。直跨背上行。四顧氣什倍。夕陽下岷蛾。天彭光破碎。咫尺劍門關。益州此絕塞。子陽昔躍馬。妖夢成俗儼。區區王與孟。泥首終一概。李特亦雄兒。僭竊竟何在。

桔柏江

小舟飛青鷁。西掠馬鳴閣。閣道凌天關。稍幸息腰脚。茫茫雙江來。抱此益昌郭。荒城豺虎多。殘堞出叢薄。國憶苴侯開。江疑鼉靈鑿。武都地勢高。衆水競流落。分道下氐羌。兩川乃磅礴。鳴水迴驚瀾。陰平劃大壑。仇鳩勢未夷。犀牛道彌惡。千里會葭萌。崩騰似相索。潏潏竟同流。西逝連井絡。九十九峯間。迴首一錯愕。

天柱山

朝出元武門。雲垂雨忽凍。登登天柱山。千盤墮瀕洞。崢嶸逾巴閬。槎牙過秦鳳。陟嶺如累棋。下谷如入甕。心俯尻益高。足縮目先送。敢嗟鳥獸羣。稍喜徒旅衆。我有大羽箭。麗龜輒命中。於菟昂其首。飲羽乃不動。道旁松合抱。巨可任梁棟。惜哉野蔓纏。不蒙匠石用。絕頂見岷山。青城亦伯仲。一氣連諸蕃。三州實西控。太平幸無事。左髻時入貢。念彼松姚戍。坐甲苦饑凍。俯臨陸海雄。仰視天宇空。長嘯千仞岡。出險忽如夢。

漁洋山人精華錄卷三

古體詩

眉州謁三蘇公祠

祠即故宅今爲眉山書院

墓頤山色腴不枯。玻璃江水如醍醐。眉州城郭劫灰後。水陸漠漠成榛蕪。郵亭下馬詢老卒。蘇公故第城西隅。旋來東帶薦蘋藻。辰良何必煩神巫。往者此地鐵腳亂。

顧治初。有賊據眉。號鐵腳蠻。

高門大宅皆焚如。此祠巋然

誰所作。維公大節驚頑愚。雙柏輪困滌霜雨。廷立冠劍古丈夫。長公遺像龍眠筆。馬券剝落涪翁書。

祠有石刻

龍眠畫東坡像。顧濟贊。又坡書玉鼻驛券。山谷有跋。

殘碑插笏尙林立。紫藤碧蘚纏龜趺。祠西一水最蕭瑟。經霜菡萏猶扶疎。甘蕉

十丈覆簷露。落花亂迸紅珊瑚。當年結構不草草。要令咫尺成江湖。故園如此不歸老。與人家國徒區區。瓊儋雷藤歷九死。口甘熏鼠隨猿狙。頭綱八餅有何意。桄榔萬里非吾廬。兩公神靈未磨滅。應翳白鳳遊

清都。遊戲下界亦聊爾。鯤鵬豈必捨枋榆。眉州玻璃天馬駒。

陸務觀詩句。春眉州。酒名。

玻璃。酌公三酬公歸乎。

登高望山絕頂望峨眉三江作歌

四海復四海。九州還九州。河伯海若更相笑。蟪蛄何足知春秋。今年辭帝蓬萊宮。乘風偶作西南遊。中條姑射不足數。失喜太華揚高旒。河潼遠壑巨靈跖。鉤梯百丈臨龍湫。終南太白幻雲物。秦棧詰曲哀猿愁。

錦城小住五十日。岷山秀色垂簾鉤。青城玉壘尻首接。灌口屈注雙江流。興極欲踢大峨眉。卻騎瘦馬來。龍游嘉州。罨畫枕江上。孤峯縹緲東南浮。神霄玉清有遺跡。登臨可以消煩憂。踢泥盤盤到絕頂。江山披豁開雙眸。峯巒八面簇金碧。下瞰江海如浮漚。八十四盤在衣帶。氣凌五嶽驕公侯。暮雲早雪忽明滅。兜羅綿現無時休。岷江從東來。奔騰迴萬牛。沫水匯青衣。簸蕩千斛舟。三江九峯條然合。丹崖翠嶂窮雕鏤。江山奇麗冠天下。何意絕景來蠻陬。天風蓬勃日西墜。搔首欲去仍淹留。荆吳萬里自茲始。來朝起柁尋巴丘。

敘州流盃池瀘州使君巖皆山谷先生舊遊都不及訪悵然賦此

憶昨登凌雲。江邊蹋亂石。興劇罷鞍馬。逍遙散輕策。徑危草露多。處處見虎跡。東林雨新霽。初日射青壁。浩蕩三江流。安穩平如席。西笑揖峨眉。遙連雪山白。酒酣掛帆去。矯若生羽翮。心知流盃池。遺跡在巴剌。俗物敗人意。交臂輕一擲。今日使君巖。南望還咫尺。通詞託微波。塞修空脈脈。平生一瓣香。敢爲涪翁惜。如何萬里遊。虛此幾兩屐。迴首望南雲。蠻江日將夕。

西涼神祠曲

在合江縣。苻堅時呂光討李馬之亂至此。土人祠之。盛務觀詞詩我雖不識神。知是山水人不敢持笏來。短褐整幅巾。似未詳本末。賦詩正之。

長安氏王頭有角。東掃鄴宮西定蜀。西域校尉婆樓兒。勒銘直到岷山腹。功成振旅咸陽中。萬里玉門旌旆紅。三十六國拜都護。酒酣作賦龜茲宮。甲乙讖成苻氏滅。魚羊食人日流血。黑龍晝起姑臧城。坐制三河亦人傑。少岷山下岷江流。西涼廟貌凌高秋。山頭龍出作雲雨。神靈雜沓風颼颼。烟消雨散渺何許。靈欲歸兮憺容與。船旗獵獵西北斜。落日陰房竄蒼鼠。

岑公洞

岑公昔學道。遺跡空山中。洞門界飛流。白日生雷風。石髓無古今。鍾乳盡玲瓏。巖泉日穿穴。點滴成窪窪。中央若累棋。狡獪造化功。頽窳倚青壁。中夜丹砂紅。睠彼遺世翁。於今悟參同。壁間題字人。歲月何匆匆。巨碑亦笏立。文詞競豪雄。中間岑襄州。頗擅語句工。豈其南陽裔。源流故難窮。此洞與魯池。望望江流通。昔是仙靈宅。今為豺虎叢。太息下山麓。風健孤帆東。
元符間岑巖起象求廣鑿真人贊一碑李
鷹文叔所書岑洞魯池今皆為侯家所有

登蝦蟆碛

黃牛打鼓朝發船。碧波白鳥爭清妍。迴首名山大川闊。鳥尾已振西陵煙。三峽欲盡尚迤邐。云十二碛紛鈎連。頗聞中有第四泉。康王谷水差隨肩。峽窮碛轉詫奇事。忽見飛瀑流琤琮。爬沙終古此巖側。青冥無路誰夤緣。江風吹笠冷毛髮。峽雲挾雨鳴船舷。大索瓶裘貯飛雪。旋去屐齒窮危巔。橫斜拾級一徑上。藤梢槁刺相糾纏。皴炮槎牙澀苔蘚。清泉百道爭涓涓。陰洞終古闕白日。神漢噴薄鍾乳堅。石壁蠹惡艱龔錯。題名豈辨唐宋年。永叔涪翁詩不滅。誰為好事重鉛鐫。名山蒙頂壓顧渚。
蒙山茶出蜀山縣 春芽開裏勞烹煎。
山谷詩。巴人漫說蝦蟆碛。試囊春芽來就煎。 下巖轉舵未忍去。下牢關外斜陽懸。
昌黎詩。爬沙脚手鈍。誰使汝解緣青冥。

欲訪三遊洞不果

舟下十二碛。西陵遙在目。江雲峽口多。碛轉猶千曲。悵望三遊洞。靈異非一族。石鐘臥蒼蘚。唐碣迷深竹。緬懷長慶人。一往遂不復。斜日下牢谿。依依為誰綠。

穎亭

青山圍穎亭。下有清穎流。石瀨何淺淺。力始勝方舟。金沙映素篠。策策千萬頭。斜日照冰雪。微風矯輕鷗。側身望終古。企彼巢與由。糠粃鑄堯舜。心與造物遊。不逢掛瓢人。北指軒轅丘。

廣武山

朝登廣武山。四望古戰場。黃河決漭流。寒日無晶光。孤獸索其羣。驚鳥亂無行。平沙轉飛蓬。白骨堆嚴霜。昔者英雄人。於此分霸王。強弱理無恆。得失爭敖倉。名騅蹶陰陵。萬乘入咸陽。東指芒碭雲。五色成龍章。大風沛上來。遊子悲故鄉。

新鄉望蘇門山懷孫鍾元先生

朝來衛河上。遙見蘇門山。蒼翠雜諸嶺。清涼分百泉。緬懷松舟趣。長詠竹竿篇。及茲限跬出。擊汰失蚤緣。遙憶嘯臺翁。山中方晏眠。兒孫繞膝下。洞壑當門前。茶臼隱修竹。蓮舟隨稻田。少年任豪俠。白首此終焉。無由逐高鳥。矯翮青冥邊。

徐五兄自號嵇菴

我慕阮步兵。君學嵇中散。平生竹林期。鳧鶴誰長短。君抱出世姿。夙昔薄軒冕。彈琴聊自足。採藥忽忘返。且復龍性馴。兼之養生善。嗟哉雋傷道。斯語君知免。獨應七不堪。彷彿嵇生懶。我本澹蕩人。早歲頗任誕。一聞如鸞嘯。自顧爲人淺。廿年嬰世網。歲月坐晚晚。往往逢途窮。痛哭迴車阪。深慙至慎言。薄俗誰青眼。永懷素心侶。詎異平生撰。空傳周僕射。遠欲希嵇阮。

江正鹿角膠墨 梅淵公所寄

深山五月中。鹿角暖初蛻。取作黃明膠。良工妙調劑。黃海松萬株。壽者幾千歲。古屋收輕烟。萬杵功不細。易水渺已遠。潘張復誰繼。歙州有江正。妙絕擅斯製。故人鹿裘翁。愛我一丸惠。老無險糜賜。研田蕪不薙。晴窗手摩挲。風日忽開霽。袖中官奴帖。飛動苦難逮。牙滑剗溪藤。熟視空睥睨。啜汁亦復佳。爲君掃文字。

戴嵩牛圖

一川莎草烟濛濛。曉來雨過開牛宮。三尺短篔兩殼棘。午陰掉尾嬉涼風。一頭摩角一頭齧。寢訛有態何其工。江干笛材老烟竹。橫吹髣髴穿林叢。絹素慘澹神理在。是耶非耶傳戴嵩。田家風物宛在眼。但有耕作亡兵戎。我行峨下踰萬里。青衣江上平羌東。翠藤紅樹亂烟雨。風景略與圖中同。一從羽書急滇海。甌粵秦楚交傳烽。益部迨遙隔天末。舊遊有夢尋巴賚。旄牛徼外阻王會。萬蹄驕馬高纏驥。千村萬落長荆棘。何時金甲銷春農。童牛不牯可三歎。卷圖風雨來長松。

用東坡先生清虛堂韻送黃無菴僉事歸甘肅兼寄許天玉

金城烽火連瓜沙。榆林盜賊趨彭衙。三秦昨夜捷書至。關門百丈開蓮花。甌閩格鬪尙未已。天南望斷今無家。登隴嘶羣怯班馬。及關接翅隨昏鴉。甘州官舍幸少事。譯經往往往紛葩。河西番帳盡外徙。何妨羊酪煎春茶。許生潦倒作秦贅。岑牟單絞漁陽搗。竹林諸賢久雨散。我亦蟻蝨勞搔爬。何時九州絕豺虎。吾徒一笑忘啓嗟。小戎賦罷意慷慨。瓦亭西北紛虹霞。二君俱閩人黃精禪理

同李湘北陳子端二學士葉子吉侍讀登慈仁寺閣再用清虛堂韻

化人闕世恆河沙。老松攞地龍衙衙。盤空閣道下無地。妙香似有陀羅花。吾衰作客不稱意。每逢望遠疑

還家三關寥落數行雁。雙闕霏微千點鴉。翰林三君負公望。高文大冊流滂葩。惜我旅病色枯槁。頭綱屢許分宮茶。兵車鱗鱗指荆楚。門外蕭蕭多馬撾。從來決勝在廊廟。詎有羣盜煩梳爬。書生手無五尺筮。中宵倚柱徒咨嗟。罪言欲吐更指口。遙山兩脚低殘霞。

通州水月菴三用清虛堂韻

鳧翁三五嬉晴沙。殘僧閉關如退衙。黃蘆苦竹隱缺岸。水濱往往飄殘花。濠濮會心豈在遠。便可泛宅仍浮家。水關上接鮑丘水。伯珪戰地啼寒鴉。卓老一坏沒荆棘。誰憐文采兼奇葩。古人於此兩寂寞。高枕且聽風鏽茶。漕河如林萬檣立。負城時送迴颿撾。彷彿扁舟落吾手。背癢欲倩鳥爪爬。病鶴觸籠翅翎短。老隨雞鷲吁可嗟。安得十洲縱汗漫。排空一氣凌雲霞。

與曹升六舍人食蟹

海上有螭蚌。力可制於菟。縱橫凌風潮。一殼能專車。失勢稻芒候。八跪充庖廚。津門連渤海。珍錯首蟹胥。誰遣三十輩。束縛就寒蒲。磊落堆盤中。香味宜葵菹。易酒碧玉色。無錢亦須沽。與君對持螯。風味思江湖。野人厭藜藿。腸餓鳴轆轤。今朝食指動。襟袖露膏腴。酒船數帆健。絕勝三日醑。寄謝虞嘯父。未須誇鱉魚。

和沈石田鈎戈夫人歌 過河間作

漢宮窈窕千蛾眉。春華未謝秋風吹。落葉哀蟬明怨惜。復道佳人葬桐柏。一朝望氣來河間。玉鈎乍啓迴天顏。朝侍宸遊陪豹尾。暮歸別館幸甘泉。容華未老君恩歇。西弄迴頭成決絕。雲陽南去女陵旁。怨粉零香水鳴咽。漢家贊說貳師功。衛霍勳名甲第同。青史祇今憐趙父。茂陵烟草亦連空。

五君詠

劉考功公馭

劉生慕節俠。杜陵一男子。從軍驃騎幕。長嘯蘇門裏。萬金輕鴻毛。妻子如脫屣。少日魯朱家。爲官偶然耳。施少參尙白

宛陵實盛德。卓犖爲眞儒。馳情慕周孔。抗志希黃虞。作爲一家言。頗綜七略書。從政三十載。屢空方晏如。汪戶部茗文

左司固簡傲。狂狷乃其眞。邈然望終古。豈顧世上人。軒冕詎足貴。雲壑心所親。著書洞庭上。寥寥誰問津。梁侍御曰緝

陽夏善閉關。性不因人熱。偶然騎驄馬。非意固不屑。一歸嵩陽寺。邈與世相絕。作佛固未能。蕭然自禪悅。董侍御玉虬

易農不羈士。爽朗多所遺。脫略梁竇勢。放浪班馬詞。一迴秦州駕。高臥荆谿湄。文園自消渴。猶聘茂陵姬。雪中送酒與東癡二首

清晨起盥漱。開戶聞騷屑。風微竹烟淡。雪重松枝折。餅水寒屢凝。罌香散還結。忽念東臯子。孤懷抱冰雪。東臯未三里。潢水凡幾曲。風雪掩荒蹊。往來斷樵牧。先生高臥處。柴門翳苦竹。雪深門未開。村雞鳴喬木。日高炊烟絕。吟聲出茅屋。欲寄一瓢酒。聊以慰幽獨。天晴儻來過。就我西齋宿。

朱璧揭鉢圖歌

方寸水精鉢。中有寧馨兒。崔巍青蓮座。上有人天師。一人竊窈美。且頤迴風髻。髻捎雲旗。作使羣鬼無不爲。神姦萬億連。尻脰震電燄。燄雷車馳。修羅刀鼻雨不訾。飛龍銜銜勢。躩踞前有饑蛟。後肥遺。或騎朱虎。驂文狸。猱猱駃。牽騶吾。夔蹄者角者毛。彤彤銅弩蹶。張齊發機。彤弓旅矢射。隨龜。瘡鬻伐鼓聲。振悲師子之鎧。劍鋌鉞。懸擲度。索上騎危。牙齒棧。鰓肩隱。頤左擔。雞足移。須彌威容。廣大調御。姿不聞不見。坐若尸。天花青紺下。葳蕤山鬼邪。揄不得施。授女五戒。跪涕洟。豈悟前因。羯肌夷。賓伽解脫。母性慈。山河墨點。無瘡痕。顧陸不作作者。誰崑山朱壁。能繼之。絹素黦。暈丹粉。漓神彩。浮動窮。毫釐城。北徐公虎頭癡。三日不食。坐茅茨。抱持此卷。忘朝饑。大雪叩門。索我詩。開卷一引千留梨。呵冰灸硯爲此詞。十指皸。瘵兩肘。胠杜陵老叟不可追。金粟神妙徒嗟咨。

雪中登黃山

空齋踟躕臥。忽夢溪山好。朝騎禿尾驢。來尋雪中道。石壁引孤松。長空沒飛鳥。不見遠山橫。寒烟起林杪。張友石戶部得雷氏琴

枯木向千載。中有太古音。君子重拂拭。寄此山水心。閑庭何蕭條。苔色上衣襟。罽烟方斷續。房櫺杳森沉。遙懷託散暢。古調刪哇淫。良以辨廉志。詎必徼黃金。相賞在松石。蕭然風滿林。

贈葉井叔三首

別業在樊口。門前臨大洞。樊水渺東逝。大江從北來。蒼翠對吳峴。崢嶸臨釣臺。紫髯信已矣。山川鬱佳哉。蕭條誓叟居。門徑餘蒼苔。隱跡旣蕪沒。霸業隨飛灰。唯傳退谷銘。流風激蒿萊。君詩似整叟。令我懷抱開。

豈忘樊上居。出處理亦諧。江湖就魚麥。日夕增徘徊。

作吏客伊洛。門對嵩高山。山色映終古。客心長自閑。朝看飛鳥沒。夕對孤雲還。聞昔王子喬。吹笙碧落間。揮手駕白鶴。一往三千年。至今緱山上。逸響凌紫烟。夫君有仙骨。雲駕如可攀。遊目憩嵐嶺。躡足升天關。盧巖瀑布佳。百丈聞琤游。懸流澗冬雪。密樹生夏寒。何當蠟屐來。與君蹋飛湍。

樊口去荆江。雲濤渺千里。估客日上下。清風片帆耳。五溪有傳烽。飲馬洞庭水。鈴旂雲夢多。悲笳渚宮起。南岳無迴雁。江介多封豕。如聞樊上居。風土異南紀。雞犬白雲中。桑柘寒烟裏。理亂不復聞。漁釣信爲美。扁舟倘知津。逍遙問園綺。

展子虔高歡歸晉陽圖

已下二首爲宋牧仲比部題

黃河浩蕩流三城。龍門底柱禹所營。巨舟峨峨掉尾鯨。乘風破浪來崢嶸。身臨河魁賀六渾。虬髯虎視眞天人。紅粧執樂一千指。玉貌錦衣充下陳。黃頭鮮卑一何銳。怒如攸飛軒猛氣。露車載酒非狂生。復有敖曹好兄弟。

當年霸府氣如虹。洛陽三月珍珠紅。韓陵片石紀元功。晚逢黑獺非籠東。熒惑一朝犯南斗。下殿眞成入關走。傷心渭水日東流。鸚鵡踈踈實戎首。展生何年寫此圖。丹青橫絕絕代無。想見檉頭綱惡馬。如此老公豈人下。周禮綱惡馬

沈周秋林讀書圖

白露變丹葉。楓林颯高寒。青山出白雲。巖壑增屏顏。何人坐林中。長日頽巾冠。堯舜禹武湯。如櫛羅簡編。

最愛青牛翁。至哉五千言。山風日蕭條。楓葉墮我前。瀑布擎蛟龍。赴谷爲奔川。川上小石磯。磯頭插綸竿。卷書卽垂釣。得意遂忘筌。我本山中人。見此心依然。何當及秋風。歸翦茅三間。

移竹戲題

齋居飽藜藿。兼旬食無肉。昨從季主卜。筮得蒼筤竹。入世二十年。磬折仍負俗。愛君霜雪姿。磊砢多節目。秋雨日瀟瀟。臥起箕箒谷。露下更婆娑。官奴試蕪燭。

勾龍爽蠟屐圖爲牧仲題

磊磊白石瀨。落落松竹林。林下彼何人。蕭灑古冠巾。手中自蠟屐。神氣何閑暢。人生百年中。著此當幾兩。晉人故多癖。此癖復自佳。錢奴身障籠。優劣何有哉。兒子意辦賊。人戶履齒折。甯憶剡中時。長歎泛溟渤。兩人持高屐。三人持衣裾。作佛靈運後。習氣那復除。奇哉勾龍生。有此通靈筆。把臂方入林。欲呼阮遙集。題秦留仙然竹集卻寄

小孤山下江水白。聞君去作潯陽客。大別山前江漢清。憶君重過武昌城。荆鄂相望纔幾驛。憐君來去隨潮汐。盤中縷膾武昌魚。座中人物荊州鯽。亦識王門懶曳裾。參卿軍事復何如。早將表餌摧強敵。莫爲窮愁且著書。

送徐武令

人生如飛蓬。飄轉不得住。與君十載別。紫髯已非故。邂逅蔓草間。爲君歌零露。歌聲未及已。離觴忽復御。森森江上波。離離海門樹。悵望秋風時。客帆此中去。雁飛京口驛。潮落西興渡。幾日罷清砧。閨中理紈素。

詠菴學士移居

故人長安居。門巷碧苔色。徑僻少人過。空庭唯鳥跡。長思茂陵臥。未厭承明直。仕宦本易農。胡爲方食力。圖書盈五車。茅茨唯四壁。室閒原憲誦。家鮮公儀織。晨夕隔望衡。徘徊坐成憶。

唐寅紈扇圖

健仔辭輦後。無復承恩宴。綠華萋廣庭。流塵掩華殿。幽懷寄搗素。密意題紈扇。淒涼柘館閉。繡縵昭陽讌。運往恩潛移。常虞委霜霰。太息木門謠。含情望飛燕。

聽張晴峯員外彈琴

愛君園林好。花藥幽蒙茸。淥池澹將夕。蘋末來清風。美人惜流景。目送孤飛鴻。何以寫我心。清響寄絲桐。班姬淚秋殿。箕子傷離宮。瀟湘渺雲水。星月寒魚龍。誰知園客絲。宵默含無窮。屈茨間箜篌。繁音令人聾。希聲愛遙夜。思盡神相通。卷簾滅明燭。月上聞秋蟲。

和吳孟舉種菜

丈夫志四海。隻手提天綱。不然折尺箠。爲國笞戎羌。胡爲坐喪手。學圃耽滄浪。澤國春雨餘。溪流碧泱泱。戴笠日荷鋤。土膏發勾芒。曉露劑白苧。夕照分紅薑。葵韭龔蓼蘇。紛葩各成行。鱗鱗斑竹筍。勢欲凌蒼筤。剛登寒具筵。糝用鹽豉香。野人食不鑿。晨炊拏黃梁。詎諳七菹妙。聊喜四體強。便腹何貴人。日羞大官羊。不解出一奇。嗟嗟耗太倉。鮭菜二十七。風味輸庾郎。倘許充園官。待我相攜將。

題王文安公畫

在昔孟津公。談嘲頗慢世。結習稱畫師。往往得三昧。山路緣秋毫。上與青冥際。孤舟泊風荻。邸閣懸水碓。此境何嶄絕。略與秦棧似。忽憶大散關。巴馬金纏轡。

東城泛舟

秋氣軫楚悲。商飈感梁賦。河橋一騁望。葉下亭臯樹。叢雁入雲飛。沙禽背船去。暮節入羈懷。誰能鬻不素。

仇英畫九成宮圖

唐九成宮即隋仁壽宮

君不見隋皇初作仁壽宮。累榭穹臺宛相屬。夷山堙塹幾百里。役卒崩騰死崖谷。功成厭見獨孤公。不知怨自封郎築宮車。晚出凡幾載。已見迷樓起相續。虬髯真人西入關。削平六合營長安。青山碧水自無恙。雕牆峻宇猶人間。年年清暑備法駕。千乘萬騎驥房顏。醴泉漢出如沆瀣。下入涇渭爲通川。步櫺周流鑿山翠。雲窗霧閣當空懸。化人之臺屹中天。銅鳥六月雄風寒。披襟萬仞待鸚馭。咸陽宮闕如雲烟。宮娃笑語翠微上。阿監絡繹青冥邊。羽林千牛萬萬輩。解牛放馬紛華旂。從來世事有倚伏。太平倏過開元年。白頭拾遺此駐馬。愁聞林藪啼哀猿。畫圖想見全盛日。令我涕淚雙闌干。

腳痛

去年牙齒豁。一痛連臄車。今年腰腳痛。登降須人扶。吾年纔四十。早衰信有諸。憶昔登金焦。南遊窮具區。騰越如飛猿。神尻駕空虛。西行極岷峨。奇觀凌清都。兩腳輕孱顏。邛杖非吾須。十載一彈指。肉緩筋亦驚。况復苦踈熬。舉步多崎嶇。始悟咸其腓。初九利安居。既不策捷足。安用悲泥塗。誰能相比附。如彼壓輿騶。

題昌黎詩後

淮陰舉足分項劉。運籌帷幄與留。河汾門下羅將相。房杜李魏非常儔。西京功業繼三代。貞觀仁義被九州。惜哉韓公不及此。但取將相酬恩讐。

北山約遊摩訶菴不果往卻寄

天色欲雨鳩勃蹊。麥苗剡剡翠始齊。白石莊前入山徑。已有犂确紛高低。春湖靴紋漾綵縹。遠山玉立森角圭。荷蕢鬢鬢驅繭栗。垂竿拍拍驚鳧鷖。漁陽地寒花事晚。春陰風氣恆慘悽。今朝乍霽日暄暖。垂楊蘸水新生稊。小桃點點杏苞拆。裙腰草綠紛萋萋。諸公蹋青拂晨出。果下銜尾聞駟嘶。郎官頭白老簿領。經年坐困如醯雞。自嗟樊雉苦籠紮。決起安得排雲霓。况逢寒食催上冢。紙錢麥飯澆棠梨。感念存歿淚雙迸。玉壺那復相提攜。賦詩望遠但咄咄。遊心已過香山西。

曹升六謝千仞攜酒過飲宋牧仲張杞園亦至同賦長句二首

陵州羅酒玉雪清。青州金露琥珀頰。直沽冰開酒船到。鸞車捆載連瓶罌。二子提挈肯過我。鷗夷交臥紛縱橫。我愛徐景山。不知曹事唯酒鎗。復愛謝安西。玩弄元子如老兵。眼中况是我輩客。談天炙轂聲彭觥。一斗枯腸芒角生。五斗胃中鱗甲平。一石曠若遊八極。逍遙齊物無虧成。幽州二月草始萌。小桃照地如紅輕。天涯酒人不易得。何必琴筑琵琶箏。十擲輒斲詎緣拙。三語作掾誰所令。蠟炬成堆冠幘墮。西南月作金盆傾。

昔聞馬文淵。居後欲軒前欲輕。又聞樂將軍。賤貧辱身貴快意。此語非長者。亦復非遊戲。勁翮扶搖九萬里。豈識青冥更垂翅。鳶肩火色多少年。一老行吟獨憔悴。唯應中山釀。供我千日醉。駉駉爲載駝。作羹有

酒如灑那復記千秋亭上相叫呼。不知何與癡人事。丈夫不得手執丈二。隻身領漁陽萬突騎。親射蠻氈縛鬼章。誰識鄧先好奇計。此酒須滿百斛船。使我反覆沒飲如渴驢。子路百榼堯千鍾。黃土誰能別愚智。諸君不酬閣當閉。舉館徑須煩杜黃。

宣和打馬圖

前馬奔馳後馬逐。萬馬奔騰隘川陸。初看逐隊來玉門。又見爭先度函谷。虎胥彗尾骨權奇。千里追風競齊足。傳聞天馬是星精。豈與凡材同碌碌。扼窩據險一敵萬。倒行逆施歛馳突。漫言稱德不稱力。徑籊浮雲何太速。得意橫行彼一時。詎少隳車太行麓。殺函晡秣朝飛龍。咫尺君門上天育。那知高步易顛蹶。夾漈一朝遭困辱。莫誇棗脯與文繡。世事由來有翻覆。直須十丈的顛飛。待向黃池更歎玉。

秦鏡詞爲袁松籬作

煒煒古鏡雙盤龍。流傳本出咸陽宮。秦時明月至今在。剝落泥沙露光彩。當年秦并六國時。後宮閉置千雙眉。守宮注臂鏡照膽。三十六年君不知。華陰道上逢山鬼。輜輳東來祖龍死。美人鐘鼓散如烟。此鏡蒼涼閱朝市。憶昔大收天下兵。十二金人初鑄成。還令餘事作奩鑑。太乙下視蛟龍驚。劉興羸蹶何倉卒。金鑑千秋如一髮。秦鏡虛誇照膽寒。不照長城多白骨。漢祖入咸陽宮得方鏡廣四尺九寸照見五藏見西京雜記

與董蒼水彭駿孫小飲葉子吉學士齋同限箇字寄諸乾一進士

長安風塵日堀堞。扇障不能衣苦澆。天官昨占月離畢。十日愁霖足高臥。高車大馬諸貴人。今雨蕭條誰肯過。玉峯學士數相見。打門不辭泥沒髀。今朝置酒招我飲。黃雀披綿蜻鮓判。百盃以後呼酪奴。白絹斜

封朱印破天下健者今董公富貴浮雲輕涕唾。彭郎未奉一囊粟。路鬼挪揄甘凍餓。抱膝誰信比管樂。高論依然遡卿軻。世情但競牢石耶。女子猶知伯休那。酒酣岸幘忽大笑。吾曹蠶絲自纏裹。青山一髮江南路。雨笠烟蓑有幾箇。細林主人老虬隱。枕上九峯青錯磨。漁樵近局不爭席。復有名僧伴高座。空山水流花又開。不識都門送臨賀。我生未覩細林面。聞君快語殊已瘳。已瘳見山海經當年我作萬里遊。劍閣西風聽鈴馱。凌雲九峯悔輕別。筋贅肉緩四體惰。他年但乞五湖長。纔話尊鱸口先哆。未須木石笑吳兒。小海歌成我當和。

張晴峯員外園亭聽金山人彈琴同詠菴學士北山都諫作

平生慕古澹。頗笑箏笛耳。愛此太古音。寥寥寄絃指。客來江海上。偶契希夷旨。髣髴七里灘。松風入江水。曲罷孤月明。溪光散清泚。主客一無言。露坐攬衣起。

送浦潛夫

吳江有高士。讀書慕皇義。心遠契一畫。意得無九師。撻策筮嘉遯。遂養丘園姿。荒江屋欹斜。鷗鳥同朝饑。在昔洪丞相。經略天南陲。君佐幕中畫。倣儻復權奇。試吏嶽麓下。蒲鞭懸不施。丞相解兵柄。角巾東第歸。君亦困株木。周道多蒺藜。投賦汨羅岸。弔古湘妃祠。歸吳二十載。飄蕭雙鬢絲。丞相宰木拱。部曲無復遺。重來渡易水。感激酬恩私。慟哭龍蟻塋。手刊第二碑。袖中周易編。未有君平知。徒步過市中。塵染蒼浪髭。湖南方用兵。馬飲瀟湘湄。辱在卿大夫。脩劍空拄頤。老子好奇計。才鋒尙如錐。無人爲薦達。垂老嗟數奇。古王者行師。必鑽九州龜。君書實有用。足爲王伯資。秋風動鱗甲。扁舟犯漣漪。白首抱遺經。具區臥茅茨。

季主定捧腹，高賢當爲誰。

羅塞翁猿圖

栗葉初黃山水渾，引臂叫嘯來羣猿。
緣條附蔓下絕壁，連尻結股爭攀援。
老猿下視獨招手，羣猿跳擲騰且奔。
可憐猿子亦大黠，襍負母背如乘軒。
黑者玄衣白玉雪，下飲百丈臨瀛淪。
齟齬乍生趣備，丹青漫漶神明存。
品題云是塞翁筆，江東詩法傳清門。
我疑或是易元吉，景靈畫壁昔所尊。
余鑿韓性竟短詠，天姥五字雙眉掀。
吟詩翫畫輒移晷，坐屏寒具忘朝飧。
忽憶元和柳司馬，投荒始解憎王孫。

文姬歸漢圖

南宋渡祇候司張某畫

大漠茫茫沙草枯，天蓋四野如穹廬。
陰山秋高雪片麤，朔風中入金僕鐸。
高飛鵝轉追韓盧，前行一馬建隼旗。
後有數馬鳴相呼，尾鬣蜩縮慘不舒。
馬蹄流血冰裂膚，蕃兒漢兒手口瘡。
相顧不能鼓隴胡，文姬玉面貂襜褕。
聳肩顰黛愁不娛，越燕向日思南徂。
君獨何爲苦嗟吁，兜離竊停非故都。
魂消影絕悲兩雛，歸來爲公寫遺書。
名在列女丹青俱，老瞞睨鼎目睢盱。
破壁牽后如收孥，獨能千金歸蔡姝。
吁嗟高義今已無。

答徐勝力二首

雁門太守解食雁，豈識涼州皇甫規。
王符到門倏驚起，屣履出戶倒裳衣。
折楊皇琴萬夫和，清廟朱絃知者希。
潛夫論就自愛惜，會有知我傳來茲。

我來都門得二士，董生菴水磊落君多聞。
董生萬里適甌越，君也饑餓留燕雲。
登車不落爲著作，笑君何

意窮皇墳被褐懷玉莫太息。他年定可張吾軍。

送洪防思由大梁之武康

澤腹堅凍冰峨峨。舳艫銜尾填漕河。北風吹雪如鶴鵝。急裝結束庭驢馱。欲向夷門訪朱亥。便從燕市辭荆軻。三年京國何所見。日中攘攘肩相摩。呢嘗喔咻時所愛。骯髒詎免常人訶。亦知貧賤世看醜。恥以勁柏隨蓬科。我衰於世百無用。僦屋深閉如蠹螺。蒼苔被階寒雀啄。汝何愛此頻來過。耳語似鄙程不識。騎危解笑公叔痤。吳興清遠我夢到。水精宮在琉璃波。防風古國更幽絕。餘不溪水清透逆。山歌處處採茶奔。漁舟往往穿菱荷。西陵潮信近咫尺。方言百里無差謬。勸君卜築豈無意。貞曜故宅留山阿。結鄰尙友亦不惡。溪山況足供婆娑。名高身隱恐難得。丈夫三十非蹉跎。朝廷正須雅頌手。待汝清廟賡猗那。

蘇門三賢詩

張于度

蘇門孫徵君曰于度爲鹿伯順高弟。從予五十年。未嘗或離左。魏之難。履虎尾。涉春冰。烈士之名滿天下。卒歸老蘇門。高蹈遠隱。志士不忘溝壑。其庶幾乎。于度名果中。容城人。葬夏峯北原。明運昔中圯。奄豎奸大位。衣冠虛南牙。政柄歸北寺。誰實鈞黨魁。嶽嶽左與魏。一朝檻車徵。牢戶事陰祕。傷哉史弼言。茶甘乃如薺。容城有布衣。發憤亡鯁避。要鑽理太尉。舉幡訟司隸。貫械渤海生。赤幘夏門吏。桑海四十年。往事如夢寐。骨歸蘇門山。名在顧廚次。

理寒石

本李姓也。名鬯。和。西華人。恥與逆闖同姓。改曰理。孫徵君與西華左令書稱爲魯連後一人。魯連蹈東海。其志恥帝秦。龔生天天。詎知有美新。陶公懷晉室。聊存頭上巾。嗟哉均埊流。乃愧青巖甄。西華理寒石。爲儒甘賤貧。奉母蓬藿中。歸潔恐辱身。梟鏡破鏡與鏡同交蹄跡。神州日沉淪。靈氛久上天。呼號竟無因。感激變姓名。下士良苦辛。何人傳節義。誦言聊一申。

餓夫

彭姓。字了凡。蠡縣人。遭闖亂。棄諸生。客饒陽。爲鄉塾師。已而從孫徵君於蘇門。或授之粟。不受。竟坐死。嘯臺之旁。徵君題曰餓夫墓。

黔敖呼餓人。不受嗟來食。使之當大事。必讓千乘國。靈輒餓鬻桑。倒戟一何力。簞食不忘報。竟脫宮甲逼。蘇門有餓夫。風節夙所植。生餓蘇門下。死葬蘇門側。嘯臺高峨峨。百泉流湜湜。清風一相映。水石起寒色。遐哉首陽薇。千古長太息。

送陳子文赴安邑丞四首

我愛田子方。同時段干木。高義動諸侯。清風激頽俗。聞鍾知左高。佳言足三復。下車或式閭。寧澣踞堂辱。斯人邈已遠。餘韻留鄉曲。賢哉魏成子。千秋擅遐躅。

峨峨中條山。迢迢涑川汜。人物表西河。流風至今美。陳侯東海來。高文一何綺。闔闔籟浮雲。夔絕致千里。自抱萬古心。五斗焉足恥。滹沱冰上渡。故關雪中啓。懷古多遠情。到官正春水。目送中條雲。松風滌雙耳。騏驥服鹽車。躑躅上虞坂。山石何礪聲。日暮途且遠。道逢紵衣惠。未敢悲晚晚。仰首奮長鳴。市日思一展。

譬彼軼世士。遭時未離羣。君過虞坂上。懷古向陵緬。古之賢達人。澄懷善舒卷。森森沅湘流。香艸日以蘭。鬱鬱徂徠松。百尺凌歲寒。君子重結交。貞固期不刊。解巾二十載。閱世如波瀾。菀枯旣以移。素心良獨難。喬木隱窮巷。饑禽噪簷間。君偕辛齋叟。時時造門端。告我媿汭行。能不傷肺肝。保此金石心。在遠義亦安。不見蕭長倩。錄錄曾抱關。

藝圃雜詠十二首 爲萊陽姜學在賦

南村

豈知城市間。村路忽超遠。曖曖桑柘陰。晨光散雞犬。應有素心人。空林共偃蹇。

鶴柴

長身兩君子。宛與孤松映。三疊素琴張。一聲遠山靜。嘹唳月明時。風泉雜清聽。

紅鵝館

疏館籠鵝羣。素羽臨秋水。濯濯映鳧翁。沿流亂芳芷。乞寫茴香花。共入丹青裏。

乳魚亭

幽人知魚樂。爲復知魚計。策策與堂堂。宛有江湖意。時逐落花來。更向空明逝。

香草居

湘君遺遠時。汀洲搴杜若。菲菲來襲予。脈脈情相託。常恐鷓鴣鳴。芳香坐搖落。

朝爽臺

崇臺面吳山。山色喜無恙。朝爽與夕霏。氤氳非一狀。想見拄笏時。心在飛鳥上。

浴鷗池

海鷗戲春岸。時下池塘浴。何樂從君遊。忘機自馴熟。不用駭爰居。朝朝泛寒綠。

度香橋

陂塘何逶迤。飛虹鏡中起。但聞功德香。都不辨花水。鼻受心已著。遂契無言旨。

響月廊

脩廊非一曲。窈窕隨清樾。掃地坐焚香。心跡兩幽絕。簌簌風蕭蕭。無人見明月。

垂雲峯

具區三萬頃。奇峯七十二。割取一片雲。虎牙自孤銳。颯然山雨來。咫尺流雲氣。

六松軒

髯翁閱千歲。纔如熟羊腩。不逐桃李妍。何妨雪霜壓。可望不可狎。愛此李鱗甲。

繡佛閣

樓閣衆香中。日夕供調御。仙梵遠蕭條。隨風不知處。更有迦陵鳥。聲來貝多樹。

古詩答金穀似

西山紛鉤綿。具區遠泓崢。巘洞既殊麗。草木滋鮮榮。靈威古丈人。素書發其英。千載多秀民。游札高令名。昔聞夫子賢。乃自長洲生。鈍翁五經何紛綸。七略亦縱橫。提攜吳純鈞。落筆于天精。相思二十年。無由達。

中誠都門競錐刀。車馬如踐更。不解作高髻。誰與爲目成。作者枉佳贈。其言明且清。賦詩備三類。餘音散鯨鏗。顧慙實不腆。欲報無瑤瓊。自非揚盼流。詎曰知譖明。矧子少而颯。執手安敢輕。來詩有云。倘無斂器。堂下失醜蔑。悉索固所願。毋爲笑荒僮。

同施愚山陳藹公集山史昊天寺寓觀唐子華水仙圖

先生舊隱三峯椒。太乙玉女時招邀。秦都漢時一蟻垤。目翫易象窮昏朝。蒲車應詔謝賓客。城西古寺風蕭蕭。殘碑老樹氣象古。涼衫重戴風神超。八驕喧闐不到此。兩三素侶還相要。殘冬氣暖似吳越。佛香入院鐘魚飄。徐出一軸自拂拭。古光黯澹生鮫綃。青峯出沒高歷歷。海天萬里迴春潮。仙人綽約駕雲氣。飛龍決起橫煙霄。六銖衣輕逐風舉。熒熒顏色如陵苕。四座咨嗟歎奇絕。倏乘六氣遊空寥。子春一去伯牙逝。海波汨沒秦人橋。君歸西嶽望東海。齊烟九點非迢遙。

題喬子靜桃花流水圖

青山白雲外。合沓無終始。小艇漾溪流。幽興何窮已。夾岸桃花林。連綿復相似。落英正繽紛。芳草亦鮮美。茗椀置船頭。答箸掛船尾。不愁風水逆。去住皆可喜。儻遇避秦人。或逢鬼谷子。鸞嘯一迫然。沙禽忽驚起。

同楊爾茂富磐伯兩宗伯李湘北閣學張素存宮庶信初侍御遊摩訶菴二首

西院枕迴溪。青山滿高閣。祇園天氣佳。苔砌餘紅藥。鳥如迦陵響。梵是魚山作。微雨忽來過。紛紛幾花落。東院更幽絕。蒼苔引深處。修篁蔽簾櫳。風聲在高樹。恍惚思舊遊。繾綣未能去。誰賦洞庭詩。清如杼山句。

東院壁間有僧題詩云。圖畫當年愛洞庭。波心七十二峯青。而今高臥思前事。添得盧師倚石屏。

顏脩來吏部寄孔廟碑十二種

生近聖人居。未得拜祠墓。頗聞魯諸生。講禮以時聚。故宅聞金絲。猶傳壁書處。漢祖祠太牢。過魯暖餘慕。六經出秦火。諸儒明訓故。歷代遞相嬗。碑版屹森布。龜龍或齟缺。蛟螭無錯互。顏生陋巷裔。學古鄙章句。餘事攻六書。草蔡覓先鶩。金薤遠見投。聊持伴魚素。論世慨桓靈。未造紛黨錮。元嘉永壽建寧三碑尤愛梁鵠書。筆勢颯軒翥。貢墨與匱紙。椎拓亦殆庶。明牕秋日晴。水沉午方炷。彷彿闕里遊。低徊不能去。

午食得鱸

蜃盤鴈醢百不愛。縷膾愛斫松江鱸。年來絕有步兵興。江船難致途且紆。今朝忽訝食指動。四腮登饌加蒲菹。京師最重灤河鯽。侯鯖下箸矜膚腴。貴人不識鱸膾味。儘輸衰笠垂竿徒。吾鄉魯陂亦產此。鱸豸稍別方言殊。齊人呼鱸曰多。釋名爾雅未及錄。會資好事箋蟲魚。廿年仕宦去鄉里。走避舊隱如逃逋。昌歆形鹽享備物。何如鄉味炊雕胡。他年歸臥錦湖岸。日拋繆榼臨清渠。

夜月冰修子湘耦長見過同儷宛陵體三首

舉頭新月佳。開軒滅明燭。流螢稍開闔。風露下疎竹。素心二三子。比鄰往來熟。漢陰無主賓。何用加幘屋。袞袞九衢間。未少噉名客。老懶倦逢迎。誰當較尋尺。高齋時臥病。河漢忽已夕。綠蘚被階生。幽人見行跡。聽君談劍術。四座輒色變。青天走風雨。虛堂激雷電。香丸合雌雄。太乙經百鍊。勿快睚眦罽。應侯吾所賤。冰修談劍術甚奇。

愚山侍講送敬亭茶

敬亭雲木好。香茗叢幽巖。鴉山舊擅名。晚出思并兼。茶人競春霽。歷險如鼓僂。新火細蒸焙。青鷄勞封緘。先生住山時。採摘心所欣。封題寄千里。知我殊酸鹹。年來同直廬。思歸夢巖嵌。白毛劇皋盧。強飲口已箝。何當候蟹眼。颺颺響風簾。故山昨有寄。永驛馳江帆。開籠亟分我。芳香透重函。鞞紋隱蹙縮。羣臆垂廉襜。磴成玉雪霏。持作梁肉砑。渴羌老解事。未敢加薑鹽。

戲題兩髯行後贈陳其年邵子湘

楚王宴章華。乃以長鬣相。彼鬣有何好。霸國用自壯。平生交兩髯。于鬣不相讓。絕倫陳魁梧。軼羣邵跌宕。昨見兩髯行。颯然忽神王。士龍能笑不。吾髯幸無恙。

送姜西溟歸慈谿

春風滋百卉。不榮孤柏根。白日迴陰崖。霜雪慘不溫。丈夫重知己。烈士輕感恩。姜生起句餘。水擊南溟鯤。商歌一畝宮。名動萬乘尊。孤高取衆忌。當路誰攀援。季布揖曹丘。感激由片言。何況貧賤士。風颺阻重關。枚朔善飢餓。莊徐擅高論。連尻結股腳。詞賦若雲屯。君獨銜恤歸。秋風刈叢萱。虎鼠竟何常。揮手聲暗吞。得陳子文書。兼知吳天章消息。

雁聲初墮地。黃葉已盈除。秋雨蕭條夕。忽枉故人書。故人復何在。中條白雲裏。昔別霜霰零。昨日秋風起。曾聞隴頭水。驅馬度關山。烽烟照駱谷。征戍何時還。書中云有度隴之役。黃雀縱橫飛。孤鶴正垂羽。祭竈請比鄰。停車共騶語。歲月易永久。離羣難處心。爲問朝歌令。相思深不深。

寄青浦丞李青立

麟趾異凡蹄。鳳毛異凡羽。君爲南陽孫。豁達類其祖。請從復辟論。卽事感今古。神龍奮幽蛰。天星落如雨。倉皇奪門功。造次成肺腑。輿僮珥貂蟬。政柄歸奄豎。陳請濫恩澤。帶刀依負斧。晉文定王室。請隧不見許。吁嗟彼何人。憑藉亂狐鼠。爰立當危疑。踪跡等羈旅。當時武功伯。脣齒終齟齬。公實仗忠信。跪跪成心膂。嗚呼三楊後。伯仲見伊呂。天地鬱風雲。將相如龍虎。愛君清門後。克秉高曾矩。低眉百寮底。手版趨公府。青袍映春草。遠向春申浦。婦有林下風。樂事笑眉嫵。青立娶於彭。爲禹峯方伯女。有詩名。詩寄雁南飛。因風墮洲渚。

寄牧仲贛州

虔州界閩湘。蘭蕙賤於草。復有寶珠香。玉雪映清曉。江城微雨過。炎瘴淨如掃。高齋開八窓。豁達涼風早。方牀黃琉璃。臥起日杲杲。清芬惱魂夢。仙膚愛綦縞。嶺外陸郎花。未敢鬪娟好。幾歲客京國。冠蓋苦紛擾。水門多林塘。無由聽啼鳥。今年八境臺。雙江入登眺。閑註詩楚騷。多識不爲少。遙憶書到時。贛石風嫋嫋。

漁洋山人精華錄卷四

古體詩

其年簡討見和綠雪之作復遺芥茶一器索賦

敬亭如靜女。婉孌有餘態。洞山如道流。吐納成沆瀣。陽羨連故鄣。尻隴相負戴。地靈草木異。雲霧凝巖巖。尤重羅嶺名。超軼絕流輩。山氣夕陽佳。界中茶。夕陽勝朝陽。風露非灌溉。昨賦綠雪詩。莽鹵乏清裁。名流遞磨唱。粲若珠百琲。髯也實致師。拔戟成一隊。白甄題紅籤。細君自蒸焙。朝來肯送似。秀色染眉黛。下簾候魚目。芳盜露螿背。雖復遭水厄。頗亦澆壘塊。茶聲正琤琤。竹影交瑣碎。詩成遺長鬚。聊作三舍退。君當賈餘勇。吾衰鼓已再。

送邵子湘之登州

我聞大九州。香海環其外。裊海內絡之。萬川勢文匯。禹貢周職方。中央浮芥帶。鄒衍不可作。疇與辨茫昧。昔者始皇帝。東巡極海岱。海神駕橋梁。大魚射澎湃。號爲秦東門。刻石表胸界。三山在水下。其事頗奇恠。邵生列仙儒。遠遊信所屆。遙飛阜鄉鳥。往撫天吳背。龍躡陵丹嵒。九點烟凝黛。嶄絕日主祠。夙與之罘對。日月影動搖。島嶼光破碎。朝潮激天輪。夕汐裂地肺。巨鯨若連山。奮鬣雲晝晦。時見新羅船。墨點空青內。

廣乘渺何所。歸墟誰負戴。木張悉文雄。髯才更十倍。歸來述滄溟。始信九州大。

讀馮圃芝餘事集因題天章還山詩卷

木脫石氣青。吟君古調詩。落日高鳥去。碧空澹涼颼。一吟扣一絃。一吟傾一卮。嘈嘈立部伎。子子寡女絲。巧笑倚市門。漆室聲苦悲。猿鳴上峽夜。雁警團沙時。遙憶中條山。雲物秋正奇。吳生家山南。拾橡恆苦饑。朝吟看雲出。暮吟逐雲歸。河聲與嶽色。中有太古詞。誰爲昭與聾。獨有馮生知。天章在燕市得古銅章。文曰河聲嶽色。所居正河嶽之間也。

和田綸霞郎中移居

田郎詩格如雪車。昨來新句傳移家。夢向漪亭坐秋水。蒼筤萬个眼巒巒。冬官事少蹋壁臥。日未卓午先放衙。殘書滿前自穿穴。紛如雁字風中斜。未要沈范相賞識。風亭月觀吟梅花。廬如瓜牛足搖膝。畢逋愛伴城頭鴉。鷺鳥累百詎比數。蹀躞聊試終參撾。牽蘿補屋絕代子。慎莫無匹悲媧媧。

風氏園老松

城南風氏園。徑僻無車馬。野色暮蒼然。徘徊古松下。松花自開落。松籟何蕭灑。落日望烟歸。時逢負苓者。徐健菴宮贊送金陵伊氏扇

舊京扇貴李昭骨。二百年來名滅沒。近來後出仰與伊。細研刻藤如笏滑。骨取湘江斑竹枝。黃楊烏角光參差。妙手須煩畫蟬雀。名流底許矜蒲葵。蘋末微風散高柳。八尺琉璃當戶牖。持贈難忘東冶亭。題詩遠媿東陽守。

盆魚

井泉初汲寒射鮒。萍衢界水花紛敷。草堂咫尺見濠濮。碧羅扇底紅鱗魚。丹砂瑋瑁非一狀。亦有玉雪瑩冰壺。中庭兩樹正交蔭。日夕蟬鳥相嗚呼。朱門定無此輩客。但聞擊鼓吹笙竽。匡牀視景移枕簟。風來蘋末看跳珠。夜涼月白河漢轉。起聽煦沫疑江湖。托身幸得遠鯨鱷。一一尾鬣乘清虛。出入苻藻絕斷澗。笑渠殘鱠矜王餘。誰爲惠施解吾樂。牀頭尙有蒙莊書。

東丹王射鹿圖

人馬勢逸不可當。開圖素練生風霜。奇哉落筆如挽強。誰其作者東丹王。東樓西樓二千里。乘秋出獵凌窮荒。番部紅靴鐵桶蓋。左射右射必疊雙。鑿蹄騎馬如風檣。三花翦鬣紛怒張。俊鶻初變爲正鶻。蒼鷹塌翅隨馬韉。雄狐狡兔皆遁藏。射麋麗龜走且僵。東丹昔日稱人皇。扶餘開國鄰扶桑。秋冬射獵海東嶺。頭鵝燕罷傳醴漿。跨海南歸大梁苑。時時夢憶穹廬鄉。往往丹青自遊戲。寸縑尺素如琳琅。宣和壓架六千軸。東丹九幅千金裝。良岳灰飛玉匣散。此圖豈不關興亡。蠟炬如椽照空廊。雄談劇飲累百觴。東丹丹青遠擅場。蹊田奪牛語堂堂。令人千載悲同光。

李渭清簡討以龍鬚二莖見贈來書云有風鬣霧鬣之態非火鬣朱鱗比也戲報長句

阿誰拔此蒼龍鬚。白如珂雪光驪珠。風鬣霧鬣憶髣髴。汜人愁態瀟湘姝。鮫室織絲冰萬縷。博山龍涎午方鬻。龍皮之扇驅殘暑。紫拂龍髯勝揮塵。夢入瀟湘洞庭渚。貝闕金堂見龍女。樂奏還宮迎貴主。錢唐破陣交風雨。覺來一笑望秋空。依舊癡龍臥相語。

劉子端舍人惠琴魚

琴溪水泱泱。鯉魚三尺長。琴高騎鯉撒波去。至今溪水桃花香。桃花香時臨上巳。琴魚忽徧琴溪水。半寸難求鱗與鬣。况從丙乙分腸尾。由來風俗當園蔬。水鄉風味無時無。居然遠致同茶筍。不用門生議蟹鉏。故人家傍琴溪渡。渡口桃花幾千樹。花時魚美酒正熟。好共溪琴結茆住。

送彭古晉二首

玉露滄蘭階。明河耿遙夕。昨別宛陵人。綢長復送華亭客。渺渺九峯青。茫茫五湖白。秋風佳景時。菰蓴正堪摘。故園隱君子。夙抗嘉遯跡。吳六益沈友聖亦山澤。問訊今何如。予懷在三益。

聞君遊蓬池。訪阮公嘯臺。臺上多悲風。臺下生蒿萊。淥水揚洪波。東逝不復迴。南有三亭岡。寒蕪望崔嵬。一言奪相印。應侯亦奇才。當其置廁時。何異諸輿僮。君行大梁道。覽古紛徘徊。埋照實至慎。睚眦終禍胎。且呼竹林人。啜醢盡餘盃。

瞿山畫松歌寄梅淵公

誰能畫龍兼畫松。鱗而爪鬣行虛空。誰能畫松如畫石。石骨犖确松蒙茸。韋鑾董羽兩奇絕。眼中突兀瞿山翁。瞿山翁所居。乃在柏枧深山中。此山上與黃山通。軒轅鼎成上天去。遺薪往往成虬龍。翁時散髻坐巔頂。與酣潑墨浮空濛。孤根裂石不三尺。倒飲萬丈疑雄虹。瞰臨嶢嶻下無地。盤拏雲霧迴長風。世人少見多所怪。絕技豈必昭羣聾。兩峯對起何巖崕。瀑流直下當其衝。輟雷噴雪不知數。下與松勢相撞舂。撫松看瀑者誰子。得非僭佞之屬青羊公。何時與翁結廬天都雲海東。松肪煮罷方兩瞳。更千萬世無終窮。

葵圖爲牧仲郎中賦

何人畫此四尺絜。目光陽睽生寒毛。重銜繫頸氣何驚。望之非獫狝。美鬢碧眼手自操。番部君長身帶刀。豪豬作鞞獸錦袍。西旅底貢來周郊。畫師得非顧與曹。趙盾往事悲彝臯。君絜臣絜適相遭。蹀階而走。走且號。逆跋絕領搏以麀。彌明鬪死靈輒逃。一絜世變心切切。丹青妙手良可褒。題詩齷齪非人豪。爲君一石傾春醪。

張茂先宅

當年張壯武。此地留空宅。平生無髣髴。何處尋遺跡。流恨金墉城。傷心洛陽陌。風流陸浚儀。曾容笑鬚帛。

賈浪仙墓

遙望大房山。蒼蒼但烟霧。下有千年墳。微茫辨封樹。照夜少魚燈。凌寒走狐兔。落日青楓林。是君獨吟處。

王若水古木鳴禽圖爲宋子昭郎中作

古木幽篁亂疎擗。下有棘枝聚寒雀。枝頭顆顆紅珊瑚。石畔菲菲芳杜若。一雀振羽如欲飛。一雀掉尾矜毛衣。復有兩雀目相瞞。號作竊丹知是非。鷓鴣臨流宛相竝。戢翼回頭復交頸。黃陵廟裏花落時。啼罷鈞軫照雙影。高堂置酒相徘徊。眼中不數濠梁雀。天清雪霽北風作。多少蒼鷹欲下來。

傅青王徵君寫荷竹見寄奉答兼懷戴楓仲

眼中突見篔簹谷。露壓烟啼萬竿竹。下有亭亭菡萏花。大似凌波倦膏沐。烟墨淋漓元氣足。老筆縱橫破邊幅。臥遊真對兩詩翁。晉祠水流如碧玉。

初拜國子祭酒釋菜太學作

雍雍禮樂地。肅肅堂廡深。皚皚素雪零。鬱鬱青松陰。堂上鐘籟懸。壁中絲竹音。末學愧承師。撫躬實難任。文學盛鄒魯。流風感至今。早入矚相圃。夙侍緇帷林。未能習禮器。遂以玷華簪。聖朝敷文德。憬彼胥獻琛。峇嶠白虎觀。諸儒粲璵琳。議郎悉承制。更老多橫襟。低徊宮牆下。如聽師襄琴。

何處故鄉思二首

北齊房君有山池。在齊州。自製詩云。風淪歷城水。月倚華山樹。時人以比康樂。予在京師。有故鄉之思。因取其語爲詩云爾。

何處故鄉思。風淪歷城水。處處清瑤流。時時白鷗起。日暮浣紗人。臨流獨徙倚。何處故鄉思。月倚華山樹。清輝河漢外。散入平湖去。不見謫仙人。空山下風露。

繪川書院詩二首爲湯荆峴侍講賦

大道隄鄒魯。洙泗何洋洋。邈矣二千載。伊洛爲巨防。江漢有遺民。卓爲姚許倡。至今百上泉。源流深且長。曖曖夏峯村。鬱鬱通德鄉。湯公起梁宋。攝衣早升堂。側聞睢渙間。五色多文章。黼黻與華蟲。宗廟繪衣裳。汝南多先賢。鄒魯實頡頏。中原昔戎馬。講肆爲鞠場。起衰賴通人。屹茲數仞牆。樂職備中和。諸生歌鹿鳴。六籍列經緯。諸史成宮商。不才忝成均。皇比坐傍徨。倚席久不講。士氣何由昌。愧彼巫醫師。糜粟空一囊。先生昔挂冠。棲遲樂巖谷。睠彼二子。望古企高躅。逶迤清川上。構此數椽屋。三年侍承明。夢想在林麓。大道不終晦。天中盛耆宿。輟轅有耿介。上蔡有張沐。著書各滿家。衆流匯川瀆。耿公實廉吏。齋廚甘杞菊。張公赴徵車。萬里向巴蜀。冥冥子規啼。蠶叢凍雲木。何日成德鄰。絃誦譬家塾。子亦步履來。歲晚共饘粥。

題徐電發檢討畫壁

仄行與外骨。并入考工記。何如紈扇上。善寫招潮勢。草泥擁郭索。兩鉗亦何利。便欲左手持。未勞門下議。

湘水行送良輔宰零陵

陽朔二水湘與澗。源同派別分條支。湘水東來入南楚。曲抱衡山經九疑。九疑之山蒼梧野。斑斑淚竹英皇祠。零陵郡古枕湘水。瀟江曲折來赴之。自古騷人憔悴地。九歌哀怨留其詞。亦有元和舊司馬。八愚感激傳歌詩。其文往往擬山海。坐使荒徼增瑰奇。子今年少去爲吏。况有詩筆人所知。黃溪山水勝鄆杜。何必慨歎窮荒爲。此去浯溪止百里。磨崖洗剔中興碑。元公作頌魯公筆。長與日月相昭垂。經術緣飾固良可。勿勿隨流俗。矜繭絲。衣租食稅盡赤子。誰云南人鬼且禡。捕蛇有說更三復。軍輸尙急西南陲。

贈許生精篆籀

我來太學已八月。長日坐臥石鼓旁。松風灑然送蟬語。一庭碧草生新涼。嗟哉趨趨不可辨。如箝在口誰能詳。安得邀君坐東序。共窮史籀廣宣王。

送湯荆峴侍講使浙江

我愛西子湖。夙昔夢見之。湖光與山綠。樂事輸吳兒。譬客談江瑤。未免思朵頤。聞君往東南。起舞掀兩眉。綠蒲十幅帆。西風美滿吹。初下南徐州。三山已麗崎。行行過震澤。萬頃青玻瓈。夜航到臨安。高枕殊未知。新筍晚花過。橘綠橙黃時。湖水雄鴨頭。綠淨相差差。掩映湖上山。影娥照清池。錢塘八月潮。詭異天下奇。疾雷震百里。蛟龍競躩踞。潮頭坐靈胥。重水汨後隨。三千殼強弩。射潮勝雄師。至今擊西陵。鐵幢高以危。

醜酒臨樟亭。江海爲東馳。壯觀今古無。寄之於聲詩。歌送潞河船。郵籤催畫旗。

吳江顧樵水寫予平山舊詩。摘星樓閣浮雲裏。一傍危欄望楚江。之句爲圖相寄雨中偶成一詩奉
答兼寄茂倫定九

哦詩三十年。往往在人口。旗亭與樂府。流傳亦時有。江淮好事多。圖畫煩好手。詎敢擬右丞。家風映先後。廿載走京塵。頗已忘敝帚。君復爲此圖。毋乃太駢拇。平山高蠱蠹。楚江清瀏瀏。雁齒紅欄橋。鵝黃水楊柳。風景故依然。問是淮南否。俛仰慨今昔。少壯成皓首。他時鱸鄉亭。相過索盃酒。息壤猶在彼。寄語雪灘叟。

遂安毛貞女詩 同年祥符令會侯女

新安水清泚。水清石見底。黃河水瀾瀾。一石五斗泥。水清復水濁。女心空自知。三日爲君婦。未識君容儀。一月侍君疾。不聞君履綦。秋風響庭樹。夜夜哀羈雌。高樓切浮雲。直下忽若遺。昭昭白日光。奄與黃泉期。手斲女貞木。絃以寡女絲。彈作處女吟。千載有餘悲。

十一月十八日紀事

招搖方指子。七日後長至。五星如連珠。貞符協天瑞。誅蕩天門開。日射觚稜次。公卿儼行列。百寮咸備位。雲中露布下。琅琅動天地。十月日在未。軍府秉諮議。雷動傳滇城。十萬連步騎。貝子坐武帳。諸道師總萃。將軍拜祓社。偏裨怒裂袂。搜穴翦狐鼠。然犀照魑魅。天上舞鈞梯。地中鳴鼓吹。不遑濡馬褐。况敢執象燧。膽落鐘詎聞。約長髮競繫。半年推長圍。屏息門晝閉。樵探路久絕。啖食到殘飢。鼯技悔已窮。蟻援復何冀。孺子一七殊。僞相五刑備。自然天助順。豈曰吾得歲。昆明水清冷。金馬山屢最。妖氛一朝洗。磨崖勒文字。

釐圭命召虎。乘軒寵邴意。六詔歌且舞。給復置官吏。皇哉聖人德。涵育及動植。手提三尺劍。削平諸僭僞。何以矧曰仁。何以淬曰義。所以八年中。次第芟醜類。師行不驛騷。民居不憔悴。自茲萬斯年。養弓兵不試。敢告載筆臣。著之大事記。

戴氏鼎爲楓仲作

昔在京師賦方鼎。年少筆力回千鈞。焦山鼎圓歲在巳。江海起立魚龍奔。邇來衰謝二十載。雖有意氣無由振。戴氏此鼎何處得。勢如怪獸獰以蹲。牛頭負戴到蓬戶。四座動色誰敢捫。雲雷盤旋間饗饗。斑斑古色疑周秦。凹中尾鬣狀天馬。緣尻颯鼠拱且馴。或云子午紀年月。或如癸甲兼庚申。或云乾上艮在下。天山爲遞理則均。著馬履鼠古所訓。義云陰屈而陽伸。制器尙象有深戒。寡聞眇見徒紛紜。大巧坐令僂齟指流俗。豈辨飼與饋。丹楓閣中盡奇古。此鼎屹立何雄尊。市斤鼎鱗任嘲笑。烹雞何似羞明神。不煩更問柳下季。歷千萬世存吾真。順治己亥在京師爲少傅劉公賦方鼎康熙乙巳與西樵先生在焦山賦古鼎程邃穆倩爲圖

多父敦乃戴氏物

昨日賦罷天馬鼎。今日復示古敦牟。山川連日發光怪。黃白下覆雲油油。此敦形製奇且古。兩耳三足窮雕鏤。上作饗饗下蚩尤。細辨非籛非彝舟。古人一物殫工巧。用盛黍稷神所羞。珠槃玉敦載盟府。云以敵血親諸侯。流傳千載歷塵劫。卻伴高士山之幽。昭餘自昔稱晉藪。侯甲水作青瑤流。丹楓孤閣踞其上。朝霞暮靄臨窗浮。先生靜坐觀衆妙。圖書萬卷皆親讐。此鼎此敦置左右。蒼然古色來商周。庭列九寶發緹幕。令我一見生歎啾。長安市兒寶康瓠。金敦玉敦知何求。什襲歸去閉高閣。會有光氣騰龍蚪。敦音對

摩崖碑

有客新自湘江歸。登堂示我活溪碑。芒寒色正三百字。忠義之氣何淋漓。白日行天破幽曉。走避罔兩潛神變。憶昔天寶初。喪亂漁陽突騎如飈馳。二十四郡少義士。平原太守獨誓師。平生不識顏真卿。乃能一木支傾危。清河年少氣慷慨。十歲作質平盧兒。中興大業起靈武。功成不死神扶持。道州刺史昔漫叟。振筆大放瓊瑤詞。請公磨崖書絕壁。鐫鑿千仞青雲梯。蠻烟瘴雨不剝蝕。萬古照曜天南陲。昨者劇賊亂滇海。盜據衡永爲根基。太平祭告徧羣望。山川一洗無磷緇。宜有雄詞繼前代。磨崖重刻活溪涓。

元祐黨籍碑

天津橋下啼杜鵑。耕父已見清冷淵。宮中堯舜不可作。厚陵社飯悲年年。二惇二蔡秉國軸。同文館獄紛鈎連。衣冠相望走嶺表。一網盡矣嗟羣賢。司空手籍元祐黨。京自署司空尙書右僕射兼門下侍郎大書深刻相磨鑿。彗星下掃文德殿。毀碑夜半何喧闐。攸攸拂拂一兒戲。可惜宋社成南遷。潭州死骨尙有臭。黨人名字光中天。西南荒徼八桂郡。此碑千載人爭傳。上云垂戒萬萬世。其詞何異誅共驩。從來青蠅亂白黑。三代遺直今如弦。小人勿用易所戒。崇寧債轍無忘旃。

秋杪獨遊善果寺感懷亡友葉文敏公

秋懷憺無豫。古寺聊經行。喬木何蒼然。歸鳥時一鳴。雨久林葉積。人稀秋草生。帛公吾夙好。敷坐依南榮。壁間龍鸞書。歲久猶崢嶸。壁上有世祖皇帝御書唐詩。洞房昨夜春風起一首。自署臆庵道人。昔遊偕故人。共對寒泉清。俛仰遂成昔。存沒條自驚。西景薄悲谷。素魄無常盈。世界真一漚。何物爲冠纓。徘徊日云夕。駕言返東城。

古蹟三首爲岳給事賦

同年岳鎮九給事。初知封丘縣。頗以古循吏之治治其民。以唐高常侍嘗爲縣尉。祀典闕焉。乃剏爲專祠。又春秋黃池戰國青陵臺在縣境。皆碑其處。數百年廢墜之典。釐然修舉。予嘉其事。因爲賦之。

高常侍祠

忠公拓落人。好談王霸略。一辭孟諸野。微官此棲託。把臂李杜遊。慷慨吹臺作。懷古薦溪毛。風期緬猶昨。

黃池

餘皇旣已徙。姑蘇亦已焚。黃池尙爭長。荼火矜三軍。肥胡幡名不可見。四野空寒雲。大河隔濤江。至今悲伍員。

青陵臺

東郭一曠望。尙見青陵臺。臺邊兩梓樹。古冢何崔巍。下有鴛鴦宿。上有烏鵲哀。遐哉一女子。大義終不虧。

雨過陳默公滌岑

躡屐歷危岑。單椒上空曲。江雨從東來。風吟萬竿竹。城郭浩茫茫。衣裳盡寒綠。何處是龍眠。千峯出雲族。

十八灘三首

繫舟萬安城。已聞灘聲惡。連峯造天關。疾雷般地絡。篙師理戩楫。直與驚湍薄。萬山立積鐵。其下臨大壑。沉沉蛟龍宮。神物信所託。排空紛恠石。森然奮搏攫。潛虬動鱗甲。巨刃揚鐔鏢。地根在何處。坐覺坤軸弱。悵然念神禹。封泥此疏鑿。長年聚羣力。撇漩出寥廓。三復垂堂言。遠遊亦何樂。

亂飈吹急雨。一折改奔峭。連山巨東南。瘴霧迷嶺嶠。榜人侵曉發。高臥失臨眺。輟雷起何處。萬夫迭呼嘯。倏忽數灘過。到眼一票姚。武朔旣崖柴。崑崙絕排募。始蹈呂梁險。終或昆吾譟。四山方出雲。吐納亦殊妙。山木蒼然合。冥冥子規叫。

半日過五灘。灘灘各殊狀。怒流一噴薄。石角迷背向。激瀑散霜雪。倒洒石壁上。漩渦走風霆。喧豕裂層嶂。洶如奔萬馬。崩騰不相讓。又如闔闔開。搜搜羽林仗。傷神旣慘澹。快意倏悲壯。出坎在須臾。布帆幸無恙。探奇遘靈闕。豪吟洗惆悵。

韶石

昔聞韶石奇。今覩韶石狀。奇峯削凡體。斗絕各雄長。恠石走中流。牙角怒相向。峽迫春湍豪。撞春力頗抗。雙闕屹東西。毳門始誰創。其旁有阿閣。靈鳳昔來貺。傳聞帝南巡。九成奏崖嶂。后夔不可作。疇與辨真妄。飄搖翠龍駕。髣髴鈎陳仗。西望蒼梧雲。臨風獨惆悵。

彈子磯

神禹刊九山。百粵所不詳。蠻夷暨流蔡。遺跡蓋荒唐。此磯始何代。峻極蟠穹蒼。下臨萬丈潭。蛟螭多伏藏。黑鷹巢其巔。下瞰時飛颺。石壁不可梯。錯雜五文章。鐫鏤復穿漏。鬼工肆皴皴。想當開鑿時。巨刃摩天揚。安得挾仙靈。白日凌飛梁。

觀音巖

粵山無寸膚。斯巖益厯屨。其下蟠水府。其上排雲霓。洞穴豁天半。十丈臨江涯。騎危躡虛空。險絕緣鈎梯。

白日忽晝晦。疑逢魍與魎。金獸佩腰間。火鈴前後隨。蝙蝠如白鷄。鍾乳皆倒垂。罽屨掩洞門。狡獪神所爲。暗瀑響陰壑。尋丈安可知。灑落深潭中。如弩齊發機。佛座雲霧生。濛濛沾人衣。遠江上明月。欄杆拂參旗。歸舟意恻怳。絕景誰能追。

峽山飛來寺

方舟宿瀆陽。高峽厭蒙密。乘風指飛來。喜近調御室。蒼蒼菩提樹。透迤寺門出。金碧閱蕭梁。幻語恐非實。禺陽二帝子。何年此栖息。言采阮侑竹。遙應黃鐘律。如何遂不還。空有湖城憶。東上緣崎危。詰曲昧蹊術。夾磴荔奴陰。青蔥上初日。石壁留孤雲。飛亭俯江色。沉沉晴川綠。活活流泉疾。敷坐憺忘歸。逍遙問摩詰。

半山亭

雲碓水自春。松門風爲關。坡公題峽山寺句。夙愛老坡語。幾載思禺山。何意萬里遊。兩脚墮孱顏。苔碣不可見。定水猶潺湲。宴坐半山亭。下見凝碧灣。榕根如獐龍。怒攫青厓間。日午竹雞啼。濃綠排烟鬟。我行窮祝融。何時復來還。

南海神祠

茫茫百粵間。衆水歸扶胥。下匯波羅江。日夜相灌輸。嗟峨兩虎門。衛此陽侯居。神宮壓滄溟。潮汐在階除。我駕萬斛舟。乘風但斯須。飛廉送旌髦。龍伯爲前驅。百靈何蜿蜒。穹龜與長魚。將命肅牲醴。來格神所愉。振衣浴日亭。遙見三足烏。咫尺躡樊桐。覽彼天帝都。

與陳元孝屈翁山諸公集光孝寺

寺舊名虞苑
虞功曹故宅

一鳥鳴灌木。招提春雨餘。偶來方外遊。踪跡似閑居。清池浮水蘊。碧藻躍文魚。輕颺散訶林。葵樹交扶疎。灼灼佛桑花。紅豔驚珊瑚。緬追昔賢跡。俯仰懷赤烏。孝廉自英雄。江左盛文儒。魯周闔外寄。張顧府中趨。如何虞仲翔。獨此悲向隅。青蠅爲弔客。千載同歎歔。

菩提壇

一花五葉後。此樹留孤根。枝條徧震旦。老榦無冬春。我來漲海遊。入此甘露門。秦松與漢柏。瑣細皆兒孫。清池憺疎雨。妙義聞風旛。菩提本無樹。更與智者論。

僞漢劉襲冢歌

紇千山雀凍欲死。朱五經兒作天子。紛紛負販皆侯王。山牛免絲粵中起。中原頽洞久風塵。遂使傭奴竊邊鄙。黃屋左纛歷四世。坐斥洛州爲刺史。昭陽溝水流真珠。論車卻笑燒沉水。金銀當日錮三泉。帶劍上陵嗟已矣。苦將肖像擬休屠。金蠶玉魚誰料理。茂陵甲帳出人間。况爾區區安足齒。驪山地市竟如何。銀海茫茫同一軌。

羚羊峽

逆流入西江。已闢高峽中。何年神羊跡。靈奧開鴻濛。灘江挾牂牁。日夜來向東。怒流會端州。奔湊朝祝融。萬仞束洪濤。大哉造化功。龍從雲雷窟。黯黯蛟龍宮。更聞溪中石。價與瑤琨同。當年貢天家。千指勞人工。鼈行九地底下。與水府通微軀。一不戒崩墜。誰能窮尤物。古所歎。念此心忡忡。

羚羊山寺

古寺四月中。尚有木棉花。殷紅照羚羊。苔壁何紛葩。下有東江亭。俯臨硯洲沙。牂牁萬里來。遠勢如修蛇。高峽扼其衝。天險逾褒斜。寺當兩峽口。石徑交嵒呀。紅泉尚分飛。竹筧通坳窪。西望端州城。七星莽周遮。明當陟其巔。舉手攀匏瓜。沈佺期羚羊山寺賦云。中有紅泉分飛碧嶺。

七星巖

北斗森魁杓。何年化爲石。散落南斗旁。光芒色相射。遙填端州城。七峯張幕帟。崧臺屹中央。崦竊仙靈宅。天帝觴百神。於茲互主客。巖竇鳴鼓鐘。石乳亂矛戟。往往鳥獸形。奇譎蕩精魄。其旁兩洞天。豁豁幾年闕。水聲暗澎湃。時有蜿蜒跡。云此龍所宮。終古雲霧積。沉沉抱珠睡。五嶺慳雨澤。吾欲割其耳。雨工起鞭策。坐使瀝湖盈。乘流掛帆席。時旱甚瀝湖竭。

上屏風巖磴道未及霄關而返

暮登扶嘯臺。欲問含珠徑。山月出未高。羣峯忽已暝。清露滴生衣。孤松偃危磴。何處仰霄關。雲中一聲磬。端州別魏昭。士因寄和公於廣州。

人生如萍蓬。飄轉少根蒂。况復出處殊。合并安可計。我幽翠微峯。岩嶢在天際。幽人侶猿鶴。石門掩松桂。詎意萬里遊。相見炎海裔。世事苦匆匆。傾蓋忽分袂。我攀庾嶺松。君飽珠江荔。阿戎共扁舟。崧臺暫流憩。良會那能常。宿昔紛鼓枻。滇水方南下。灑江復東逝。中宿潮不來。何由慰迢遞。

重遊飛來寺

我昨遊飛來。乃自東峯始。得隴復望蜀。夢落西峯裏。歸棹粵江潯。烟雨孤篷底。菩提解迎客。一笑呼屐齒。

繚繞曲棧危。宛與蜀道似。數折得石壁。萬笏摩空起。如厂如步櫚。神工信奇詭。西巖隱飛瀑。迸罅流石髓。烏啼脩脩竹。花覆濛濛水。平生禽尙志。歎息吾衰矣。笑問白足僧。胡爲羨衣紫。

黃石磯夜雨

春枕夢忽破。決溜鳴篷窗。驚雷碾陰峽。急雨縱奔瀧。新涼臥桃笙。遠夢生楓江。起坐祝媪龍。添波送歸艫。

大廟峽

夜泊黃石磯。急雨如萬弩。朝過大廟峽。恠石蹲渴虎。靈祠出叢薄。飛甍粲可數。美人珥明璫。侍者拾翠羽。春蘭與秋菊。無絕此終古。落帆薦溪毛。蘋花媚中渚。神光乍陰陽。朝雲無處所。欲去更徘徊。枕榔颯飛雨。

涇陽峽

峭帆入臯石。絕壁太古色。山川方出雲。白日轉昏黑。浩浩一水逝。蒼蒼兩崖逼。雄雷地中奮。坤軸條傾仄。十步一盤渦。下視窳難測。云中穴蛟蜃。呀呷擇人食。牯牛灘名尤險絕。艱虞萬夫力。石棧緣秋毫。百丈牽江直。慘慘鷓鴣啼。猿猱不遑息。尙憶符韶州。名錫架閣擬巴夔。事往逾百年。遺踪半湮泐。陵谷一俯仰。感歎情何極。

與孫豹人周星公往白鹿洞次迴流山

廬山何高高。白雲在山腹。倏忽縈山椒。亦或帶山足。上下無定姿。頃刻屢移矚。山徑不逢人。樵歌出深谷。何處遞松聲。風泉滿林麓。

初入五老峯謁白鹿洞呈湯佐平先生

忽忽遠城市。浩浩臨滄洲。良辰愜奇賞。始遂廬山遊。威紆屢轉壑。窈窕時經丘。潺潺風瀑瀉。蒼蒼石川流。騎牛緬往跡。眠鹿欽前修。風景宛猶昔。年運倏已逾。唯有五老峯。屹立忘春秋。紫芝驚漢帝。黃石招留侯。泉石不我遐。桂樹生山幽。

自白鹿洞至三峽澗

溪行少阡術。沿洄屢迷津。馬蹄怯危石。欲下還逡巡。出谷見稻畦。烟火自成鄰。日午聞雞啼。裘徑見遺薪。薛荔衣恠樹。山風恐行人。興首五老峯。白雲如魚鱗。遙青遞隱現。光景相鮮新。望望玉峽亭。聊可垂吾綸。

三峽橋

五里聞瀑聲。轟若車千兩。谿迴見飛梁。穹若虹百丈。衆流會三峽。峽門扼其吭。建瓴沸驚湍。排空削層嶂。石激水斯怒。水橫去聲石逾壯。水石終古爭。恠奇紛萬狀。日射金井潭。濺沫出橋上。日光散青紅。雨絲亂飄颻。絕景遇兩蘇。何人繼高唱。

玉淵潭

已歷三峽橋。更訪玉淵水。水流大壑中。路轉層松裏。片石橫百仞。其右平如砥。九十九飛瀑。一門爭萬軌。岩嶒直要衝。跳盞不得止。雪浪如車輪。凸凹忽奔駛。激射爲深潭。神物潛尺咫。夜黑風雨來。鱣鮪皆避徙。久立凜毛髮。薄雲漏餘晷。西眺石人峯。梵唄空中起。

栖賢寺

李渤讀書處。乃在栖賢谷。何年作招提。來尋愜幽獨。僧舍如蜂房。高下傳山麓。雲來漢陽峯。時就簷下宿。

古寺無所有。修竹間喬木。野衲喜客來。欣然設茗粥。便欲置草堂。巖栖於此卜。

萬杉寺

朝過玉京山。緬想陶公里。谿迴得寺門。曲折杉松裏。雨中念佛鳥。交語清人耳。風吹修竹林。下有寒泉水。

開先瀑布

神龍擘空冥。颯沓雙峽開。青天露鱗申。白晝行風雷。峽逼不得逞。掉尾揚其頰。千仞忽開豁。下有布水臺。嘗聞龍奮迅。三昧何雄哉。誰能一鉢盛。終古相喧豗。夜來雷雨怒。大石爲崩摧。龍遊引九子。烟霧紛徘徊。偉矣南宮書。壁上有米元章大字。破壁鏗崔巍。有語不敢吐。以俟冠古才。

寄題三疊泉

坡公賦廬山。選勝僅取二。開先與三峽。雙瀑誰軒輊。此遊兩經行。奇觀偶然遂。遺恨三疊泉。扶筇未一至。譬如禽慶遊。五嶽得其四。他年謝羈鞅。更擬探靈閤。一削陸羽經。別續廬山記。

小孤山守風

已過落星石。前臨大雷岸。水宿淹期程。日暮中流半。統統戍鼓鳴。蕭蕭水禽散。愁對小姑祠。靈風送波瀾。

彭澤雨泊有懷陶公

陶公令彭澤。柴桑一舍耳。猶對匡廬山。共飲西江水。一朝悟昨非。扁舟歸栗里。笑指故山雲。吾心亦如此。我來彭澤縣。秫田沒沙鶩。急雨送寒潮。三歎顏延誄。

三山磯

澄江日夕淨。歸鳥投前浦。明霞散淪漪。輕颺憺容與。南臨春穀溪。北眺濡須塢。何處是三山。沙頭駐鳴櫓。
采石太白樓觀蕭尺木畫壁歌

落帆向牛渚。直上太白樓。錦袍烏帽太瀟灑。迴看四壁風颼颼。蕭生何年畫此雪。色壁峯巒出沒烟嵐稠。
元氣淋漓真宰妒。江湖瀕洞蛟龍愁。吳觀越觀上海日。蒼烟九點橫齊州。祝融諸峯配朱鳥。瀟湘洞庭放
遠遊。蛾眉雪照巫峽水。匡廬瀑下彭湖流。須臾使我行萬里。譬如怒隼凌清秋。我生海隅近岱畎。西遊曾
上瞿唐舟。昨登五老弄瀑布。卻臨三峽窺龍湫。七十二峯身未到。蒼梧已略天南頭。太白遊的徧四海。晚
愛青山采石聊淹留。丈夫當爲黃鵠舉。下視燕雀徒啁啾。

奉符古城

我行奉符城。不見崑崙迹。何處仙人閭。青山繞長陌。唯聞党竹溪。髣髴南邨宅。

徂徠山

雲陰移徂徠。影覆汶河水。下有賢人居。清風被田里。一抔詎能容。千秋今廟祀。

楊家砦

詰曲皆紅泉。縱橫半白石。石映月明時。泉噴風雨夕。愛此故鄉山。臨流布瑤席。

夔口峽

岱宗趨蕭然。吾鄉長白。卽史記所謂嶧泰山下。趾東北蕭然山。亦曰副嶽也。陰齊陽則魯。中有夾谷臺。連峯作門戶。石壁造天關。蕭蕭綠蘿

雨。

行經鵲華二山間卽目

山海作經首鵲山招搖之桂生其間麗響音凡之水出其下祝餘四照花爛熳今此鵲山勿乃是越人陳迹誰追攀灤水南來紆且直羅生夾岸蘅蕪蒸隔水正望華不注疑臨玉鏡窺烟鬢是耶非耶看不定尹邢雙照蛾眉彎被山璫琤不收拾蒸栗黃潤丹砂殷七十二闌遠鈎帶如碁布子交週環柳花滿樹綠於染杏花點地紅斑斑始知今日已寒食潑火小雨回天慳濯纓湖亭好烟景春波澹迤清心顏回首卻望衛河北風沙莽蒼連雄關

嘯園雜題八首

梭山

云是天孫梭何年化空碧蕭條松桂林掩竊幽人宅不妨折齒人長茲置巖石

見山亭

張公茂蘭故居正德間進士也時人語曰天下清官張茂蘭

入門不見日風動千篠簌孤亭在竹中猶傳清士居世無劉伯畊豈慕貂襜褕

張官京師冬無絮衣遺者皆不受東阿劉田伯畊以衣送之

乃受曰世惟劉伯畊衣可服耳竹中見左傳海岱清士見世說

長白深處

肅然萬壑深結廬最深處昔睹封禪儀今餘采樵路惟有漢時雲悠悠自來去

猗玗洞

古潭深不測石梁架巖洞中有蟄龍蟠鱗甲欲飛動明玗照清流幽禽時一啣

勘書閣

北齊勘書圖流傳子華作。

楊子華有勘書圖。

髣髴邢魏流。劍珮文林開。從谷四庫間。何如百城樂。

海燕樓

朱樓玳瑁梁。春社紅襟燕。年年思故巢。涎涎會相見。花動倉琅根。美人起常宴。

橫翠閣

高閣冠清溪。雪浪相迴薄。簾捲暮山晴。衣霑空翠落。烟暝竹林間。歸飛雙白鶴。

淨友亭

斑竹已解棚。翠莢復如雛。虛堂受荷氣。疎簾漾文漪。風標兩公子。照影時來窺。

米海岳研山歌爲朱竹垞翰林賦

許文穆公故物。後歸朱文恪公。

海嶽研山不可見。人間空說研山圖。研山之圖亦遭燬。雲烟過眼徒嗟吁。宣和良嶽已塵劫。矧乃片石輕錙銖。永嘉流落幾百載。昭陵玉匣今亦無。詎知神物有呵護。星芒夜隕三天都。太平宰相盛文物。寶此何啻千璠璣。古藤書屋花未放。主人愛客招吾徒。眼中突兀忽見此。乍疑几席羅衡巫。壺中九華那足擬。仇池枉用誇髯蘇。三茅地肺互鈎帶。二華雲氣相縈紆。蛟龍屈蟠待雷雨。仙靈髣髴迴駟車。華蓋一峯獨秀拔。宛插玉笏翹犀株。翠巒玉筍左右列。雕尻股脚相欹扶。上洞下洞闕曲折。潛通小涵空虛。龍池幽窈驗雨候。頗疑中有驪龍珠。峯獨者蜀屬者嶧。上泉有埒下有瀼。座客摩挲三嘆息。蒼然古色生眉鬚。海嶽之庵書畫舫。幾伴此老浮江湖。巧偷豪奪歷千劫。閱盡春秋如蟪蛄。翰林好事過顛米。日餐蛾綠忘饑飮。滄

江夜夜虹貫月。莫令光怪驚菰蘆。

飛仙閣

山行喜乘流。江平况如練。峯嶸有開闔。竹樹一蔥蒨。人言利州風。今朝冷然善。灘如塗毒鼓。舟劇離弦箭。仰眺飛仙閣。鳥道危一線。彎環歷三朝。向背窮九面。絳雲卷輕綃。白日遞隱見。嘉陵碧玉色。晴雨皆婉孌。想見吳道玄。應詔大同殿。此生兩經行。天遣追勝踐。醉帽停烏奴。已泊益昌縣。蜀諺云利州風雅州雨

汎嘉陵江至益昌今昭化縣懷何易于

益昌古利州。由來五達衢。白水合嘉陵。山谷相盤紆。我有汎舟役。萬里經川塗。望古懷清芬。所思何易于。刺史乘春下。畫鷁盛嬉娛。前舟載賓客。後舟羅笙竽。索民爲挽舟。牽縶須百夫。縣令腰笏前。挽舟自先驅。刺史驚問狀。縣令乃前趨。方春耕且蠶。民力方勤劬。令適暇無事。可以充卒徒。刺史聞之慚。上馬如亡逋。仁人重一言。能使民力蘇。考獻徵樵文。撫之載唐書。累百守令中。尙有斯人無。作詩告有位。磬石鑿山隅。

題張敦復大宗伯賜金園圖

我昔曾過龍眠山。山雪蒼茫歲方晏。龍眠山莊知有無。空向圖中幾回見。遺墟但指璇源館。在舒城。亦伯時別業。芒屨未踏垂雲泚。祇今彈指閱七載。過眼流光等飛電。龍眠尙書早致身。玉斧森沉侍清燕。承恩暫許休沐歸。朱提賜出蓬萊殿。鑑湖一曲落公手。草木雲嵐荷深眷。數問家金共賓客。遺事蘭陵何足羨。三年卻返承明廬。夢寐家山寫東絹。溪流百曲學印文。山色千層累重甌。龍公鸞尾歎烟雨。鹿角鼠鬚飽霜霰。哈呀忽斷漁浦開。仰見雲中寫飛練。草堂抱膝還讀書。樂此長年可忘倦。此山此圖世希有。終擬他年追勝踐。

待公功成歸故山。江帆更乞樵風便。

夢遊三山圖歌爲尤悔菴太史賦

故人昨有夢。夢落滄海東。海中三神山。往來倏忽隨。長風上有金銀宮。闕互虧蔽。下有雲濤汨沒相撞舂。蕭灑古仙人。漆園傲吏逍遙翁。歲星不見幾千歲。劃然一嘯驚鴻蒙。鴻蒙淨。見郭憲東方先生傳。羲皇上人北窓臥。流觀山海須臾中。謫仙騎鯨去采石。玉局西返峨眉峯。或被天衣駕烟鴻。或乘雲氣騎飛龍。西堂八十方兩瞳。生不並世道則同。笑指桑田洗毛髓。下視六合塵濛濛。兜率海山等游戲。夢耶覺耶皆虛空。三千里外訊占夢。漢廷尙有大王公。

甘泉宮長生瓦歌爲林吉人作并寄同人

漢宮一百四十五。

三輔黃圖漢殿。千里內。外宮館一百四十五所。

橫絕南山包九嶷。未央建章最廣麗。渭北更起甘泉宮。甘泉之山

化金碧。千門萬戶交玲瓏。通天臺高屹宮表。下瞰雲雨青濛濛。武皇求仙跨滄海。射魚牽犬東門東。

秦始

立石東海上。以爲秦東門。

孫卿已誅五利死。飛廉桂館猶龍嵒。上陵磨劍勢一變。雲陽烟草悲秋風。甲帳珠簾盡黃

土。何況片瓦埋荒叢。林生好古極幽蹟。短衣匹馬空山中。太乙壇邊弔鈞弋。悲歌躑躅斜陽紅。此瓦出土

事非偶。長生古篆疑神工。濯以清泉襲絳錦。攜歸嶺海光熊熊。令弟繪圖亟示我。使我懷古心忡忡。終南

渭水舊遊歷。漢家陵闕隨飛蓬。豈知一瓦供賞識。遠興石鼓岐陽同。兄視羽陽或作。弟銅雀。織兒慎勿加

磨礪。

漁洋山人精華錄卷五

今體詩

清明後三日鄒平西郭賦詩

雨歇西原上。鶯花事事妍。青山環縣郭。白鳥破溪烟。墟落明流外。園林霽景前。永懷蘭渚客。行悵暮春天。

蠶詞四首

青青桑葉映迴塘。三月紅蠶欲暖房。相約明朝南陌去。背人先祭馬頭娘。
戴勝初來水染藍。女桑濃葉滿江南。誰家少婦青絲籠。知向香閨飼女蠶。
玉蛾飛飛金繭酥。蠶時幾日閉門樞。白葦與農作磷藉。黃金與農作踟蹰。
鳩鳴屋角桑葉低。三眠四眠蠶始齊。小姑娘嬌小好閒事。簇蠶學罷學添梯。

山蠶詞四首

清溪榭葉始濛濛。樹底春蠶葉葉通。曾說蠶叢蜀道險。誰知齊道亦蠶叢。
那問蠶奩更火箱。春山到處是蠶房。榭林正綠椒園碧。閑却猗猗陌上桑。
春繭秋絲各自語。一年三熟勝江南。柘蠶成後寒蠶續。不道吳王八鬢蠶。

尺五竿頭絡色絲。龍梭玉鑷動妍姿。紅閨小女生來慣。中婦流黃定未知。

雨止

碧漢歇微雨。美人橫素琴。窗前明月影。洞口綠羅陰。丘壑結遙想。茅茨清道心。稍聞西澗水。寂歷響空林。

阮亭秋霽有懷西山寄徐五

孤亭新霽後。藤竹夜涼生。忽憶西峯寺。曾經采藥行。夕陽雲木秀。秋雨石泉清。不見烟霞侶。相思空復情。

南唐宮詞六首

細雪霏霏落院門。金鋪鴛鴦早黃昏。宮中玉女隨君側。搏得春水帶爪痕。曾邀醉舞媚君王。鬢采珠翹別樣妝。紅燭當筵新破就。更將金屑譜霓裳。簾錦鸞綾萬卷殊。澄心堂裏阜羅廚。保儀玉貌空傾國。妙選深宮但掌書。御溝桃葉水潺潺。姊妹承恩并玉顏。花底自成金葉格。宮中齊唱念家山。花下投籤漏滴壺。秦淮宮殿浸虛無。從茲明月無顏色。御閣新懸照夜珠。重午龍舟歲歲陳。輕颺飛燕各如雲。瓦官閣下黃花漲。別有凌波水上軍。

聞雁

縹緲涼天數雁鳴。幾家砧杵起秋聲。懷人江上楓初落。臥病空堂雨易成。尺素經時常北望。暮雲無際且南征。沅湘一帶多兵甲。莫動高樓少婦情。

蠡勺亭觀海二首和家兄西樵

春浪護魚龍。驚濤與漢通。石華秋散雪。海扇夜乘風。徐市荒唐後。秦臺滅沒中。扶桑試晞髮。朝日萬山紅。吾廬臨少海。及此更空蒼。飛觀圖雲氣。靈槎著日傍。十洲真浩渺。六博足翱翔。乘躋何年去。重來覽下方。

秋暮與家兄禮吉叔子小飲有懷

蕭瑟秋爲氣。凋盡始欲愁。酒人方落魄。名士半離憂。桂樹猶招隱。雲槓未遠遊。吾曹如野鶴。偃蹇待浮丘。

秋柳四首

秋來何處最消魂。殘照西風白下門。他日差池春燕影。祇今憔悴晚烟痕。愁生陌上黃驄曲。夢遠江南烏夜邨。莫聽臨風三弄笛。玉關哀怨總難論。

娟娟涼露欲爲霜。萬縷千條拂玉塘。浦裏青荷中婦鏡。江干黃竹女兒箱。空憐板渚隋堤水。不見琅琊大道王。若過洛陽風景地。含情重問永豐坊。

東風作絮糝春衣。太息蕭條景物非。扶荔宮中花事盡。靈和殿裏昔人稀。相逢南雁皆愁侶。好語西烏莫夜飛。往日風流問枚叔。梁園回首素心違。

桃根桃葉鎮相憐。眺盡平蕪欲化烟。秋色向人猶旖旎。春閨曾與致纏綿。新愁帝子悲今日。舊事公孫憶往年。記否青門珠絡鼓。松枝相映夕陽邊。

息齋夜宿卽事懷故園

夜來微雨歇。河漢在西堂。螢火出深碧。池荷聞暗香。開窗鄰竹樹。高枕憶滄浪。此夕南枝鳥。無因到故鄉。

采蓴曲四首

湘湖雉尾蓴。邳支馬肝石。采蓴作蓴羹。底用作方伯。
不食上湖苻。但采下湖蓴。緣流棹歌去。西風愁殺人。
采蓴臨淺流。采蓮在深渚。歡似蓴心滑。那識蓮心苦。
蓴絲何纏綿。柔白勝玉臂。持作千里羹。朝朝下鹽鼓。

卽事作二首

草堂殘雪後。不出系南邨。暮鳥常穿屋。寒家少候門。
讀書慕終古。養疾樂丘園。顧已慚通隱。浮沉莫更論。
二十偶通籍。三年歸舊林。聊知返初服。豈敢謝朝簪。
遯跡思壺口。忘機憶漢陰。終當與嘯父。天路試相尋。

讀史雜感八首

王謝烏衣六代同。名家龍虎盛江東。可憐東邸鑾輿出。
僕射終當愧侍中。過江名義共推袁。宋室孤臣念愍孫。
千古消魂石城曲。司徒家世本陽源。鑿地蓮花映雉頭。
卻忘鼙鼓下荊州。白門一決須臾事。枉向宮中拜蔣侯。
結髮從戎老戰爭。揮鞭立就十三城。涼風堂側桃枝戲。
絕勝平陽九道兵。江陵士馬控西疆。坐使吹唇沸建康。
湘土尋戈同氣盡。卻教韋粲死青塘。殿中擁槳唱無愁。
江左重開南豫州。十萬敵軍齊北哭。至今淝水不曾流。
汾上軍書夜刺聞。天池較獵未言歸。不愁粉鏡匆匆去。
更語官家殺一圍。芳華苑裏奏名倡。積翠池邊舍利裝。
衍得魚龍新散樂。大家恩賜學曹王。

雪後答東癡見憶之作

昨夜東臯雪。憑誰問隱居。不知高臥者。歲杪意何如。井邑頻憂稅。溪山早著書。因垂楚蘭咏。吟望一愁予。

雪後懷家兄西樵

竹林上斜照。陋巷無車轍。千里暮相思。獨對空庭雪。

別萬大屏楊勝林

別鶴念湖海。離羣秋夜心。風聲郢口暮。江色禦亭深。去路分吳楚。相思各滯淫。關門今夕雨。蕭颯動寒砧。

法慶寺閣上望雲門山

祇園有珠閣。高出碧林端。落日眺平楚。青山生暮寒。歸雲天際去。遠樹坐中看。今夕雲門月。無人照戒壇。

卽目

蒼蒼遠烟起。械械疎林響。落日隱西山。人耕古原上。

澗山道中

斷竊望沉沉。關河歲暮心。蒼山連凍浦。雪屋入寒林。鳧雁荒陂晚。雞豚古社深。墨王亭畔路。載酒憶登臨。

南園池上

清言不覺暑。纖月生西林。苔徑少塵色。夜猿清道心。漁樵晚多侶。風壑靜同音。會學涓高術。陰潭鳴玉琴。

阻雨望醴泉寺用徐昌穀韻

誌公飛錫處。巖壑至今深。渺渺青山路。蒼蒼修竹林。法雲懸瀑影。幽鳥亂泉音。自歎塵中駕。空勞出世心。

題迪功集

昭代嬋娟子。徐卿雅好文。稱稱如典午。譚藝似參軍。瀟落雲霞質。飄搖鸞鶴羣。祇應禹洞裏。靈蹟待夫君。

寄董樵

聞卜崑崙宅。棲遲歲幾更。人烟分蜃影。海嶠出秋晴。島屋閑垂釣。山田晚罷耕。多君離亂日。白社獨逃名。

題公馱蘇明圖卷

曾學如鸞旨。心懷汲縣遊。秋清嘯臺月。竹映百泉流。小隱何年卜。名山一卷收。聊當共嵇阮。把臂向林丘。

紀事

天壽蒼涼石獸陳。荒原驚見翠華春。君王淚灑思陵樹。玉盃金甌感侍臣。

高郵雨泊

寒雨秦郵夜泊船。南湖新漲水連天。風流不見秦淮海。寂寞人間五百年。

淮安新城有感二首

澤國陰多暑氣微。一城烟靄晝霏霏。春風遠岸江離長。暮雨空堤燕子飛。四鎮蟲沙成底事。五王龍種竟無歸。行人淚墮官橋柳。披拂長條已十圍。

開府當年據上游。建牙賜爵冠通侯。卽看別院連雲起。更引長淮作帶流。荒徑人稀尙黽嘯。野塘風急荻蘆秋。永嘉南渡須臾事。忍向新亭問楚囚。

江上寄程崑崙二首

白浪金山寺。青山鐵甕城。故人今不見。楊柳作秋聲。
江北望江南。祇隔江津水。日暮寒潮生。愁心滿揚子。

余澹心寄金陵詠懷古跡詩卻寄二首

千古秦淮水。東流遶舊京。江南戎馬後。愁殺庾蘭成。
鍾阜蔣侯祠。青溪江令宅。傳得石城詩。腸斷蕪城客。

再過露筋祠

翠羽明璫尙儼然。湖雲祠樹碧於烟。行人繫纜月初墮。門外野風開白蓮。

青山

晨雨過青山。漠漠寒烟織。不見秣陵城。坐愛秋江色。

江上

吳頭楚尾路如何。烟雨秋深暗白波。晚趁寒潮渡江去。滿林黃葉雁聲多。

卽目

蕭條秋雨夕。蒼茫楚江晦。時見一舟行。濛濛水雲外。

皇廠河

鳧雁被沙洲。沿洄一徑幽。萍花紛曲岸。竹色壓迴流。晚鼓滄江戍。人家白板樓。好乘瓜蔓水。溪上問漁舟。

雨後觀音門渡江

飽挂輕帆趁暮晴。寒江依約落潮平。吳山帶雨參差沒。楚火沿流次第生。名士尙傳揮扇渡。踏歌終怨石頭城。南朝無限傷心史。惆悵秦淮玉笛聲。

曉雨復登燕子磯絕頂

岷濤萬里望中收。振策危磯最上頭。吳楚青蒼分極浦。江山平遠入新秋。永嘉南渡人皆盡。建業西風水自流。灑酒重悲天塹險。浴鳧飛鷺滿汀洲。

寄一靈道人即翁山

聞師江海去。幾日剡中還。昨朝逢越客。知下沃洲山。

題徐半山山居圖

先生竟學道。自經水田衣。獨臥寒林靜。故人相見稀。晚涼松鼠落。曉日竹雞飛。亂葉千峯裏。行歌何處歸。

登金山二首

振衣直上江天閣。懷古仍登海嶽樓。三楚風濤盃底合。九江雲物坐中收。石罅落照翻孤影。玉帶山門訪舊遊。我醉吟詩最高頂。蛟龍驚起暮潮秋。

三山縹渺望如何。有客褰裳俛逝波。絕頂高秋盤鶴鶴。大江白日踏鼉鼉。泠泠鐘梵雲間出。歷歷帆檣檻外過。京口由來開府地。不堪東望尙干戈。

丹陽二首

夜火丹陽郭。移舟暫解維。川塗紛雨雪。彌望遠凄其。戍鼓蘭陵鎮。荒烟葛令祠。五湖行漸近。杳杳欲何之。

曲阿後湖路。百里望南徐。解纜從漁父。臨風誦卜居。凌亭朝射虎。練水暮觀魚。如此堪終老。窮愁悔著書。

潤州懷古二首

楚雲直下大江流。鐵甕城高落木秋。宋帝南徐猶作鎮。蕭公北顧更名樓。江山勝蹟留三國。海道烽烟動五州。見說孫盧西犯日。青燐白浪使人愁。

興亡六代已銷沉。對此茫茫思不禁。黃鶴山頭寒雨暝。佛狸帳外暮濤深。兵聞北府千年勁。雲入西津一片陰。興劇且傾京口酒。三山披豁足開襟。

焦山曉送崑崙還京口

山堂振法鼓。江月挂寒樹。遙送江南人。雞鳴峭帆去。

海嶽菴拜蘇米二公像

前輩風流地。爲菴易研山。淨名猶古蹟。磨衲識清顏。江月長如此。高人去不還。惟應餘翰墨。終古照人間。

瓜洲渡江二首

昨上京江北固樓。微茫風日見瓜洲。層層遠樹浮青薺。葉葉輕帆起白鷗。揚子橋頭雞未鳴。瓜洲城外日東生。風波不憚西津渡。一見金焦雙眼明。

呂城雪霽二首

雞鳴呂城鎮。日出市橋東。雪屋迴汀口。煙檣野竹中。鳥飛皆貼水。舟泛若乘空。古蹟成荒壘。行行慨阿蒙。午夜雲陽道。扁舟狎老漁。神亭雪幾許。直瀆路何如。烟水懷前侶。江湖未定居。斷橋叢樹裏。何處卜吾廬。

舟暮

向晚金牛道。林寒響宿禽。雪晴烟樹小。日夕竹園深。川路通蕭港。扁舟動越吟。蘭陵今夜酒。無那故鄉心。

許墅舟中眺陽山殘雪

日出陽山外。參差見幾峰。依稀露烟靄。窈窕明雲松。忽憶梅花發。清溪深萬重。扁舟欲乘興。尙尙暮天鐘。

虎丘

闔廬霸業夕陽沉。鐘梵空山自古今。劍去虎丘青嶂在。水枯鶴澗碧苔侵。吳宮歌散聲猶苦。越絕書成怨不任。惟有生公臺畔石。年年白月照禪心。

闔廬墓

劍池春日水清虛。石壁臨風弔闔廬。於越行成誰狡獪。夫椒往事重欷歔。飄零王氣傳金虎。寂寞空山葬玉魚。太息恩讐竟何在。荒臺青草認姑胥。

姑蘇懷古三首

爭長黃池未濟師。餘皇舟已徙熊夷。山川終古迷商魯。花草千年怨種蠹。故國魂銷吳苑水。行人腸斷越溪絲。竹枝聲裏春將盡。破楚門東暮雨時。

斜日停橈喚奈何。橫塘聲散采蓮歌。青山古道通閩閩。綠黛春風憶芣蘿。廢苑悵悵花欲暮。長洲淼淼水空波。千金枉鑄鴟夷像。烏自高飛避網羅。

山徑何時葬玉鳧。興亡轉瞬日西徂。越人已自籌三策。秋祭當年竟五湖。雨過麋城空碧草。春深鶴市半

青蕪傷心更有南陽宰。不獨寒潮泣子胥。

文種歎曰南陽之宰而爲越王之禽

夜雨題寒山寺寄西樵禮吉二首

日暮東塘正落潮。孤篷泊處雨瀟瀟。疎鐘夜火寒山寺。記過吳楓第幾橋。
楓葉蕭條水驛空。離居千里恨難同。十年舊約江南夢。獨聽寒山半夜鐘。

虎山擅勝閣眺光福以雨阻不得往

虎山橋畔盡層松。掩映寒流古寺紅。卻上重樓看鄧尉。太湖西去雨濛濛。

雨夜宿聖恩寺還元閣

梅樹初花石澗流。滿山香雪送行舟。三更蕭瑟湖邊雨。百尺高寒水上樓。師子窟中嵐翠合。法華山外暝烟收。霜天欲曉鯨音起。萬壑聲從何處求。

山中寄叔子時阻雨澣墅

平生兄弟遠遊心。世外玄棲約共尋。澗道名花任開落。湖天春水半晴陰。何山往事思求點。五嶽前期負向禽。遙憶孤篷宿烟雨。青芝南望白雲深。

鄧尉竹枝詞六首

二月梅花爛漫開。遊人多自虎山來。新安塢畔重重樹。畫舫青油日幾迴。
鄧尉山頭片雨晴。司徒廟下晚潮生。卻登七十二峯閣。玉柱銀房相向明。
西施洞望米堆山。夕翠朝烟擁髻鬟。不道鷓鴣曾載去。至今人在五湖間。

西來銅井又銅坑。山勢高低有二名。試上龜峯光福塔。白波翠巘兩邊生。
楓橋估客入山來。牒子多從木瀆開。瑤瑤冰盤堆萬顆。西林五月熟楊梅。
綠黛遙浮玉鏡間。峯巒千疊水彎環。居人卻厭真山好。哀墓南頭看假山。

題春申澗

桃夏遺宮廢。章華蔓草深。但餘流水意。如聽女環琴。

春申澗上

望澗亭邊野望新。明流秀嶂碧粼粼。青山終古連秦隴。珠履何年問楚人。
冰雪倒懸三峽水。風烟遙接五湖濱。李園已事成荒草。太息空祠一愴神。

惠山下鄒流綺過訪

雨後明月來。照見下山路。人語隔谿烟。借問停舟處。

江上望青山憶舊二首

揚子秋殘暮雨時。笛聲雁影共迷離。重來三月青山道。一片風帆萬柳絲。
長江如練布颿輕。千里山連建業城。草長鶯啼花滿樹。江邨風物過清明。

訪紀伯紫隱居

閑踏春泥著屐來。烟波百曲孝侯臺。柴門徑僻少人跡。門外野棠花亂開。

和牧翁題沈朗倩石厓秋柳小景

宮柳烟含六代愁。絲絲畏見冶城秋。無情畫裏逢搖落。一夜西風滿石頭。

秦淮雜詩十四首

年來腸斷秣陵舟。夢繞秦淮水上樓。十日雨絲風片裏。濃春烟景似殘秋。
結綺臨春盡已墟。瓊枝璧月怨何如。惟餘一片青溪水。猶傍南朝江令居。
桃葉桃根最有情。瑯琊風調舊知名。卽看渡口花空發。更有何人打槳迎。
三月秦淮新漲遲。千株楊柳盡垂絲。可憐一樣西川種。不似靈和殿裏時。
潮落秦淮春復秋。莫愁好作石城遊。年來愁與春潮滿。不信湖名尙莫愁。
青溪水木最清華。王謝烏衣六代誇。不奈更尋江總宅。寒烟已失段侯家。
當年賜第有輝光。開國中山異姓王。莫問萬春園舊事。朱門草沒大功坊。
新歌細字寫冰紈。小部君王帶笑看。千載秦淮嗚咽水。不應仍恨孔都官。
舊院風流數頓楊。梨園往事淚沾裳。樽前白髮談天寶。零落人間脫十娘。
傳壽清歌沙嫩簫。紅牙紫玉夜相邀。而今明月空如水。不見青溪長板橋。
新月高高夜漏分。棗花簾子水沉薰。石橋巷口諸年少。解唱當年白練裳。
玉窗清曉拂多羅。處處憑欄更踏歌。盡日凝妝明鏡裏。水晶簾影映橫波。
北里新詞那易聞。欲乘秋水問湘君。傳來好句紅鸚鵡。今日青溪有范雲。
十里清淮水蔚藍。板橋斜日柳毵毵。栖鴉流水空蕭瑟。不見題詩紀阿男。

弘光時阮司馬以吳綾作朱絲蘭書燕
子箋諸劇進宮中

雲字雙玉有紅鸚鵡詩最佳
阿男秋柳句云栖鴉流水點秋光
詩人伯紫之妹也

長干寺

門外長干道。林端鍾阜雲。浮圖插霄漢。臨眺絕人羣。宮闕秋聲合。滄江曉勢分。高臺元咫尺。花雨日氤氳。

登觀音閣眺望

幕府山頭晚吹涼。登高望遠極蒼茫。濛濛夕照開棠邑。葉葉風帆下建康。畫閣臨江飛鳥外。丹崖拔地暮雲旁。娑羅花發香林淨。坐聽微鐘出上方。

大風渡江三首

鑿翠流丹杳靄間。銀濤雪浪急潺湲。布帆十尺如飛鳥。臥看金陵兩岸山。紅襟雙燕掠波輕。夾岸飛花細浪生。南北船過不得語。風帆一霎翦江行。連山噴雪浪嵯峨。片片乘流竹箭過。憶昨傷春三月暮。江東門外柳枝多。

題余氏女子繡浣紗洛神圖二首

溪水粼粼見浣紗。苧蘿春色玉人家。絲絲繡出吳宮怨。碧石清江是若耶。明珠翠羽魏宮妝。洛水微波渺正長。欲寫陳王舊時恨。唾絨兼做十三行。

登瓜洲大觀樓見月懷西樵

帆影落瓜洲。高城四望秋。迴颺聞玉笛。涼月滿江樓。清切三山影。流光萬里愁。有懷謝希逸。江左思悠悠。

真州城南作

真州城南天下稀。人家終日在清暉。長橋漁浦晚潮落。曲港叢祠水鶴飛。新月初黃映江出。遠山一碧送

船歸白沙洲上樓臺靜。好與提壺坐翠微。

昭陽舟中讀閨秀徐幼芬遺詩寄李季子二首

昭陽北望景依依。江柳微黃燕雁飛。空憶謝家才調美。青絲曾解小郎圍。自來學得謝公棋。博士風流幼婦詞。未免有情看不得。橋南荀令斷腸詩。幼芬七歲能與父奕

陳洪綬水仙竹二首 爲周櫟園侍郎題

清冷池畔梁園種。奈此生綃素影何。更寫東阿舊時恨。芝田館外見凌波。玲瓏疎影玉繽紛。比似江梅迥不羣。特向蒼梧分一本。淚痕斑處伴湘君。

樊圻畫

蘆荻無花秋水長。澹雲微雨似瀟湘。雁聲搖落孤舟遠。何處青山是岳陽。

葉欣畫

偶來獨立碧谿頭。石澗茅亭白日幽。風雨欲來山欲暝。萬松陰裏颯寒流。

李念慈畫

君家涇水陽。終南在當面。紫閣與皇陂。宛向圖中見。

楊枝紫雲曲二首

名園一樹綠楊枝。眠起東風腕地垂。憶向瀟陵三月見。飛花如雪颺輕絲。黃金屈膝玉交盃。坐燼銀荷葉上灰。法曲只從天上得。人間那識紫雲迴。

董公祠

董公祠廟已荒涼，憑弔西京意倍傷。漫以園陵勞主父，祇將經術奉驕王。時逢明主身空老，志在春秋道正長。我自愛傳繁露學，玉盃曾問廣川鄉。

寄答汪茗文二首

光福鎮前白鶴飛，崦東崦西雨霏微。舊遊正及梅花發，憶爾漁陽桑葉稀。三載漫求方朔米，此行真息漢陰機。烽烟滿地憂租稅，石室金庭少是非。夫君蟬蛻辭軒冕，徑欲石公山下居。秋晚洞庭收橘實，月明震澤釣鱸魚。直從巾里尋真隱，莫問明庭有薦書。抗跡何妨五湖長，由來名士半樵漁。

送陳其年歸宜興

雪霰毘陵道，烟霞陽羨天。山從洞庭起，水與貢湖連。陳子青雲客，巖居傍善卷。那能乘白鶴，及爾御風烟。

冬日登海陵德香閣

檻外紅梅初吐萼，千枝萬朵壓簷低。淮南斜日登高閣，目極寒蕪雪漲溪。

頻歲

頻歲孫恩亂，颶檣壓海頭。傳烽連戍壘，野哭聚沙洲。司馬能清野，天吳漸穩流。江淮非異土，飄泊汝何憂。

淮陰雪夜

昨歲釣臺大風雪，今來風雪又維舟。枚臯里畔樹不辨，淮陰祠前冰亂流。俛仰古今可太息，側身天地多

煩憂苦聞渤海金笳動。故國何因得散愁。

蔣虎臣修撰述天台之遊賦贈

太史三茅隱。朱顏薄世榮。言尋沃洲路。遙向赤霞城。語識寒山妙。詩同太白清。石梁橫地底。今夜夢經行。

送徐存永歸閩攜家之湖南

舊家楓嶺外。去住復何言。海上田園失。歸途雨雪繁。家移建溪水。人聽楚山猿。未弔長沙傅。知君已斷魂。

秦郵曲二首

孟湖蕭蕭風色秋。神鴉競食嘯漁舟。夜半湖心明月上。還疑神女弄珠遊。

今年孟冬河水乾。萬夫舂鍤聚河干。行河使者黃符下。敢道無衣風雪寒。

寄竹林寺諸道人

瀟灑城南寺。亭亭千竹林。澗流殘雪積。春氣遠江陰。石壁窗中直。梅花臘後深。戴公山下路。扶病憶登臨。

雜題蕭尺木畫冊四首 爲鄭御史作

旛影依稀選佛場。白雲深處劇清涼。迢迢澗水空花出。寂寂寒山貝葉香。

山城水郭蒼茫裏。曲棧疎林遠近中。太息歐湖老詩史。直將勁筆壓關雎。

簔笠沿溪踏亂流。秋深蘆荻風颼颼。若得五湖三畝宅。便須隨汝釣槎頭。

平生酒態嵇中散。目送飛鴻坐竹林。閑向梅花彈一曲。落花亂點碧流深。

題棧道飛雪圖送曾道扶之漢中

西指褒斜路。淒然送遠心。千峯盤雪棧。數騎出雲林。蜀道連天起。秦關入望深。今宵畫圖裏。如聽暝猿吟。

二月五日淮陰作

二月五日春已半。淮南風物劇駸駸。麥苗亂茁垂楊岸。蝴蝶交飛花樹林。白羽徵兵吳會遠。黃巾掠地海墘深。何時戍罷狼烟淨。擊壤長從田父吟。

環溪觀玉蘭同朱秋厓陳冰壑

淮南二月好天氣。八寶城中春鳥鳴。溪閣客來尋舊約。辛夷花發值新晴。迴風雪霰當盃落。遲日雲霞拂檻生。杏葉柳枝俱髣髴。驚心被禊逼清明。

送茗文之京二首

淼淼江湖春水生。淮南風景過清明。故人恰向愁中至。感激真從難後平。竹外寒烟瓜步鎮。花時細雨廣陵城。謝公埭下通宵語。酒冷香殘十載情。

潦倒徒成未拂衣。疎狂真與世相違。南徐載鶴橫江去。西磧看花壓帽歸。此去故人京雒少。莫教遠道尺書稀。嶺南程五如相問。爲道維摩減帶圍。

載鶴探梅皆余與茗文近事。

絕句

波遶雷塘一帶流。至今水調怨揚州。年來慣聽吳娘曲。暮雨瀟瀟水閣頭。

寄陳伯璣金陵

東風作意吹楊柳。綠到蕪城第幾橋。欲折一枝寄相憶。隔江殘笛雨瀟瀟。

贈蔣虎臣先生

盧橘已垂實。楊梅初滿林。仙人一相訪。樽酒話同心。天台烟霧遠。華陽丘壑深。平生山水意。茲夕寄瑤琴。

紅橋二首

舟入紅橋路。垂楊面面風。銷魂一曲水。終古傍隋宮。
水榭迎新秋。素舸自孤往。漠漠柳綿飛。時時落波上。

眞州絕句五首

揚州西去是眞州。河水清。清江水流。斜日估帆相次泊。笛聲遙起暮江樓。
白沙江頭春日時。江花江草望參差。行人記得曾遊地。長板橋南舊酒旗。
曉上江樓最上層。去帆婀娜意難勝。白沙亭下潮千尺。直送離心到秣陵。
江干多是釣人居。柳陌菱塘一帶疎。好是日斜風定後。半江紅樹賣鱸魚。
江鄉春事最堪憐。寒食清明欲禁烟。殘月曉風仙掌路。何人爲弔柳屯田。

柳耆卿墓在城西仙人掌

和李退菴侍郎讀水經注懷洞庭之作

楚望經時入宵冥。岳陽樓上數峯青。曾臨南極浮湘水。坐對西風憶洞庭。斑竹想從春後長。落梅猶向笛中聽。新詩吟罷愁多少。腸斷當年帝子靈。

江東

江東人物舊難儔。遺老飄零半白頭。斑管題詩吳祭酒。梅村。紅顏顧曲袁荊州。羅襪。太常縑素雲烟

落。烟客。宗伯文章江漢流。牧齋。徑欲相從破蕭瑟。片颿高掛五湖秋。

吳公臺

大業那堪問。長城怨有餘。回頭成一笑。三十六封書。

青陽道中二首

黛色橫天際。蒼蒼秦望山。東巡殊不返。流恨此山間。
修竹被晴川。淪漣映空曲。日夕雪初消。人家在寒綠。

江陰何明府邀登君山

楚相何年邑。淒涼此獨經。棘門成宿草。浮遠祇空亭。上有亭名。浮遠。半壁收吳楚。空江入杳冥。卻思洞庭上。一

十二峯青

鄧玉書簡討招飲梅園

暨陽城外路。倚棹數寒鴉。何處吹橫笛。江南雪後槎。故人碧山隱。招我問梅花。更上花間閣。香山數點斜。
數前上聲。後去聲。

高橋曉望惠山寄修遠留仙心甫流綺

清盥披衣起。開簾見九峯。烟深微辨樹。潮落緩聞鐘。秦塢望中近。高流何處逢。那能品泉水。與爾趺長松。

潤州曉渡用皇甫冉萬歲樓韻

練湖分艇恨。何依北渡迴。看雲樹微白。下西來潮正落。應陽南去雁還飛。笛殘遠步新愁集。酒醒江關旅。

夢稀鐵甕城邊重懷古。當年萬馬蹴重圍。

蓉江寄牧翁先生

芙蓉江上雨廉纖。東望心知拂水巖。共識文章千古事。直教仙佛一身兼。夜聞寒雪推篷笠。春惜濃花側帽簷。兩到江南不相見。少微空向老人占。

題趙澄畫

爲周樸園侍郎題

烟柳南朝寺。風花建業城。年年春盡日。玉笛喚愁生。

鑾江舟中雪霽月出卽事題鄒詰畫

拂曉春寒重。揚帆急霰侵。月明生水際。積雪滿空林。岸火推篷近。漁菴閉戶深。平生剡溪興。茲夕是山陰。

萬一龍枇杷

洞庭詩人葛震父。畫成盧橘亦清蒼。想他縹緲峯頭坐。快寫西林五月黃。

亡名氏畫

蘆荻蕭蕭山氣陰。橫笛吹作蒼龍吟。一聲入破鐵皆裂。舉世無人知我心。

揮向千巖競秀圖

萬壑千巖雲霧生。曹娥江外幾峯晴。分明乞與樵風便。身向山陰道上行。

馬士英畫

秦淮往事已如斯。斷素流傳自阿誰。比似南朝諸狎客。何如江令擘箋時。

葉欣離宮秋曉

翠華寂寂罷宸遊。苑樹聲淒碧水流。一片敗荷千點葉。靈波宮外不勝秋。

送葉子吉編修入都

憔悴江潭客。先皇侍從臣。宮車一朝出。三別帝城春。自灑蒼梧淚。行吟楚澤濱。重來清切地。憶奉屬車塵。

送家兄禮吉歸濟南二首

龍山晴雪馬蹄長。山翠湖雲罷畫香。好到旗亭寒貰酒。雙鬢低按小秦王。
錦秋湖邊稻花涼。錦秋亭下鱸魚香。垂虹秋色一千里。秋到吳淞思故鄉。

戲做元遺山論詩絕句三十二首

巾角彈碁妙五官。搔頭傳粉對邯鄲。風流濁世佳公子。復有才名壓建安。
五字清晨登隴首。羌無故實使人思。定知妙不關文字。已是千秋幼婦詞。
青蓮才筆九州橫。六代淫哇總廢聲。白紵青山魂魄在。一生低首謝宣城。
挂席名山都未逢。潯陽喜見香鑪峯。高情合受維摩詰。浣筆爲圖寫孟公。
杜家箋傳太紛拏。虞趙諸賢盡守株。苦爲南華求向郭。前惟山谷後錢盧。
漫郎生及開元日。與世齜牙古性情。誰嗣篋中冰雪句。谷音一卷獨錚錚。
風懷澄澹推韋柳。佳處多從五字求。解識無聲絃指妙。柳州那得並蘇州。
中興高步屬錢郎。拈得維摩一瓣香。不解雌黃高仲武。長城何意貶文房。

草堂樂府擅驚奇。杜老哀時託興微。元白張王皆古意。不曾辛苦學妃豨。
廣大居然太傅宜。沙中金屑苦難披。詩名流播雞林遠。獨媿文章替左司。
獮祭曾驚博奧殫。一篇錦瑟解人難。千年毛鄭功臣在。猶有彌天釋道安。
涪翁掉臂自清新。未許傳衣躡後塵。卻笑兒孫媚初祖。強將配饗杜陵人。
詩人一字苦冥搜。論古應從象罔求。不是臨川王介甫。誰知暝色赴春愁。
苦學昌黎未賞音。偶思螺蛤見公心。平生自負廬山作。才盡禪房花木深。
林際春申語太顛。園林半樹景幽偏。豫章孤詣誰能解。不是曉人休浪傳。
鐵厓樂府氣淋漓。淵穎歌行格儘奇。耳食紛紛說開寶。幾人眼見宋元詩。
藐姑神人何大復。致兼南雅更王風。論交獨直江西獄。不獨文場角兩雄。
三代而還盡好名。文人從古善相輕。君看少谷山人死。獨有平生王子衡。
正德何如天寶年。寇侵三輔血成川。鄭公變雅非關杜。聽直應須辨古賢。
十載鈴山冰雪情。青詞自媚可憐生。彥回不作中書死。更遣匆匆唱渭城。
接跡風人明月篇。何郎妙悟本從天。王楊盧駱當時體。莫逐刀圭誤後賢。
翩翩安定四瓊枝。司直司勳絕妙詞。底事濟南高月旦。僅存水部數篇詩。
中州何李並登壇。弘治文流竟比肩。詎識蘇門高吏部。嘯臺鸞鳳獨迢然。
文章烟月語原卑。一見空同迥自奇。天馬行空脫羈勒。更憐譚藝是吾師。

濟南文獻百年稀。白雪樓空宿草菲。未及尙書有邊習。猶傳林雨忽沾衣。
楓落吳江妙入神。思君流水是天眞。何因點竄澄江練。笑殺談詩謝茂秦。
來禽夫子本神清。香茗才華未讓兄。徐庾文章建安作。悔教書法掩詩名。
海雪畸人死抱琴。朱絃疎越有遺音。九疑淚竹娥皇廟。字字離騷屈宋心。
澹雲微雨小姑祠。菊秀蘭衰八月時。記得朝鮮使臣語。果然東國解聲詩。
溪水碧于前渡日。桃花紅是去年時。江南腸斷何人會。只有崔郎七字詩。
曾聽巴渝里社詞。三閭哀怨此中遺。詩情合在空艸峽。冷雁哀猿和竹枝。
九歲詩名銅雀臺。三年留滯楚江隈。不如解唱黃鸝者。新自王戎墓下來。

太倉崔華字不雕。

夢與唐祖命遊黃山

昨宵山中駕。咫尺窮黃海。夢裏軒轅臺。迢迢復何在。

至日懷申臯盟兼寄張覆輿

晚雪融長至。春風到廣羊。有書來遠道。知汝臥清漳。久客諳吳語。行歌憶楚狂。如聞巖壑裏。慢世得琴張。
太液兄家舊藏倪元鎮畫自題云。蕭蕭風雨麥秋寒。把筆臨摹強自寬。賴有口君相慰藉。松肪筍脯
勸加餐。此詩甚佳。而雲林集不載。今年偶得松圓老人畫。愛其風格不減雲林。因用前韻題于左

方。

輕螺如髻秀堪餐。新柳微黃晚漲寬。應有扁舟天上坐。魷魚吹雪一江寒。

方山道中

前山白雲外。繚繞一江橫。漁舍參差見。風帆自在行。烟花憐故國。湖海寄浮生。洗盞船頭坐。一聲沙鳥鳴。

瓜步晚望

西日低銜瓜步鎮。亂鴉飛去石帆山。支頤獨眺江南岸。龍虎銷沉悵得閒。

癸卯除夕。得林翁茂之金陵書。適讀虞山先生列朝詩。載新安吳非熊萬曆甲辰同翁遊武夷山詩。

計至今甲辰六十年。感成一首。附書爲答。

文獻今誰在。先生古道存。高眠數人代。只似閱朝昏。納我秦淮水。新詩共討論。幔亭追往蹟。下界已曾孫。

望雞籠山雪寄杜于皇

天半雞籠雪。遙遙逸興偏。春陰寒未散。雲壑更相鮮。不辨谷中樹。應添巖下泉。因懷杜陵叟。拾橡此中眠。

秦郵雜詩六首

夾岸人家短竹籬。鴨頭新綠雨如絲。幾年寒食秦郵路。拂面楊花被酒時。

國士無雙秦少游。堂堂坡老醉黃州。高臺幾廢文章在。果是江河萬古流。

于方修文游臺成。

露筋祠前水拍村。平湖水暖生蘭蓀。靈風斜日畫棋捲。時有神鴉歸廟門。

濤聲東走海陵倉。蛾子紛紛割據場。三百年來陵谷變。居人猶是說張王。

張士誠元末據此。

三十六湖如玦環。青蘋風起白銀灣。紅橋四百姑蘇郡。徑合移來著此間。

小桃初紅柳垂陰。甃社湖中花水深。鴉頭十五竹枝曲。不聽歌聲何處尋。

茅山進香曲四首 揚俗舟人歲以三月近香茅山戲爲作此

家住茱萸灣。復灣年年三月。上茅山。白沙江邊吹笛去。赤山湖上賽神還。
遙指三峯次第青。五雲深處擁雲輶。猿啼日暮神靈雨。知是茅君欲現形。
雷平峯前雲氣開。池中隱約起風雷。何人戲取華陽劍。真割乖龍左耳來。
江澄兒女愛孤篷。水宿烟餐西復東。但祝茅君賜安穩。年年不怕石尤風。

冶春絕句十二首

同林茂之前報杜于皇孫約人張祖望程穆倩孫無言許力臣師六修稷紅橋酒間賦冶春詩

今年東風太狡獪。弄晴作雨遣春來。江梅一夜落紅雪。便有天桃無數開。
野外桃花紅近人。穠華簇簇照青春。一株低亞隋皇墓。且可當盃酒入脣。
紅橋飛跨水當中。一字闌干九曲紅。日午畫船橋下過。衣香人影太匆匆。
三月韶光畫不成。尋春步履可憐生。青蕪不見隋宮殿。一種垂楊萬古情。
髯公三過平山下。白髮門生感故知。欲覓醉翁呼不起。碧虛樓閣草離離。
東風花事到江城。早有人家喚賣錫。他日相思忘不得。半山堂下五清明。
坐上同矜作達名。留犁風動酒鱗生。江南無限青山好。便與諸君荷鍤行。
海棠一樹淡胭脂。開時不讓錦城姿。花前痛飲情難盡。歸臥屏山看折枝。
邛竹方袍老謫仙。威儀猶復見前賢。蓬萊三度揚塵後。坐閱春光九十年。
當年鐵礮壓城開。折戟沉沙長野苔。梅花嶺畔青青草。閑送遊人騎馬回。

謂林翁

彭澤豪華久黃土。梁谿歌舞散寒烟。張御史達泉。彭澤人。鄒副使愚谷梁谿人。林翁酒間述二家聲伎豪侈之樂。今俱衰歇矣。生前行樂猶如此。何處

看春不可憐。

故國風光在眼前。鶴山寒食泰和年。元遺山濟南詩句。邗溝未似明湖好。名士軒頭碧漲天。

時祖望談吾郡山水之勝。名士軒在明湖。曾子固守

郡時所作。

